


BAPAKOLAMI YA NTANGO NA SUKA

 Mbote na bino, bayoki. Tosolola na Nkolo na biso sikawa. Nzambe Monene, Mokeli ya likolo pe na nse, Yo nde obongiseli biso ntango oyo, na lolenge ya Bonzambe na Yo, mpo tokumisa Yo, na ntongo oyo. Pe tika ete, Nkolo, na mitema na biso, tomipesa mobimba na mokano ya Bonzambe na Yo pe mosala ya Molimo Mosantu kati na biso, mpo na kotalisa makambo Yo olingi koyebisa biso. Mposa na biso ezali kozala Baklisto malamumu koleka pe bantoma malamumu koleka mpo na Yo. Kokisela biso yango na ntongo oyo, ezali biso kotalela Yo, na Nkombo na Yesu Klisto. Amen.

Bofanda. [Moto moko alobi: “Olingi kotia pembeni bilamba ya mabondeli?”—N.D.E.] Iyo.

2 Tozali na esengo mingi kozala awa lisusu na ntongo oyo, na—na mosala ya Mokonzi monene. Bisu tose ngi lisusu bolimbisi, mpo tozangi bisika ya kofandisa bato, kasi tozali bobele na . . . Tokomeka kosala nyonso ekoki, ata ndenge nini.

3 Sikawa, bato mingi bazali na miswále pe malombo oyo etiami awa mpo babondela likolo na yango. Pe nakotia yango naino pembeni, nakobosana yango te, kasi nakobondela mpo na yango sima na eloko ya motuya na . . . lokola, na mpokwa. Nakosala yango na ntongo oyo, pe lisusu na mpokwa, ntango . . . Na sima nakobondela pe nakotalela Molimo na Nzambe mpo na lobiko na nzoto, pe ezali na ntango wana nde nakobondela mpo na—na miswále pe makambo mosusu.

4 Pe mpo na oyo etali bosenga ya moto na moto, Billy apesaki ngai yango, yango nyonso. Ezali pene na nkama misato, pe nauti kolongwa bisika yango. Bomoni, nakomeka kotala yango noki noki, moko na moko na ndenge nakokoka. Pe nakomeka kotala yango na lombangu mpenza. Nakokoka kotala yango nyonso te. Nakosembola loboko mpo na kozua moko, pe nakoloba: “Nkolo, ekozala nde *oyo*, pe *oyo*?” Ekozala bobele bongo, mpo bazali, moko na moko, na bosenga, bosenga mpenza ya lisungi; eloko moko oyo, na ntembe te, esengeli nasolola na bango. Pe ngai . . . Bobele soki, boyebi, ntango mosusu Molimo Mosantu akoki koloba likambo moko natangaki, pe etikali na motema na ngai; nakozongela yango lisusu, pe nakolukaluka kino nakozua yango. Soki boye te, nakozua yango kozanga kopona.

5 Sikawa, tolingi pe koloba, na ntongo oyo, pe kopesa mbote na baoyo bazali kuna na bituka mosusu ya ekólo. Tolingi kopesa mbote na bandeko na ntongo oyo na nzela ya telefone, na New

York City; na Beaumont, na Texas; na Prescott, na Arizona; na San Jose, na Californie; na Connecticut; na Gainesville, na Georgie; pe na New Albany, na Indiana; na ekólo mobimba. Topesi bino mbote na Nkombo na Nkolo Yesu.

⁶ Na ntongo oyo, na Indiana, ezali ntongo moko kitoko. Na butu eleki, mbula enókaki pe epesaki mpio. Pe tozali. . . Losambo etondi meke, pe moto nyonso azali kozela na mposa makasi liteya ya eteyelo ya Lomingo. Pe nandimi ete mapamboli ya Nzambe oyo eleki na bozui ekozala pe na bino kuna.

⁷ Pe tozali kotala, ndenge ekokoka, koluka lo—lolenge tokoki kozala na, esika tokoki kosangana biso nyonso elongo, ntango mosusu na nse na hema ya monene, esika nakomiyoka mpenza kokambama mpo na koteya likolo na Mbeki Nsambo ya suka na Biblia.

⁸ Bongo sikawa, mpo na koumela ntango mingi te na ntongo oyo likolo na lilakisi monene. . . Nalukaki elongi na Nkolo, kokanisáká: “Nakoloba nini?” na koyebáká ete oyo ekoki kozala liyangani ya suka tokoki kosala. Boyei na Nkolo ebelemi mingi mpenza!

⁹ Namoni, sima na esakweli oyo epesamaki na Californie, ezali na bandako mosusu kuna, pe bisika mosusu, ebandi kozinda na centimetele koleka ntuku misato na ngonga moko, mabaya ezali kopasuka pe kokweya. Pe bayebi te nini ezali kosala yango. Tokómi na suka. Bandako ya ba-dollar nkoto monkama ezali kozinda. Nazali na ba-titre minene ya ba-zulunale, bafotó, oyo nakomema yango na mpokwa, lokola nakolobela likambo moko likolo na yango na mpokwa ya lelo.

¹⁰ Pe, lisusu, na mpokwa tokozala na mabondeli mpo na babeli. Boya sima ya nzânga, na ngonga ya mitano, ya motoba, to na ngonga nyonso. Tokobanda na ntango malamumu, nakanisi, mpo bato bakoka kozonga na ntango malamumu, pe kozua bakalati na bino ya mabondeli. Pe na mpokwa tokobondela mpo na babeli, soki Nkolo alingi.

¹¹ Sikawa, sima na ngai kokanisa na mabondeli: “Nasengeli kosala nini?” Nayebi ete mokolo moko nakosambisama mpo na makambo nazali koloba awa. . . Pe nazuaki mokano, to nakambamaki na Molimo Mosantu koteya na ntongo oyo likolo na esakweli, mpo na kopesa biso boyebi. Bomoni? Ezali likambo oyo biso. . . Soki toyebi yango malamumu te, pe likambo moko esalemi na mpwasa, tosengeli koyeba likambo yango. Molimo Mosantu apesi biso yango, mpo tokebisa bato na makambo ezali koya. Boyebi, Biblia elobi, ete: “Nzambe asalaka likambo te bobele ete atalisa epai na baombo na Ye, bango basakoli.” Pe—pe ndenge Yesu akebisaki bato, na makambo ekosalema; ndenge basakoli bakebisaki bato, na makambo ekosalema. Pe ebongi na biso sikawa, na ntango monene tozali kobika na yango, koyeba eleko nini tozali kobika na yango, pe likambo nini ezali

kosalema, likambo nini ekosalema na eleko oyo. Bongo moko na mateya ya kokamwa oyo ntango mosusu tosila kotanga mbala mingi, eyeli ngai na motema ete—ete nalobela yango na bato na ntongo oyo.

¹² Sikawa tofungola ba-Biblia na biso na Matai mokapo ya 24, pe tokotanga eteni moko ya Liloba. [Ndeko Branham abongisi mongongo—N.D.E.] Bolimbisa ngai. Ezali lolenge ya—ya kopesa motó pe ntina ya liteya na biso.

¹³ Sikawa, bobosana te ete tokoteya yango lokola kelasi ya Biblia, malembe-malembe. Bokamata bikomeli na bino ná nkasa. Nakomaki biteni ya Makomi mingi awa, mpo—mpo bokoka kokoma yango. Na sima bozonga na ndako pe boyekola yango, mpo oyo ezali lokola kelasi ya eteyelo ya Lomingo, mpo tokoka koyeba, kokebisama pe komilengela mpo na mikolo tozali kobika kati na yango.

¹⁴ Kati na Mokanda ya Matai. [Ndeko Branham abongisi mongongo—N.D.E.] Bolimbisa ngai. Nzela ya 24...To, ezali, mokapo ya 24, kobanda na nzela ya 15, nalingi kotanga eteni ya Liloba na Ye.

Bongo, wana ekomona bino mbindo-na-libebisi ezali kotelema na esika na bulee, lokola na likambo lilobaki mosakoli Danyeze (tika ete motangi ayeba ntina),

Bongo baoyo bazali na Yuda bakima kuna na ngomba pe,

Ye oyo azali likolo na ndako—ndako akita te mpo na kozua eloko ezali kati na ndako na ye.

Ye oyo azali kati na elanga azonga nsima te mpo na kozua elamba monene na ye.

Mawa epai na basi bazali na zemi pe na bango bakonungisa bana na mikolo yango.

Bondela ete kokima na bino ezala na ntango na mpio te soko na mokolo na sabata te.

Ekozala na mpasi mingi lokola emonanaki longwa na ebandeli te. Ekobima pe boye lisusu te.

Soko mikolo yango iyei mikuse te mbele moto moko te akobika. Nde mpo na baponami, mikolo yango ikoya mikuse.

Yango wana, soki nani akoloba na bino ete, Tala Klisto wana, soko ete tala ye oyo, bondima te.

Zambi Baklisto na lokuta pe basakoli na lokuta bakotelema pe bakomonisa bilembo pe bikamwiseli minene mpo na kopengwisa baponami mpenza, soko nde bakokoka.

Tala nasili koyebisa bino liboso.

Bongo soko bakoloba na bino ete, Tala azali na lisobe, bobima te. Soko ete, Tala azali na eteni ya kati kati na ndako, bondima te.

Mpo ete, lokola mokalikali ekobimaka epai na likolo, ekongengaka epai na ngele, bongo pe koya na Mwana na moto ekozala.

Esika nini ezali ebembe, wana bampongo ikoyangana. . .

¹⁵ Sikawa, lokola motó na likambo, nalingi kozua molongo ya 24, nakolobela mingi molongo yango mpo na liteya na biso ya kelasi ya Lomingo na ntongo oyo. Pe boyoka malamau wana nakozongela kotanga oyo, lisusu.

Zambi Baklisto na lokuta pe basakoli na lokuta bakotelema pe bakomonisa bilembo pe bikamwiseli minene mpo na kopengwisa baponami mpenza, soko nde bakokoka.

¹⁶ Sikawa lokola motó na likambo na ntongo oyo, to lokola liteya, nalingi kozua: *Bapakolami Ya Ntango Na Suka*. Yango nde motó na likambo nalingi kolobela, to liteya: *Bapakolami Ya Ntango Na Suka*.

¹⁷ Nandimi ete tozali kobika na ntango ya suka. Nakanisi moto nyonso oyo. . . Motangi ya Makomi, to pe mo—mondimi, ayebi ete tokómi sikawa na suka ya lisolo ya mokili. Ntina ya kokoma yango ekozala te, mpo moto ya kotanga yango akozala te. Ezali suka ya ntango. Ntango nini, ngai nayebi te. Ekoumela ntango boni, ata Banje ya Likolo bayebi miniti to ngonga yango te. Kasi Nkolo Yesu alobaki na biso, ete, ntango makambo tozali komona sikawa ekobanda kosalema, bongo totombola mitó, mpo lisiko na biso ekómi pene. Sikawa, “kokóma pene” elingi koloba nini, ngai nayebi te. Ekokoli koloba. . .

¹⁸ Ndenge bato ya sciences balobaki mokolo moko, na televizió, bazalaki koloba na ntina na kopasuka monene, ya bankoto ya bakilometele, kati na mabele oyo ekozinda. Batunaki ye motuna: “Ekozinda nde kuna?” Ezali Los Angeles, Libongo ya Westi. Pe mingi kati na bino bomonaki ndenge balandelaki yango na radar, elekaki kino na. . . epasolaki nzela na nse ya San Jose, ekatisaki kino na Alaska, ekendeki kobima kino na Bisanga ya Aleutia, pene na ntaka ya kilometele koleka nkama mibale kati na mai na mbu, pe ekitaki lisusu kino na San Diego, ebalukaki sima ya Los Angeles, pe emataki kuna, lidusu monene.

Pe koningana ya mabele nyonso oyo tozalaki na yango euti na misala ya ba-volcan oyo ezali kosalema na lidusu monene wana. Nayebi lisusu nkombo ba—babengaki yango te. Ata bongo, ntango eninganaka, ebotaka koningana ya mabele oyo ekomelaka biso mibu ebele na Libongo ya Westi. Sikawa epasuki zongazonga na yango nyonso. Pe bato na Sciences balobaki, moko. . .

19 Mobali yango alobaki na mosusu: “Ekoki kozinda?”

Alobaki: “‘Ekoki’ te, kasi ekozinda.”

Alobaki: “Kasi na ekeke na biso te, ntango mosusu?”

Alobaki: “Na miniti mitano ezali kolanda, to na mibu mitano oyo ezali kolanda. Toyebi mpenza ntango yango te.”

20 Na poso oyo, batindelaki ngai ba-titre minene ya zulunale, na bandako minene minene ya ba-dollar nkoto monkama oyo ezali kopasuka pe kobukana, bato bazali kokende na bango. Pe bayebi te lolenge ya kotelemisa yango te. Lolenge ya kotelemisa yango ezali te. Bomoni, Nzambe akoki kosala likambo Ye alingi, pe moto moko te akoki koyebisa Ye ndenge ya kosala yango.

21 Bozali kotóngá bandako, bokoki kosala makambo ya mayele na bato, kasi Nzambe nde Mokeli ya mayele. Bokopekisa Ye ndenge nini? Akoki kobebisa mokili na ntongo ya lelo na ba-nsili soki Alingi. Boyebi yango, Akoki kokela ba-nsili, pe bakotonda na ntaka ya kilometele koleka ntuku motoba na minei na ndamwo ya ngonga, bomoni, moko te. . . pe bakosilisa nye bato nyonso na mokili. Azali Nzambe. Asalaka ndenge Ye alingi. Azali na bokonzi na Ye moko.

22 Sikawa, ezali biso komona komona polele ebele na makambo nyonso oyo, pe ngonga tozali kobika na yango sikawa, nakanisi ezali malamumu kozongela makambo oyo pe komonisa yango polele, lokola Bilembo esili kofungwama, mpo toyeba solo ya makambo oyo, lokola pe Nkolo azalaki sembo mpo na biso, na ngolu na Ye, mpo na kolakisa biso makambo oyo.

23 Nalingi botala malamumu awa na Matai 24, Yesu asalelaki liloba oyo “Ba-Klisto,” B-a-k-l-i-s-t-o, “Ba-Klisto.” Klisto te, kasi “Ba-Klisto,” na boike, na bomoko te. “Ba-Klisto.” Na bongo, liloba oyo *Klisto* elingi koloba “Mopakolami.” Pe lisusu soki ezali “oyo apakolami,” ekozala bobele moto moko te, kasi bato mingi, oyo apakólami, “bapakolami.” Bomoni?

24 Na elobeli mosusu, soki Alingaki kolimbola yango mpo tokoka kososola yango malamumu koleka, Alingaki koloba: “Na mikolo na suka, bapokolami ya lokuta bakotelema.” Sikawa, ezali komonana lokola ekoki kosalema te, bomoni, maloba oyo “bapakolami.” Kasi botala malamumu maloba oyo elandi: “pe basakoli ya lokuta,” b-a-s-a-k-o-l-i, na boike.

25 Sikawa, *mopakolami*, ezali, “ye oyo azali na nsango.” Pe lolenge bobele moko oyo nsango ekoki koteyama, ezali na nzela ya moto oyo *apakólami*, pe yango ezali mosakoli, mopokolami. “Balakisi ya lokuta, oyo bapakólami, bakotelema.” Mosakoli ateyaka bobele nsango na ye. Balakisi oyo bapakólami, kasi bato oyo bapakólami na malakisi ya lokuta. Bapokolami, “Ba-Klisto,” na boike; “basakoli,” na boike. Pe soki ezali na eloko lokola kli—Klisto, na bomoko, na bongo baoyo wana basengeli kozala

“bapakolami,” bongo esakweli ya malakisi na bango nde ezali na bokeseni, mpo bazali bapakolami, bapakólami.

²⁶ Sikawa, ezali liteya ya eteyelo ya Lomingo, tolingi ko—komeka koteya yango pe kokokanisa yango mpenza, na Makomi, na oyo moto mosusu alobeli yango te, kasi na kotanga bobele Makomi.

Bokoloba: “Ekosalema ndenge nini? Bapakolami yango bako. . .”

²⁷ Bazalaki banani? “Ba-Klisto,” B-a-k-l-i-s-t-o, bapakólami. “Ba-Klisto, pe basakoli ya lokuta.” Bapakolami, kasi basakoli ya lokuta!

Yesu alobaki, ete: “Mbula enokaka likolo ya bayengebeni ná bato mabe.”

²⁸ Sikawa, moto moko akoki koloba na ngai: “Ondimaka ete epakweli oyo ezali likolo na bato wana elingi koloba ete ezali epakweli ya Molimo Mosantu?” Iyo, misie, ezali Molimo Mosantu ya solo ya Nzambe likolo na moto, ata bongo bazali bato na lokuta.

Sikawa boyoka malamumu pe botala oyo Alobaki. “Pe bakomonisa bilembo pe bikamwiseli mpo na kopengwisa Baponami mpenza, soko nde bakokoka.” Kasi bapakólami na Molimo Mosantu ya solo. Nayebi ezali komonana lokola bolema mpenza, kasi tokozua ntango mpo na kolimbola yango na Liloba, ezali mpenza YANGO ELOBI NKOLO, Bosolo.

²⁹ Sikawa tokamata ba-Biblia na biso, miniti moke, na Matai mokapo ya 5, pe tobanda na—na nzela ya 45, pe tomona sikawa wana tokotanga Makomi oyo na ntango moke. Pe sima na biso kokoma awa, ee, tokopesa bino. . . Boye bino, soki totangi yango nyonso te, bongo bokoka kozua ba-Biblia na bino; pe—pe lisusu bokoka kotanga yango ntango tokolongwa awa pe bokozonga na ndako, pe—pe botanga oyo Biblia elobi mpo na yango.

³⁰ Sikawa, mpo na kowela ntango na biso, pe kotia mo—moboko, mpo nazali na likambo ya koloba ya kokamwisa. Ndenge nini Molimo Mosantu akoki kopakola molakisi ya lokuta? Kasi yango nde Yesu alobaki ekosalema.

Sikawa, Matai, mokapo ya 5, nzela ya 45, totanga sikawa. Tokamata, tobanda mo—moke likolo na yango, na nzela ya 44.

Nde ngai nazali koloba na bino ete, Bolinga bayini na bino, bopambola baoyo bazali kolakela bino mabe, bosala malamumu epai na baoyo bazali koyina bino, . . . bobondela mpo na baoyo bazali konyokola bino;

Bongo bokozala bana na Tata na bino na likolo, zambi akobimisa moi na ye na bato mabe pe. . . na bato malamumu, pe akonokisa mbula likolo na bayengebeni pe. . . bato mabe. (Mbula enokaka likolo na bato mabe ndenge moko pe likolo na bato malamumu.)

³¹ Sikawa, mpo na kolandisa yango, na esakweli mosusu kokokana na oyo, tokamata sikawa Baebele mokapo ya 6, mpo na eteni oyo elandani na yango, esika Polo azali kokanisela makambo yango moko Yesu alobaki. Polo nde azali koloba awa. Ezali bino koluka yango . . . Pe bino bozali kolanda na ba-radio, bozala na ba-Biblia na bino pembeni na bino ná eteni ya lokasa, pe botala yango sikawa. Baebele mokapo ya 6, Polo nde akomeli Baebele, kotalisa bango bililingi pe bitaliseli, komema bango longwa na Judaizme kino na Boklisto, kotalisa bango lolenge makambo nyonso ya kala ezalaki bobele bililingi ya makambo esengelaki koya. Polo alobi, na Baebele 6.

Boye totika makambo mikemike ya liboso ya mateya ya Klisto (K-l-i-s-to, na bomoko), pe toleka kino suka. Totika naino kotia moboko na kobongwana na motema . . . misala na kufa pe kondima Nzambe,

Pe . . . mateya mpo na libatisi pe kotiyama maboko pe kosekwa na kufa pe esambiseli na seko.

Tokosalaka bongo soko Nzambe apesi nzela.

Zambi mpo na bango basili kongengelama moi pe koyoka elengi ya likabo na likolo pe kosangana na Molimo Mosantu,

Nalingi kobenda bokebi na bino mpo na miniti moke. Bomoni malamumu, ete ezali “likabo”; kasi “makabo” te, kosangana na “makabo ya likolo”? Kasi, ezali “likabo ya likolo,” na bomoko; “Klisto,” na bomoko; “likabo,” na bomoko.

. . . likabo na likolo, pe . . . kosangana na Molimo Mosantu,

Bayoki elengi ya . . . liloba na Nzambe . . . (bayoki elengi ya nini?) . . . ya liloba na Nzambe, pe ya nguya na ekeke ekoya;

Soko na sima basili kopengwa, nzela na kobongola bango mpenza lisusu na motema ezali te mpo bazali kobakisa Mwana na Nzambe na ekulusu bango mpenza, pe bazali kotiola ye.

Zambi (boyoka) mabele . . . komela mbula oyo ekonokaka na yango mbala mingi, mpo na kobimisa ndunda kosunga baoyo batimoli yango; makoziuka mapamboli na Nzambe.

Nde soko makobimisa nzube . . . matiti mpamba, makoki na eloko te pe malingi kolakelama mabe; suka na yango kozika móto.

³² Sikawa bokokanisa yango lisusu na Matai 5:24. Botala malamumu, Yesu alobaki mbula pe moi ekitaka na mabele, pe Nzambe atindaka yango mpo na koléngéle bilei pe biloko mosusu mpo na bato ya mokili. Pe mbula etindamaka mpo na bilei, ndunda. Kasi matiti mpamba, matiti mabe, lokola ezali kati

na elanga, ezuaka mbula yango. Mbula moko oyo ekolisaka masangu ezali mbula yango moko oyo ekolisaka matiti mabe.

³³ Lolenge nazuaki liteya ya boye, ezalaki mokolo moko, ntango nakutanaki na ba-Pantekotiste mbala ya liboso! Pe ezalaki liteya monene mpo na ngai. Namonaki mibali mibale, moko . . . Nayokaka naino te nsango ya koloba minoko na sika liboso. Moko na bango azalaki koloba minoko na sika, oyo mosusu azalaki kolimbola yango, pe bongo na bongo. Pe bazalaki koloba solo, koloba ete: “Ezali na bato mingi awa oyo bakobongola mitema na mpokwa ya lelo. Ezali basi ná mibali, elongo.” Pe bato bazalaki kotelema kokende na etumbelo.

Nakanisaki: “Oyo likambo na nkembo!”

³⁴ Na sima, ná likabo moke ya Molimo Mosantu, nasololaki na bato yango, bobele, boyebi bino moko, na kososola makanisi, lolenge moke mpo na koyeba. Na bongo moko na bango azalaki Moklisto ya solo, pe azalaki mosali ya Klisto ya solo, pe mosusu wana azalaki mokosi. Pe moko na bango, oyo azalaki mokosi, azalaki kobika na mwasi moko ya nsuki moindo, pe azalaki kobima na mosusu ya nsuki motane pe abotaki na ye bana. Ee, emonanaki polele kati na emononeli; ekokaki kotiyama ntembe te. Pe nalobelaki ye yango. Atalaki ngai pe akendeki sima na ndako.

³⁵ Bongo nazuaki mobulu, ya solo mpenza. Ngai nakanisaki nakómaki na kati na banje, na sima namitunaki soki nazalaki na kati ya milimo mabe te. Likambo ya boye ekokaki nde kosalema? Nakokaki kososola yango te. Pe mibu na mibu natikalaki mosika na yango, kino mokolo moko ntango . . .

George Smith, elenge mobali oyo ayaka mpo na mwana na ngai ya mwasi, tokendeki lobi, kuna na esika ya masini ya kala ya masangu, epai nakendeke kobondela.

Pe sima na ngai kofanda wana mikolo mibale to misato, Molimo Mosantu akaniselaki ngai lisusu Likomi oyo. “Zambi mbula ekonokaka mbala mingi na mabele mpo na kobimisa na yango ndunda, kasi nzube pe nsende ebikaka bobele na mbula yango moko, pe suka na yango ezali kozika moto.” Ezali kobika na liziba yango moko ya Nzambe oyo epesaka bomoi. Wana nde nasosolaki yango. “Na . . .” Yesu alobaki: “Bakoyeba bango na mbuma na bango.”

³⁶ Bongo, sikawa, mbula oyo ekitaka likolo ya matiti mpenza ya mokili, ezali etaliseli ya mbula ya Molimo oyo epesaka Bomoi na Seko, ekitaka likolo ya Lingomba, mpo tobengaka yango mbula ya liboso pe mbula ya suka. Pe ezali mbula, oyo ezali konoka uta na Molimo na Nzambe, likolo ya Lingomba na Ye.

³⁷ Botala malamumu, awa ezali likambo moko ya kokamwa mpenza. Bomoni? Ntango mimboto yango etiamaki na mabele, ata etiamaki ndenge nini, longwa ebandeli ezalaki bobele nzube. Kasi kuna, masangu oyo etiamaki na mabele, ná ndunda, ezalaki bobele ndunda longwa na ebandeli. Pe ndunda moko na moko

ezalaki koyikana yango moko, lisusu pe lisusu, kotalisa ete ezalaki mpenza na ebandeli.

³⁸ “Pe bakopengwisa Baponami soko nde bakokoka,” mpo ete bazali kozua mbula yango moko, mapamboli yango moko, kotalisa bilembo yango moko, bikamwiseli yango moko. Bomoni? “Bakolinga kopengwisa, to bakopengwisa Baponami, soko nde bakokoka.” Kasi, nzube ekoki koboya kozala nzube te, lisangu pe ekoki koboya kozala lisangu te; ezali oyo Mokeli ya moko na moko akanaki longwa ebandeli. Ezali Baponami. Mbula yango moko!

³⁹ Moi ebimaka na ntongo pe etambolaka mokili mobimba, ndenge ezali kosala lelo na mokili tozali kobika na yango. Pe moi, moi moko oyo ebimaka na Esti ezali moi yango moko elalaka na Westi. Pe moi yango etindamaka mpo na kotelisa mbuma na mabele, uta na yango nde banzoto na biso esalema.

⁴⁰ Tozali kobika na nzela ya eloko oyo ekufi. Yango lolenge bebele moko bokoki kozala na bomoi. Pe soki eloko moko esengeli kokufa mokolo na mokolo mpo bobika, na nzoto, boye ezali solo te ete soki bino. . . Nzoto na bino esengeli kobika na nzela ya eloko oyo ekufi, mpo na bomoi ya mokili oyo, boye bosengeli kozala na Eloko oyo ekufi, na molimo, mpo na kobikisa bomoi na bino ya molimo. Pe Nzambe, amikómisaki eloko ekoki kosimbama, mosuni, pe akufaki mpo biso tobika. Ezali na Lingomba moko te, to eloko mosusu te na mokili, oyo ekoki kobikisa yo, bebele Nzambe. Bobele na yango nde bakobika.

⁴¹ Sikawa botala na Makomi. Yesu azali Liloba. “Na ebandeli Liloba ezalaki. Pe Liloba ekómaki mosuni pe efandaki kati na biso. Na ebandeli Liloba ezalaki, pe Liloba ezalaki mboka na Nzambe. Pe Liloba ekómaki mosuni, pe Abikaki, afandaki kati na biso.” “Pe moto akobika bebele na lipa te,” mpo na nzoto, “kasi na Liloba nyonso ebimaka na monoko na Nzambe.” Na bongo, bomoni, tozali kobika na Liloba, pe yango ezali Nzambe.

⁴² Sikawa moi eyaka mpo na kotelisa mbuma. Sikawa, etelisaka yango nyonso mbala moko te. Ntango ezali kokola, kokomela, ezali kotela moke moke kino ekokóma kobimisa motó na yango mobimba.

Ezali pe bongo, lelo, mpo na Lingomba. Ebandaki na bolenge na yango, na eleko ya molili, kuna ezalaki na nse ya mabele. Ekoli pe sikawa kino ekomeli. Pe tozali komona yango, na kobonga be, ndenge Nzambe ntango nyonso, na nzela ya bozalisi. . .

⁴³ Bokoki kotia mobulu na bozalisi te. Yango nde likambo monene lelo. Tozali kotinda ba-bombe na mipepe, pe kuna na mai-na-mbu, kobebisa yango pe kopanza yango na ba-bombe atomike. Bozali nde kobebisa yango lisusu koleka ntango nyonso wana, ezali bino kobwaka bosoto yango kuna. Bozali kokata

banzete; mopepe makasi ekomema bino. Bozali kotonga bitutu kopekisa mai kotiola, ebale ekoyikana.

Bosengeli koyeba lolenge Nzambe asalaka makambo pe kotikala kati na yango. Tokotisi bato na mangomba pe bibongiseli mpo bakoma bato na mangomba; mbano nini tozui! Botikala na lolenge Nzambe apesi yango.

⁴⁴ Kasi, bomoni: “Anokisaka mbula,” tozonga na liteya na biso, “likolo na bayengebeni pe bato mabe.” Yesu azali sikawa koyebisa bino awa, na Matai 24, ekozala elembo ya ntango na suka.

Sikawa, soki elembo yango ezali bobele mpo eyebana na ntango ya suka, na bongo esengeli na yango kozala sima ya bofungwami ya Bilembo oyo. Bomoni? Ezali elembo ya suka. Yango ekozala, ntango makambo oyo ekosalema, ekozala na ntango ya suka. Pe ekozala bongo elembo, mpo Baponami bakozala na mobulu te na makambo oyo. Bomoni yango? Na bongo, esengeli komonisama, kotalisama polele.

⁴⁵ Botala malamumu, masangu ná matiti mabe ebikaka na Epakweli yango moko uta na Lola. Yango nyonso mibale esepelaka na Yango.

Nakanisi likambo oyo, ntango nazongisi makanisi na likambo esalemaki mokolo wana na Green’s Mill. Na—namonaki emononeli yango koya. Pe ezalaki etando monene ya mabele, oyo ebongisamaki mobimba mpo na kolona. Pe tala Moloni moko ayaki, liboso. Nalingi kotalisa liboso yango. Botala eloko nini esalamaki liboso, pe nini elandaki yango na sima. Pe ntango Moto yango, na elamba pembe ayaki zinga zinga ya mokili, azalaki kolona momboto, bongo sima na Ye moto moko ayaki, alataki bilamba ya moindo tuu, azalaki lokola moto ya mayele mabe, amikotisaki na mayele sima na Ye, kolonaka matiti mabe. Pe ntango likambo yango esalemaki, na bongo namonaki milona nyonso mibale kobima. Pe ntango ebimaki, moko ezalaki lisangu pe oyo mosusu ezalaki matiti mabe.

Na sima kokauka eyaki, pe ete, emonanaki lokola, yango nyonso mibale egumbaki motó na nse mpo na kosenga mbula. Na sima lipata moko monene eyaki kozipa mokili, pe mbula ebetaki. Pe lisangu emisembolaki pe elobaki: “Nkolo asanzolama! Nkolo asanzolama!” Matiti mabe pe emisembolaki pe egángaki: “Nkolo asanzolama! Nkolo asanzolama!” Mbano yango moko. Bango mibale bazalaki kokufa, bango mibale bazalaki kokufa. Pe na sima lisangu ebimaki pe eyoki mposa ya mai. Bongo lokola ezalaki na elanga yango moko, na lopango yango moko, na esika yango moko, na nse ya kosopama mai moko, lisangu ebimaki pe matiti mabe pe ebimaki, na eloko yango moko. Botala malamumu, mai yango moko ya epakweli ekolisaka lisangu, pe ekolisaka matiti mabe.

⁴⁶ Molimo Mosantu oyo epakolaka Lingomba, oyo epesaka bango mposa ya kobikisa milimo ya bato, oyo epesaka bango nguya ya kosala bikamwa, Ekitaka likolo ya bato mabe pe bayengebeni. Molimo yango moko! Sikawa, bokoki kosala yango ndenge mosusu te mpo na kososola Matai 24:24. Alobaki: “Ekozala na baklisto ya lokuta,” bapakolami, ya lokuta. Bapakólami na Eloko ya solo, kasi mpo na Yango bazali basakoli ya lokuta, balakisi ya lokuta.

Eloko nini ekokomisa moto molakisi ya lokuta ya likambo oyo ezali Solo? Sikawa tokokóma na elembo na nyama sima na miniti moke, pe bokomona ezali ebongiseli. Bomoni? Balakisi ya lokuta; bapakolami, ya lokuta. Ba-Klisto bapakólami, kasi balakisi ya lokuta. Ezali lolenge moko bokoki komona yango.

⁴⁷ Ndakisa eleki ntango moke awa, nalobelaki likambo oyo. Nakoki kolobela yango, mpo ekólo mobimba ezali kolanda na nzela ya singa. Mokolo moko nazalaki kosolola na moninga na ngai moko, esika bazali kolanda biso na ntongo oyo, na Arizona. Pe azalaki na—na elanga ya ndímo. Pe azalaki pe na nzete moko ezalaki nzete ya malala pe ezalaki kobimisa mbuma ya pamplemusu, na ndímo-ya-ngai, na mandeleni, na kelementine. Pe nabosani boni ezalaki na bambuma ya ndenge na ndenge kobota na nzete moko wana. Pe nalobaki na mo—mo—moto yango, nalobaki: “Ndenge nini? Lolenge ya nzete nini oyo?”

Alobaki: “Nzete, yango moko, ezali nzete ya malala.”

Nalobaki: “Ndenge nini ezali kobimisa mbuma ya pamplemusu? Mpo na nini ezali kobimisa ndímo-ya-ngai?”

Alobaki: “Babakisi kobakisa bitape na yango.”

Nalobaki: “Namoni. Ee, sikawa,” nalobaki, “boye, mbula na sima ntango nzete yango ekobota mbuma mosusu,” yango nyonso ekokomela pene na ntango moko, nalobaki, “na bongo nyonso ekobota malala. Soki ezali nzete ya malala navele, ekobota malala navele, boye te, misie?”

Alobaki: “Te, misie. Etape ya nzete nyonso oyo bakotisaki kokotisa ekobota kokokana na lolenge na yango.”

Nalobaki: “Olingi koloba ete ndímo-ya-ngai ekobota ndímo-ya-ngai uta na nzete ya malala yango?”

Alobaki: “Iyo, misie.”

“Pamplemusu ekobota pamplemusu uta na nzete yango ya malala?”

Alobaki: “Iyo, misie. Ezali lolenge ya etape babakisaki kobakisa.”

Nalobaki: “Nzambe asanzolama!”

Alobaki: “Olingi koloba nini?”

Nalobaki: “Motuna moko lisusu. Boye, nzete yango ya malala ekobota lisusu malala?”

Alobaki: “Ntango ekobimisa etape mosusu.” Ntango ekobimisa etape mosusu, ezali te ntango babakisi kobakisa na yango. Kasi, yango nyonso ezali bambuma ya ndímo, pe ezali kobika na bomoi ya ndímo oyo ezali na nzete ya ndímo.

⁴⁸ Nalobaki: “Yango mpenza! Ba-Methodiste bakobota ba-Methodiste, ntango nyonso. Ba-Batiste bakobota ba-Batiste, ntango nyonso. Bakatoliko bakobota Bakatoliko, ntango nyonso. Kasi Lingomba ya Nzambe na Bomoi ekobota Klisto uta na mosisá, Liloba ntango nyonso, soki ebimisi mowiti mosusu na yango Moko.”

⁴⁹ Sikawa, bokoki kobakisa bakisa yango na kati, bomoni. Pamplamusu nyonso, ndímo-ya-ngai, mandeleni, kelemantine, ezala mbuma ya ndímo ya lolenge nini, yango nyonso ekoki kobika na nzete wana; kasi ekopesa litatoli ya lokuta ya nzete yango, ezali yango kobika mpo na nzete yango. Bomoni yango? Yango nyonso ezali kobika pe kokola longwa na bomoi ya solo mpenza oyo ezali kati na nzete yango.

Sikawa, Matai 24:24 yango wana, kobika bobele na Bomoi yango, kasi bazalaki malamumu te, na ebandeli. Bazali kopesa litatoli ya lokuta ya Nzete yango! Ezali nzete ya malala, kasi ezali nzete ya ndímo. Pe balobaka: “Lingomba oyo, ebongiseli oyo ezali kotatola Klisto,” pe ezali na libatisi ya lokuta, litatoli lokuta ya Liloba, ezali bango koloba ete nguya na Nzambe ezalaki bobele mpo na bayekoli.

Yesu, Ye moko, alobaki: “Bokende na mokili mobimba, kosakola Nsango Malamumu na etape nyonso oyo eko. . . nzete oyo ekobota, etape nyonso oyo ekozala na nzete. Pe bilembo oyo ekolanda bitape ya solo mpenza.” Wapi? Ntango nyonso oyo ekozala Nzete, ntango nyonso oyo Ekobimisa bitape, kino na suka ya molongo. “Bakobengana milimo mabe na Nkombo na Ngai, bakoloba minoko na sika, bakolokota banyoka; bakomela eloko na kufa; baktia maboko na babeli pe bakobika.” Bomoni ngonga nini tozali kobika? Bomoni likambo Yesu alobaki?

⁵⁰ Bomikanisela, likambo oyo ezalaki na ntango ya suka, na eleko ya Wesley te, kalakala te. Sikawa, na ntango ya suka, yango nde likambo esengelaki kosalema.

Sikawa botala Makomi malamumu; Yango moko etatola. Yesu alobaki: “Bozali kolukaluka kati na Makomi mpo bokanisi, to bondimi, ete na Yango bokozua Bomoi na Seko, pe Yango nde Ezali kotatola mpo na Ngai.” Na elobeli mosusu, soki nzete oyo ebote etape mosusu. . . “Ngai nazali Mowiti, Nzete; bino bozali bitape. Ye oyo akondimela Ngai, misala mizali Ngai kosala, akosala yango pe lokola,” Yoane 14:12.

⁵¹ Sikawa: “Ye oyo akoumela kati na Ngai, ye oyo. . . ye oyo azalaki kati na mosisá na Ngai uta na ebandeli.”

Yango wana Yesu azalaki ye moko Ntina pe Libota na Dawidi. Azalaki liboso na Dawidi, kati na Dawidi, pe sima na

Dawidi, Ntina pe Libota na Dawidi; Mozonto na Ntongo, Felele ya Salono, Lisi ya Lobwaku, Alifa pe Omega; Tata, Mwana, pe Molimo Mosantu. “Litondi mobimba na Bonzambe ekofandaka kati na Ye na motindo na nzoto.” Ye moko Ntina pe Libota na Dawidi!

“Ye oyo azali Bomoi eponámá, Bomoi ebongisámá liboso, oyo ezali kati na Ngai,” pe Azali Liloba, “longwa na ebandeli; ntango akoya, akobota mbuma na Ngai.” Yoane 14:12.

Kasi baoyo mosusu bakobika na eloko yango moko, komibenga Baklisto pe bandimi. “Ezali te baoyo nyonso balobaka ‘Nkolo! Nkolo!’ nde bakokota wana.”

Sikawa, likambo oyo esengeli kosalema pe komonisama na mikolo ya suka, “ntango mabombami na Nzambe ekosila,” ndenge tokomona yango sima na tango moke.

⁵² Banzete oyo, mowiti ya solo pe mowiti ya lokuta! Bosi boyoka ngai koteya likolo na yango mbala moko, eleki mibu ebele, ndenge ekolaki esika moko. Natalisaki yango na lolenge ya bato, pe namonisaki yango, kobanda Kaina pe Abele, miwiti mibale oyo ekutanaki na etumbelo; bango mibale basambeli, bango mibale bapokolami, bango mibale bazalaki na mposa ya bomoi, pe bazalaki kosambela Nzambe moko. Kasi moko aboyamaki pe mosusu ayambamaki.

Pe lolenge moko oyo moto ayambamaki asalaki likambo ekesanaki na ndeko na ye, ezalaki ete azuaki emoniseli na yango. Mpo Biblia elobi: “Mpo na kondima . . .” Baebele, mokapo ya 11: “Mpo na kondima, Abele apesaki Nzambe mbeka malamau koleka ya Kaina; na nzela yango, Nzambe atitolaki ete azalaki moyengebeni.”

Yesu, alobaki, emoniseli ya molimo ya Nani Ye azalaki! “Bato bazali koloba ete Mwana na moto azali nani?”

Alobaki, Petelo alobaki: “Yo ozali Klisto, Mwana na Nzambe na bomoi.”

“Esengo na yo, Simona—Simona, mwana na Yona, zambi mosuni pe makila imonisi yango na yo te. Tata na ngai na Likolo nde amonisi yango. Likolo na libanga oyo Nakotonga Lingomba na Ngai,” (nini?) emoniseli ya solo ya Liloba. Tala Mowiti ya solo lisusu. “Abele, mpo na kondima!”

Okoloba: “Ezalaki emoniseli te.”

⁵³ Kondima ezali nini? Kondima ezali eloko oyo emonisami epai na yo; ezali naino te, kasi ondimi ete ekozala. Kondima ezali emoniseli ya mokano na Nzambe. Bongo, mpo na emoniseli!

⁵⁴ Pe mangomba lelo bazali ata kondima emoniseli ya molimo te. Bazali kondima malakisi ya bindimeli ya ebongiseli moko. “Mpo na emoniseli Abele apesaki Nzambe mbeka malamau koleka ya Kaina; na nzela na yango Nzambe atitolaki ete azalaki

moyengebeni.” Amen. Nandimi ete bososoli yango. Bomoni wapi tozali kobika? Bomoni ngonga yango?

Nazalaki kosolola na mo—moto moko malamu eumeli te, Moklisto, moko ya mayele pe moto malamu. Alobaki: “Misie Branham, tobói bimoniseli nyonso.”

⁵⁵ Nalobaki: “Boye bosengeli koboya Yesu Klisto, mpo Ye azali emoniseli ya Nzambe, Nzambe amimonisaki na nzoto ya moto.” Soki bososoli yango te, bobungi.

Yesu alobaki: “Soki bokondima te ete Ngai nazali Ye bokokufa na masumu na bino.” Ye azali emoniseli ya Nzambe, Molimo na Nzambe emonisami na lolenge ya nzoto. Soki bokoki kondima yango te, bobungi. Kokómisa Ye moto ya misato, moto ya mibale, to moto mosusu libanda na Nzambe, bobungi. “Soki bokondima te ete Ngai nazali Ye bokokufa na masumu na bino.” Emoniseli!

⁵⁶ Kokamwa te ndenge bakokaki komona Ye te. “Moto akoki koya epai na Ngai te bobele soki Tata na Ngai akobenda ye. Pe baoyo nyonso Tata akopesa Ngai,” kobanda na misisá, “bakoya epai na Ngai.” Bomoni? Bososoli yango? Oh, boni tosengeli kolinga Ye, kosambela Ye, kosanzola Ye; komona mbuma ya Molimo na mikolo ya suka, pe Nzete ya Mwasi na libala kokomela na suka ya ntango!

⁵⁷ Mowiti ya solo pe mowiti ya lokuta, yango mibale ezuaki epakweli moko. Mai ekweaki likolo na yango mibale. Ezali likambo ya kokamwa te soki Akebisaki biso: “Ekopengwisa Baponami mpenza, soko nde ekokoka.”

⁵⁸ Botala, bazali komonana ndenge moko. Bapakólami ndenge moko. Kasi botala: “Na mbuma na bango. . .” Bokoyeba yango ndenge nini?

Ndenge nini boyebaka ete wana ezali malala te? Mpo ebimisi pamplemusu. Mowiti yango ezali malamu mpenza, ezali kobika kati na nzete, kasi ebimisi pamplemusu. Ekeseni na oyo ya liboso.

Pe soki lingomba moko elobi bango “bandimaka ete Yesu Klisto azali motindo moko lobi, lelo, pe libela,” pe baboyi Nguya na Ye, baboyi misala na Ye, baboyi Liloba na Ye; soki—soki. . . Lingomba oyo endimelaka Yesu Klisto, ekosala misala na Yesu Klisto, ekozala na Bomoi ya Yesu Klisto. Pe soki ezali te, ata Bomoi ezali kosopana kati na yango ndenge nini; soki ebongisámá liboso te, longwa na misisá, ekobimisa bapamplemusu ntango nyonso, to eloko ekeseni. Kasi soki ezali Bomoi oyo ebongisámá liboso, longwa na misisa, ekobimisa Yesu Klisto motindo moko lobi, lelo, pe libela, soki ezali Liloba oyo ezali komata longwa na Mosisá. Yango wana, Azali Mosisá, ebandeli ya ntango.

⁵⁹ Botala malamumu, kasi ezali oyo bazali kobimisa nde ezali kolakisa biso bokeseni. “Na mbuma na bango,” Yesu alobaki, “nde bokoyeba bango.” “Bakozua mbuma na miwiti epai na nsende te,” ata nsende ezalaka na elanga na miwiti. Yango ekoki kosalema, kasi mbuma ekolakisa yango.

Mbuma ezali nini? Liloba, mbuma mpo na eleko. Yango wana nde, malakisi na bango. Malakisi ya nini? Malakisi ya eleko, ekómi ntango nini. Malakisi ya bato, malakisi ya bibongiseli, kasi, to Liloba na Nzambe mpo na eleko?

Sikawa, ntango ezali koleka noki-noki mpenza, mpo tokokaki koumela wana ntango molai. Kasi nayebi malamumu ete bino bozali awa sikawa, pe nandimi, kuna na ekólo mobimba, bokoki komona likambo nameki koyebisa bino, mpo tozali na ntango mingi te ya koumela likolo na yango.

⁶⁰ Kasi bokoka komona ete Epakweli ekitaka likolo ya bato mabe, balakisi ya lokuta, pe ezali kotinda bango kosala mpenza makambo Nzambe apekisaki kosala; kasi, ata bongo, bazali kosala yango. Mpo na nini? Bakoki kosala ndenge mosusu te. Nsende ekoki kozala eloko mosusu te bobele nsende, boye te? Ata ebeteli mbula malamumu boni, ekozala bobele nsende. Tala ntina Yesu alobaki: “Bakozala mpenza pene na lolenge ya kopengwisa ata Baponami mpenza,” baoyo bazali kati na misisá, “soko nde ekoka,” kasi ekoki kosalama te. Lisangu ekosala eloko mosusu te bobele kobota lisangu; bobele yango nde ekoki kobota.

⁶¹ Botala malamumu. Bomikanisela, Nzambe azali mobandisi ya ebongiseli te. Zabolo azali mobandisi ya ebongiseli. Natalisa yango polele na nzela ya Liloba, mbala na mbala; tokokota na yango te na ntongo oyo. Toyebi ete Nzambe abongisaka bato na lolenge wana te, ata moke te, mpo na kosala ebongiseli. Mibu nkama na nkama sima na liwa ya moyekoli ya suka, liboso ebongiseli ya liboso esalema. Emonanaka ntango nyonso ét esimbaka te. Soki te, mpo na nini lelo tozali esika moko te kati na bolingo: Ba-Methodiste, ba-Batiste, ba-Presbiterien, Bakatoliko pe nyonso wana? Bongo, mpo na nini misala na Nzambe ezali kolanda biso te, soki mangomba nyonso ezali na likambo yango moko, Liloba? Makambo oyo nde ezali kokabola bato, bondeko. . . Tozali mosika na Nzambe koleka ndenge tozalaki, ezali kolobela, mangomba.

⁶² Sikawa, bayebisi biso ete: “Makambo nyonso ya kala esalemaki lokola ndakisa, mpo na kolakisa biso, kopamela biso, kopesa biso toli.” Ezali yango, makambo nyonso ya kala ya Kondima na Kala esalemaki, ezalaki elilingi, mpo tomona ndenge nini Kondimana na Sika ekozala, na eleko na biso.

Ezali lokola yo ómona naino loboko na yo te, pe ótomboli miso pe ómoni elilingi na etutu, lokola loboko na ngai ekozala uta na pole, soki ezali na misapi mitano awa na elilingi, ntango ezali elili; pe soki óbelemisi maboko na yo, oyo ezali solo ya

elili, pembeni na—pembeni na elili yango, esengeli kopesa misapi mitano.

Ndenge Biblia elobi na biso, ete: “Kondimana na Kala ezali elilingi, etaliseli ya makambo ya sika, to ya makambo esengelaki koya; ezali mpenza makambo ya solo te, kasi ezali elilingi, etaliseli ya makambo esengeli koya.”

⁶³ Tozonga sima pe totala soki likambo oyo esalema na eleko mosusu. Bolingi yango? [Losambo balobi: “Amen.”—N.D.E.] Boye nde tokoyeba, mpo na kotalisa yango polele, na mozindo mpenza, na nzela ya Liloba; na likanisi ya moto moko te, to ndimbola.

Ezala ata nani, etali ngai te; moto mosusu, ngai moko to moto nani mosusu: “Soki alobi te kokokana na mobeko pe basakoli, Pole ezali kati na ye te.” Bomoni? Yango nde Biblia elobi. “Tika maloba ya bato nyonso ezala lokuta, kasi oyo ya Ngai ezala solo,” ata moto yango azali nani.

⁶⁴ Sikawa tozonga sima pe totala soki likambo oyo esalema, mpo etalisa biso ndakisa.

Tokoki sikawa kozonga sima na Mokanda na Esode pe tolobela moto moko na nkombo Mose, oyo azalaki mosakoli oyo apakolamaki pe atindamaki na Nzambe, ná Liloba ya Nzambe pe mokano na Nzambe mpo na ekeke na ye. Lokola Liloba na Nzambe etambolaka ntango nyonso na bokobi, Alobaki, “Akosala likambo moko te bobele ete Amonisa Yango liboso epai na basakoli na Ye.” Yango nde Asalaki. Uh-huh?

Sikawa, Ye akoki kokosa te. Akoki te kokosa pe Azala Nzambe. Te, misie. Asengeli kotikala sembo. Lokuta ezali kati na Ye te. Azali . . .

Pe Akoki kobongola Yango te. Soki Asali yango, na bongo Azali Nzambe te; Asalaki libunga. Asengeli kozanga suka. Pe oyo azangi suka akoki kosala libunga te. Bomoni? Bongo likambo Nzambe alobi, ezali solo mpo na Seko. Bomoni? Pe Alakaki yango. Bongo, botala malamau, ezali na esika moko te na Biblia oyo ezangi kolandana mpenza.

⁶⁵ Sikawa, Nzambe alakaki Abalayama ete momboto na ye ekozala mopaya na—na ekólo mosusu na mibu nkama minei, na sima Akobimisa bango na loboko na Ye monene ya nguya pe ya makasi, Akolakisa bilembo pe bikamwiseli na Ye kati kati na bato bazalaki kofanda na bango. Ntango ya elaka ekómaki pene. Bato babosanaki yango. Bazalaki na Bafalisai ná Basadukai, pe bongo na bongo, bibongiseli. Kasi, na pwasa, Nzambe ye moko ayaki pe abimisaki moko, libanda, mosika na bango.

Nzambe naino, na eleko moko te to na ntango moko te, abenga mosakoli uta na ebongiseli te. Te, misie. Ye abebisami mingi, akokoka kosala yango te; akosepela kotikala na ebongiseli wana.

⁶⁶ Mose, moto atindami na Nzambe, ná Liloba ya Nzambe, pe ezalaki ye na mobembo ya komema Yisalaele na mboka na elaka, azalaki sembo na mitindo ya Nzambe, pe akutanaki na mosakoli mosusu, mopakolami mosusu oyo azalaki na epakweli ya solo ya Molimo Mosantu moko oyo ezalaki likolo na Mose. Ya solo. Azalaki mosakoli. Molimo Mosantu ezalaki likolo na moto yango. Nkombo na ye ezalaki Balame. Toyebi ye malamumu biso nyonso. Ee, makambo yango, yango moko, makambo—makambo moto yango alobaki, ezali kokoba kosalema, esili koleka pene na mibu nkoto mibale na nkama mwambe. “Yo ozali lokola nzale, eh Yisalaele. Ye nani oyo apamboli yo akopambolama. Ye nani oyo alakeli yo mabe akolakelama pe mabe. Makasi na yo, pe nguya, hema na yo ezali sembo eh Yakobo!” Bomoni, akokaki kosala ndenge mosusu te. Ayaki wana na likanisi kati na motema na ye ya kolakela libota mabe.

⁶⁷ Oh, bino balakisi ya lokuta oyo boyoki ba-bande mibu nyonso oyo, pe bomoni Nzambe kokokisa mpenza makambo Alobaki, pe bofandi na biro na bino pe boyebi ete ezali Solo; pe mpo na bokese ni ya bibongiseli na bino, bozali kobeta ntembe na yango pe koloba na bandimi na bino ete ezali bongo te. Mawa na bino! Ngonga na bino ebelemi pene koleka.

⁶⁸ Balame, apakolamaki na Molimo moko oyo ezalaki likolo na Mose. Bokese ni ezalaki nini? Malakisi ya Mose ebongaki be. Biblia elobi awa na Petelo ya Mibale, ezalaki “malakisi ya Balame” nde Yisalaele bayambaki, yango Nzambe alimbisaki ata moke te. Lisumu elimbisamaka te! Moko te kati na bango abikisamaki, ata babimaki na nse ya mapamboli ya Nzambe, pe bamonaki loboko na Nzambe kosala na nzela ya mosakoli na nguya oyo, pe bamonaki yango kotatolama mpenza na Nzambe. Pe, mpo ete, mosakoli mosusu ayaki wana na malakisi, ya kokese, pe atelemelaki Mose, pe amekaki kotalisa na bato ete Mose azalaki na libunga. Pe Datan, Kore, pe mingi kati na bango bayokanaki na ye pe bateyaki bana na Yisalaele kosala pite, kolanda ebongiseli na ye, ete: “Biso nyonso tozali ndenge moko.”

“Ata tozali Metodiste, Batiste, Presbiterien, to Pantekotiste, pe nani lisusu, biso nyonso tozali ndenge moko.”

⁶⁹ Tozali ndenge moko te! Bozali libota etiami pembeni, bulee mpo na Nkolo, oyo emipesi mpo na Liloba pe Molimo na Nzambe, mpo na kobota mbuma ya elaka na Ye mpo na eleko oyo. Pe bozali bato na bango te! Nayebi ezali likambo moko makasi, kasi ezali Solo ndenge moko. Baoyo bamipesi mpo na mosala na ntango ya suka oyo! “Bobima kati na yango.”

⁷⁰ Kasi, “malakisi ya Balame,” esakweli ya Balame te. Yango ezalaki malamumu. Yango ezalaki Nzambe. Boni bandimi yango? [Losambo balobi: “Amen.”—N.D.E.] Esakweli ya Balame ezalaki mpenza malamumu, mpo akokaki koloba eloko mosusu te. Epakweli ya Nzambe elingaki koloba eloko mosusu te, pe Nzambe

atitolaki yango na kotalisa polele ete ezalaki Solo. Kasi ezalaki “malakisi ya Balame.”

⁷¹ Sikawa bokokanisa yango na Matai 24:24. Bapakolami, kasi malakisi na bango ezali lokuta. Bosato bosantu, pe makambo nyonso ya motindo wana; lokuta, motemeli na Klisto!

Nakanisi ezali kozokisa mitema na bino te. Pe bokanga yango te, ba-telephone. Pe botelema mpo na kobima te. Bofanda bobele kimia, pe totala soki Molimo Mosantu akomonisa biso yango te, pe akotalisa biso yango polele te. Bokoloba: “Kasi yango...” Ata bondimaka nini, bofanda bobele kimia pe boyoka. Pe bosenga Nzambe afungola mitema na bino, bongo nde bokomona soki bozali nzube, to nsende, to esika nini botelemi. Bomoni?

⁷² Sikawa, ata Yuda, “abongisamaki liboso mpo na kosambisama,” azalaki wana liboso na Yesu. Pe Yesu alobaki na ye: “Ezali nde yo. Oyo nyonso olingi kosala, pe nyonso osengeli kosala, kenda kosala yango noki.” Ye ayebaki oyo azalaki kosala, kasi, mpo na palata ntuku misato, pe lokumu, atekaki Nkolo Yesu Klisto. Moko na bayekoli na Ye, mobombi misolo ya lingomba, Yesu abengaki ye “moninga” na Ye. Bomoni? Biblia elobi: “Abotamaki mwana na libebi,” ndenge moko Yesu abotamaki Mwana na Nzambe. “Kopengwisa Baponami mpenza soko nde ekoka.”

⁷³ Bolanda na bokebi wana tozali kokoba koyekola. Tokozua ndakisa mosusu, na Mokanda ya Mikonzi. Mosakoli mo—moko azalaki, pe nkombo na ye ezalaki Mikaya. Azalaki mwana na Yimila, pe azalaki mosakoli. Azalaki.

Pe ezalaki na mosakoli mosusu, mokonzi ya ebongiseli ya basakoli, bapakolami. Biblia elobi bazalaki “basakoli,” ndenge moko lokola Alobaki Balame azalaki mosakoli, bapakolami.

Pe moko na bango azalaki na nkombo Mikaya, oyo apakolamaki na Nzambe pe atindamaki na Nzambe, ná Liloba na Nzambe.

Moko azalaki, Sedekiya, oyo akanisaki atindamaki na Nzambe. Apakolamaki na Nzambe, kasi malakisi na ye ekesanaki na Liloba na Nzambe. “Bakotelema, ba-Klisto ya lokuta, bakomonisa bilembo minene, ekopengwisa Baponami, soki nde ekoka.”

⁷⁴ Botala, bango mibale, bango mibale bapakólamaki. Kasi, ndenge nini okoki kokesenisa solo, na lokuta? Botala eloko nini Liloba elakaki mpo na Akaba. Mosakoli oyo azalaki liboso na ye, ezalaki Eliya, moko na basakoli minene koleka ya eleko, ye azalaki mosakoli oyo atitolamaki. Mosakoli yango oyo atitolamaki alobaki, ete: “Mpo Akaba asali mabe oyo, bambwa bakoleta makila na ye; lokola abomaki Nabota. Pe bambwa bakolia Yezabele, pe na...nzoto na ye ekozala lokola nyei na bilanga.” Sikawa, ndenge nini okoki kopambola eloko Nzambe

alakeli mabe? To ndenge nini okoki kolakela mabe, ndenge Balame alobaki, eloko Nzambe apamboli? Bomoni?

Kasi basakoli oyo bazalaki sembo. Bazalaki, na ntembe te, bato malamumu, bato na lokumu. Zambi, mpo na kozala mosakoli na Yisalaele, osengeli kozala moto na lokumu, to mpo na kozala bobele mo-Yisalaele. Soki te, okobomama na mabanga. Bazalaki bato na lokumu. Bazalaki bato na mayele. Bazalaki bato bayebi mokanda. Bazalaki bato baponami na Akaba, kati na ekólo. (Omoni yango Ndeko mwasi Wright?) Baoyo baponami kati na ekólo, balongobani malamumu mpo na ela- . . .

⁷⁵ Pe sikawa, ntango Mikaya azuaki emononeli na ye, ayebaki na motema na ye oyo Liloba elobaki, kasi alingaki komona nini Molimo oyo ezalaki kati na ye ekoloba.

Bongo balobelaki ye, balobaki: “Yo loba likambo moko basakoli mosusu balobi. Pe ntango okosala yango, ee, okozala, tokozongisa yo, lisusu, na ntembe te, kati na lisanga na biso. Bomoni? Tokokómisa yo moko na biso. Tokozongisa yo kati na ebongiseli na biso. Ozali. . . Toyebi ozali mosakoli, kasi yo olobaka ntango nyonso bilakeli mabe. Ntango nyonso olakelaka Akaba mabe. Kasi, Sedekiya, mokonzi, pápa, to soki. . .” ata azalaki nani. “Ye apambolaki Akaba, pe alobaki, ‘Kende kosala yango.’ Sikawa, yo loba bobele bongo, Yimila. Ee, yo ozali bobele mobola ya moto. Ozali na yo ata na losambo te. Pe bato oyo bazali na ba-milio. Ekólo mobimba bazali sima na bango. Sikawa yo loba ndenge moko na bango, bongo okomona nini okosala, oko—okolia bozui ya mboka.” Azalaki kosolola na moto moko ye ayebaki malamumu te!

⁷⁶ Boye soki elobamaki: “Okoki komona mbeba moko na Sedekiya, Mikaya?” “Te.” “Okanga ye na lisumu?” “Te.” “Oyoka ye kofinga moto?” “Te.” “Okuta ye alangwi masanga?” “Te.” “Okoki kotia ntembe na boyebi na ye?” “Te.” “Okanisi lípolome na ye ya kidokotolo ezali ya lokuta?” “Te.” “Ondimi ki—kidokotolo na ye ezali mpenza malamumu?”

“Ya solo. Kokokana na lisanga ya Sanedrine; nakanisi, likita mobimba, nakanisi ezali mpenza malamumu.”

“Ee, bongo, mpo na nini oboi kosangana na ye?”

“Mpo azali libanda na Liloba!”

⁷⁷ Ee, tokosukisa likambo yango, ntango wana, lokola Eliya mosakoli liboso na yango. Pe soki ozali mwana na Nzambe, okotikala na mosakoli ya Biblia oyo. Ezali Liloba. Botala ngonga, eleko.

⁷⁸ Ee, bongo soki Sedekiya alobaki: “Oh, nayebi mosakoli alobaki yango, kasi ezali mpo na ekeke ekoya. Ezali mpo na ntango molai kobanda lelo?”

Alobaki: “Bozela kino nakozua emononeli uta na Nzambe, na sima nde nakoyebisa bino.”

Alobaki: “Na sima okoloba ndenge moko?”

Alobaki: “Nakoloba bobele yango Nzambe alobi; eloko mosusu te, nakobakisa te. Nakoki kobakisa liloba moko na Yango te, to kolongola Liloba moko na Yango te.”

Bongo na butu wana, kati na libondeli, Nkolo ayaki epai na ye na emononeli. Na ntongo elandi, abimaki, pe alobaki . . .

Botala basakoli mibale!

⁷⁹ Moto monene koleka kati na ekólo, na miso ya basoda pe ya ekólo, ezalaki Sedekiya. Azalaki mosakoli-mokonzi, mpo na mokonzi. Azalaki mokonzi ya basakoli mosusu nyonso ya ebongiseli. Atiamaki, na ebongiseli na ye, lokola mokonzi na bango nyonso; azalaki mpenza moto ya malamumu, ayekola mingi, abonga be mpo na mosala yango. Pe apakolamaki na Molimo Mosantu, mpo abengamaki “mosakoli.” Ya solo, bobele mosakoli mpamba te, azalaki mosakoli ya Baebele. Sikawa botala ye malamumu.

⁸⁰ Sedekiya alobaki: “Yawe asololi na ngai, ‘Salela Ngai maseke mibale ya ebende,’ elembo.” Mosakoli apesaka ntango nyonso bilembo. “Alobaki, ‘Sala maseke oyo ya ebende.’ Molimo Mosantu ayebisi ngai, ‘Kamata yango,’ Epakweli oyo epambolaki ngai.” Bokanisa te ete ezali mpo na mbeka, kasi ezali mpo na kokóma na likambo moko. “Molimo Mosantu oyo alobaka minoko ya sika na nzela na ngai, Ye oyo atatoli ngai, Alobi, ‘Kamata maseke oyo, pe na nzela yango, yebisa mokonzi ete akopusa Basulia kino libanda na mboka. Pe Nakozongisela ye mabele oyo esengeli kozala ya Yisalaele, Lingomba.”

Ndeko, yango etelemi mpenza na mobeko, ezali lokola Balame azalaki. Balame atelemaki mpenza na mobeko na elobeli na ye kaka ndenge Mose azalaki. Mose . . . Motango malamumu ya Nzambe ezali nsambo. Pe Balame alobaki: “Tongela ngai bitumbelo nsambo; mbeka nsambo ya peto, bangombe mibali, pe bampate mibali nsambo.” Yango ezali kotalisa boyei ya Mwana na Nzambe. Kolandana na mobeko, azalaki mpenza na elonga lokola moto nyonso kati na bango.

⁸¹ Pe Sedekiya ye oyo, azalaki mpenza na elonga kolandana na mobeko: “Zambi mabele oyo ezali ya biso. Ee, Basulia pe Bafilistia bazali kotondisa mabumu na bango, ná bana na bango pe bongo na bongo, banguna na biso, na bilei bana na biso bazali kozanga! Na ntango oyo, Nzambe apesaki biso mabele oyo!”

Ndeko, yango ezali maloba moko malamumu. Nakanisi akokaki koloba yango polele liboso ya Yisalaele, pe bakokaki kogánga na makasi na bango nyonso. Sikawa nazali koloba mpo na lelo. Nakanisi bozali kolanda ngai. Kogánga, pe kobelela nyonso oyo!

⁸² Bomikanisela Dawidi, na lomingo eleki? Bomoni? Bino kuna, bayoki na ba-radio, to bipai bozali kolanda na telefone; soki bozuaki Liteya ya lomingo eleki te, bozanga yango te.

Komeka Kosalela Nzambe Mosala Kozanga Koponama Mpo Na Kosala Yango, ata ozali sembo to malamu ndenge nini, Nzambe akoyamba yango soko moke te. Bomoni?

Bongo, botala Sedekiya, akanisaki azali na elonga.

⁸³ Mikaya alobaki: “Botika natuna Nzambe.” Bongo, na ntongo elandaki ayaki na YANGO ELOBI YAWE. Akokanisaki emononeli na ye na Liloba.

⁸⁴ Sikawa soki alobaki na Sedekiya: “Oyebi likambo mosakoli ya Biblia alobaki ekokómela moto oyo?”

⁸⁵ “Kasi ezali mpo na ntango oyo te, mpo moto oyo azali moto ya lokumu. Azali komeka.” Bozanga kosimba likambo oyo te. “Azali komeka kozongisela lingomba biloko ya lingomba. Azali komeka kozongisela yango libula na yango,” biloko ya Molimo te; soki ezalaki bongo, akokaki koningisa ekólo wana mobimba lokola Eliya asalaki. Kasi, azalaki komeka kopesa bango biloko ya mokili: “Ezali libula ya biso moko. Tozali ebongiseli monene. Tozali bato na yango. Bisu nyonso, bino nyonso, bino Ba-protestant, bino nyonso bosengeli kosangana na biso elongo.” Iyo.

Tokokóma na yango sima na ntango moke. “Bango nyonso bazali bandeko mibali pe basi, ata ndenge nini.” Ezali boye te! Ezalaka bongo te pe ekozala bongo ata moke te, mpo na Lingomba ya Nzambe ya solo. Ekoki kosalema te!

⁸⁶ Botala malamu, amonaki emononeli. Bongo alobaki: “Nzambe asololi na ngai.” Sikawa, botala, moto yango azalaki sembo. Alobaki: “Alobaki, ‘Sala maseke oyo, pe belema liboso ya mokonzi pe kende ngambo ya westi,’” to ngambo nini ya etanda ya mboka longwa esika bango bazalaki. “‘Pusana, pe ekozala YANGO ELOBI YAWE, ete akolonga etumba pe akozonga, elonga mpo na lingomba.’ Akobengana bango libanda!” Ezali mpenza pene, boye te? Likambo ezalaki nde nini?

Mikaya abelemaki wana. Balobaki: “Sikawa yo, pesa esakweli na yo.”

⁸⁷ “Kende na yo! Kasi namoni Yisalaele lokola bampate, bapanzami, bazali na mobateli te.” Uh! Ezalaki mpenza na bokeseni.

⁸⁸ Sikawa, bino nde bozali liyangani. Sikawa nani alobi solo? Bango mibale, basakoli. Lolenge bobele moko bokoki kokesanisa bango, ezali, kokokanisa yango na Liloba.

Alobaki: “Ozui yango ndenge nini?”

Alobaki: “Namoni Nzambe afandi likolo na Ngwende.” Alobaki: “Namoni likita mobimba zingazinga na Ye.”

⁸⁹ Sikawa, bobosana te, Sedekiya autaki koloba ete ye pe amonaki Nzambe, pe Molimo yango moko. “Namonaki Nzambe. Ayebisaki ngai nasala maseke oyo ya—ya ebende. Kende kuna pe

bengana libanda mabota yango, mpo esika oyo ezali ya biso. Bato wana basengeli na yango te.” Bakokaki mpenza soki batikalaka sembo na Nzambe. Bakokaki kozala na yango, kasi batangwaki mosika na Nzambe.

Ezali pe bongo mpo na ebongiseli, lingomba. Ezali na makoki mpo na makambo oyo, kasi babotolaki bino yango na mayele mabe, mpo botangwaki mosika na Liloba na Nzambe pe na Molimo na Nzambe, epakweli, mpo na kotatola Liloba ya eleko. Bozanga kososola Liteya oyo te.

⁹⁰ Botala sikawa likambo nini esalemaki. Alobaki: “Namonaki Nzambe,” Mikaya nde alobaki, “afandi na Ngwende na Lola. Likita na Ye esanganaki zingazinga na Ye. Alobaki, ‘Nani tokoki kotinda mpo akende kopengwisa Akaba, mpo maloba ya Eliya ekokisama; mosakoli na Ngai oyo atotolamaki. Nalobaki ete akoya. Pe Eliya azalaki na Liloba na Ngai. Pe likolo pe nse ekoleka, kasi Liloba na Ngai ekokweya te. Etali ngai te lolenge bato bakomi na makambo ya mikolo oyo, to lolenge bakomi malam, to lolenge bakomi na mayele koleka, to ndenge bakomi bato minene, Maloba na Ngai ekokweya soko moke te.’

“Pe molimo moko ya lokuta ebimaki na lifelo, ekweyaki na mabolongo, pe elobaki, ‘Soki Okoki kopesa ngai nzela, nakoki kopesa bango epakweli na ngai, ekotinda bango kosala bilembo pe bikamwiseli ndenge na ndenge, ntango nyonso wana nakotika bango libanda na Liloba. Akoyeba ata moke te ete Yango nde Liloba na Yo. Akomona yango mpamba, mpo na lokumu.’” Ndeko, bantango ebongwani te. Ndeko Neville, ezali solo. Bino bobosana te, ezali solo. “Nakokita likolo na ye, nakosalisa ye makambo moko oyo bamosusu bazali kosala. Nakosala ete asakola, pe aloba lokuta.” Ekokaki kozala lokuta ndenge nini? Mpo ekesanaki na Liloba.

⁹¹ Bokamata moko na libatisi ya lokuta oyo, *makambo songolo-pakala* ya lokuta, ata ezali komonana lokola likambo ya solo ndenge nini, ata bazali komekola yango ndenge nini, ezali lokuta soki ekesani na Liloba na Nzambe ya ntango oyo. Yango mpenza.

Okoloba: “Ee, ya biso, ee, tosalaki *boye*, pe tosalaka *boye*, pe losambo na biso ezalaka *lolenge boye* pe *boye*.”

Ezala ndenge nini, etali ngai te. Soki ekesani na Liloba oyo ekomami mpo na ntango oyo, ezali lokuta. Nzambe akozala na likambo moko na yango te, ata bazali sembo boni, ata bayekoli boni, ata bazali na mayele boni, ata ezali komonana lokola solo boni, ata ezali komonana na molongo boni, soki ekesani na Liloba ya ntango oyo! Tokokota moke na mozindo koleka sima na miniti moke, soki ntango ekozala. Soki te, tokozongela yango na mpokwa oyo.

⁹² Botala, azalaki sembo, moto malam, na ntembe te. Pe alobaki . . . Na bongo, na ndenge mosusu, Mikaya alobelaki ye, polele boye te, kasi na elobeli mosusu: “Opakolami na molimo

moko ya lokuta.” Kolobela episkopo likambo yango ezalaki ngambo, boye te? Kasi asalaki yango.

⁹³ Na bongo episkopo yango abelemaki pe alobaki: “Okozala lisusu na lisanga na bandeko soko moke te,” pe abetaki ye na elongi. Alobaki: “Oyebi ete ngai nazali moto atitolami. Lingomba na ngai ekomisaki ngai mokonzi na yango, likambo oyo. Kopona ya bato na Nzambe nde ekómisi ngai boye. Ebongiseli na ngai nde ekómisi ngai boye. Pe Nzambe apesaki biso mabele oyo, pe mposa na Ye ezali ete ézala ya biso. Pe nazali na YANGO ÉLOBI YAWÉ.” Abetaki ye na elongi, pe alobaki: “Nzela nini Molimo na Nzambe alekaki, ntango Atikaki ngai?”

⁹⁴ Mikaya alobaki: “Okoyeba yango, moko na mikolo oyo,” ntango California ekozinda na nse na mai-na-mbu kuna, pe makambo nyonso oyo. Bomoni? “Okomona nzela nini Yango ekendaki, ntango okofanda na baboloko ya katikati.”

⁹⁵ Sikawa, Akaba, okoloba nini? Alobaki: “Nandimi mosakoli na ngai.” Ekokaki kozala boni soki atalaki kati na Liloba? Bomoni, aboyaki komimona ete alakelami mabe. Boyoka ngai! Aboyaki komimona ete alakelami mabe. Moto nyonso pe bongo.

Pe ya ngai ebongi-. . . ndeko ya ebongiseli, yango nde likambo na yo. Olingi kokanisa ete ozali na solo, pe, oyebi na motema na yo ete, ntango ozali kobatisa na nkombo ya “Tata, Mwana, Molimo Mosantu,” ozali kokosa. Oyebi ete ntango osako-. . . koloba makambo ozali kosala, pe oponi bilembo ya liboso, pe makambo nyonso wana, ozali na libunga. Ndenge nini elembo ya liboso ekoki kozala minoko na sika, pe na sima oloba makambo ekeseni na elaka ya Nzambe mpo na ntango oyo? Ekosalema ndenge nini? Oboyi elakeli mabe te, boye te? Kasi, *Awa* ekomami, ekozala pe bongo. Yango ezali elembo na nyama, ekozala pene koleka mpo na kopengwisa Baponami, soko nde ekokoka.

⁹⁶ Elembo nyonso, ekamwiseli nyonso, bato bapokolami, lisakoli, bakosala makambo ndenge na ndenge, bilembo ya ndenge na ndenge, bikamwiseli ya ndenge na ndenge, ndenge nini bokoyeba kokesenisa yango? Botala malamú Liloba ya ntango oyo. Na yango nde bokozua. . .

⁹⁷ Botala Mose, lolenge akokaki kolobela Balame. Botala Mikaya awa, ndenge nini toyebaki ete alobaki solo? Liloba, liboso na ye, esakolaka yango mpo na Akaba.

Pe Liloba, liboso na biso, esakolaki mpo na bibongiseli ya mikolo oyo, na elakeli mabe oyo ezali likolo na bango. Pe makambo ekosalema na nzela ya Lingomba na Ye oyo epakolami solo, pe ekozala na Liloba, Mwasi na libala Liloba. Bisó wana. Yango oyo, lelo, lokola ezalaka ntango wana.

⁹⁸ Biblia elobi: “Likambo nyonso endimama na monoko ya batatoli mibale to misato.” Nalobaki mpo na Balame, nalobaki mpo na Balame pe Mose. Nalobeli pe sikawa mpo na Mikaya

pe Sedekiya. Sikawa nakobakisa moko lisusu. Ezali nde, bazali monkama na monkama, kasi moko lisusu, mpo na kokokisa batatoli misato. Nazali na molongo mobimba ya bato yango ekomami awa; kasi mpo na kobatela ntango.

⁹⁹ Yilimia, oyo atatomaki, aboyamaki, kasi azalaki mosakoli oyo atatomaki na Nzambe. Bayinaki moto yango. Bambaki ye mbuma mo- . . . oyo etela mingi, pe nyonso wana. Pe alakelaki bango mabe. Bongo makambo ye asalaki, pe amilalisaki wana na ngambo moko, pe nyonso, pe apesaki bilembo kotalisa ete Yisalaele azalaki na libunga.

Mosakoli nyonso, mosakoli ya solo oyo atindama na mokili, alakela mabe bibongiseli ya mangomba emibongisa. Ndenge nini yango ekoki kobongwana, na Nzambe oyo abongwanaka te?

¹⁰⁰ Molimo Mosantu azali Mosakoli ya ntango oyo; Ye nde azali kotatola Liloba na Ye, kotalisa Yango polele. Molimo Mosantu azalaki Mosakoli ya ntango na Mose. Molimo Mosantu azalaki Mosakoli ya ntango na Mikaya. Molimo Mosantu, oyo akomaki Liloba, ayaka pe akokisaka Liloba.

¹⁰¹ Bongo likambo nini esalemaki na ntango ya Mikaya? Akaba abomamaki, pe ba-mbwa baletaki makila na ye, kokokana na Liloba ya Nzambe.

Bino balakisi nyonso ya lokuta, Nzambe alobi bongo, mokolo moko bokobuka oyo bozali kolona, bino bakambi bakufi miso ya bakufi miso! Nasiliki te. Nazali kolobela bino Solo. Pe nakokaki koloba yango te, soki awa boye, na esika wana, soki Molimo Mosantu alobaka te ete: “Loba yango ndenge wana.” Nasila koyebisa bino likambo ya lokuta, oyo Nzambe atatóla te ete ezali solo? Bolamuka, bandeko na ngai, liboso ntango esila!

¹⁰² Kasi botika ngai naloba boye. Ndenge nini nzube ekoki kolamuka pe kokoma nsende, ntango ebongísámá liboso kozala bongo? Ndenge nini Baponami bakoki kozanga komona yango? Zambi, baponami mpo bamona yango. “Baoyo nyonso Tata apesi Ngai bakoya epai na Ngai,” elobaki Yesu, “kasi moko te kati na bango akoki koya, soki Ye apesaki Ngai ye te liboso na kozalisama na mokili, ntango bankombo na bango ekomamaki na Buku na Bomoi ya Mwana na Mpate,” kati na buku ya lingomba te, kasi na Buku, Buku ya Bomoi ya Mwana na Mpate.

¹⁰³ Botala, Yilimia atelemaki, atatomaki liboso na bato, ata bayinaki ye.

¹⁰⁴ Na bongo babimaki pe basalaki ekanganeli, asalaki yango, pe atiaki yango na nkingo na ye, pe akendeki liboso ya libota. Balobaki: “Oh, tozali libota monene ya Nzambe. Ee, tozali Yisalaele. Tozali sembo mpenza na eyanganelo na biso! Tokendaka losambo mokolo ya Lomingo nyonso, biso, topesaka mbeka, pe topesaka misolo na biso. Ndenge nini Nabukadanesala akoki bongo kokanga biloko na bulee ya Nzambe?” Ha! Masumu na bino nde esalaki yango.

Nzambe alobaki: “Soki bokobatela malako na Ngai, Nakosala yango te. Kasi soki bokobatela yango te, ekokómela bino.” Ezali mpenza solo. Ezali bobele bongo. Bobatela malako na Ye, Liloba na Ye ya ntango, oyo Ye alakaki.

¹⁰⁵ Sikawa botala. Bongo, Yilimia, na mokano na Nzambe, mosakoli oyo atatolamaki, ata ayinamaki...Bango nyonso bayinamaki na mikolo na bango. Basalaki makambo ya kokamwa mpenza oyo ekesanaki na ebongiseli ya ntango wana, moto nyonso ayinaki ye, ata mikonzi pe bamosusu nyonso. Bongo amitiaki e—ekanganeli na nkingo, pe alobaki: “YANGO ELOBI YAWE. Bokokende kuna mpo na mibu ntuku nsambo,” mpo azalaki na lisosoli ya Liloba na Nzambe. “Mibu ntuku nsambo!”

¹⁰⁶ Na sima Hanania, Hanania, nakanisi otangaka yango, H-a-n-a-n-i-a. Hanania, mosakoli kati na bato, ayaki, alongolaki ekanganeli na nkingo ya Yilimia, pe abukaki yango. Pe alobaki, azalaki moto monene kati na bato, bomoni, na ntango oyo azalaki koloba kokesene na Liloba ya Nzambe. Pe alobaki: “Sima na mibu mibale bakozonga. YANGO ELOBI YAWE.”

Basakoli mibale bapakólami. Bokeseni nini ezalaki kati na bango? Moko azalaki koloba Liloba, pe mosusu azalaki na yango te. Yilimia alobaki: “Amen.”

¹⁰⁷ Liboso na bampaka nyonso pe liyangani, Yisalaele mobimba, bomoni, alingaki kotalisa ete akokaki kozala monene lokola Yilimia. “Oyebi ete balingaka yo te, ata bongo. Boye ngai pe nazali mosakoli. Nazali mosakoli koleka yo, mpo yo ozali kosakola lokuta. Yo olobeli ngai ete libota na Nzambe bakoleka na *likambo boye na boye?*”

Yango nde balobaka lelo, kasi bokozala wana ndenge moko, lokola lingomba. Bolakelami mabe na elakeli mabe. Bino nyonso mangomba, bibongiseli bazali kokangana na mimesano na bango ya bato na esika ya Liloba na Nzambe, bolakelami mabe na Nzambe.

¹⁰⁸ Sikawa botala, ye wana ayei. Hanania alongoli ekanganeli yango na nkingo na ye, elembo ya Nzambe, abuki yango, pe alobi: “YANGO ELOBI YAWE. Bakozonga sima na mibu mibale.” Bobele mpo na komilakisa: “Ngai nde *Songolo*.” Mpo azuaki esika yango, ye azalaki mosakoli ya ebongiseli.

¹⁰⁹ Yilimia azalaki moto ya lisobe oyo azalaki kobika ye moko. Azalaki ntango nyonso kosakola mabe mpo na bango, mpo bazalaki mabe.

Pe moto oyo azalaki koyebisa bango: “Bozali malamu ntango nyonso bozali bato ya. Ntango nyonso oyo bozali Yisalaele, bosengeli bobele na yango. Bomoni, bino, biso...Nzambe akosala bongo te. Nayebi likambo moko ya moke esalemaki awa, kasi bolenga lenga te, bobanga te.”

Ah, ndeko, bazali na bomoi kino lelo. “Bomitungisa te, makambo nyonso ezali malamumu. Makambo nyonso ezali na maboko na biso. Tozali Lingomba.” Bino, bokanisa bongo te. Iyo.

¹¹⁰ Bongo alobaki: “Makambo nyonso ezali malamumu. Bakozonga sima na mibu mibale. Likambo moke esalemaki. Ezali likambo ya sika te. Tozalaka na yango. Nebukadanesala azali koya, kasi Nzambe na biso akobatela oyo nyonso.”

Kasi Liloba elobaki ete bakozala kuna mibu ntuku nsambo; kino libota wana ekolimwa, pe libota mosusu. Mibu ntuku minei ezali libota moko. “Ekozala pene na ntango ya mabota mibale oyo bokozala kuna na boumbu.” Pe Yilimia asakolaki yango kokokana na Liloba na Nzambe.

¹¹¹ Hanania abukaki yango! Yilimia alobaki: “Malamu. Amen. Kasi, Hanania, tomikanisela likambo oyo, biso mibale tozali basakoli. Tozali batei.”

Pe naye bisi yo boye, ndeko na ngai. Tobosana te ete ezalaki na basakoli liboso na biso, pe basakolaki kotelemela bokonzi, pe basakolaki kotelemela makambo mosusu. Kasi, kobosana te, ntango mosakoli azali koloba likambo, asengeli kosakola kokokana na Liloba. Ndakisa Mikaya, pe Mose, pe baoyo mosusu. Esengeli kokokana na Liloba. Soki te, na boye, kanisa makambo nini esalamaka.

¹¹² Na sima, Hanania, nkanda na ye ya sembo emataki. “Ngai nazali Hanania” (na ntembe te), “mosakoli ya Yawe, bongo nalobi, ‘Mibu mibale.’” Na elobeli mosusu: “Oyo Liloba elobi etali ngai te.” Epakweli na ye: “Nalobi, ‘Sima na mibu mibale, bakozonga.’”

¹¹³ Yilimia alongwaki liboso na ye, abimaki pe alobaki: “Yawe, oyo ye alobi etali ngai te, nazali kokoba kondima pe naye bi Liloba elobi bongo. Nakotikala sembo epai na Yo. Nakopengwisama na ye te.”

¹¹⁴ Nzambe alobaki: “Kende koloba na Hanania, ‘Ekanganelo ya sima, Nakosala yango na ebende.’” Pe lokola asalaki yango, alongolamaki na mokili, Hanania, na mobu yango moko wana.

Botala bandakisa na biso, bango mibale basakoli. Makambo mimi lisusu koleka ekoki kolobama pe kolobelana na ntango oyo.

¹¹⁵ Kasi botala malamumu. Yesu alobaki, ete, na ntango ya suka oyo, lisusu, milimo yango mibale ekozala lisusu mpenza pene pene. Ezali ya solo? [Losambo balobi: “Amen.”—N.D.E.] Sikawa botala. Ekozala pene koleka ndenge ezaláká. Oyo nde ntango ya suka. Ah, bana! Nzambe ayokela biso mawa! Kino : “Ekozala mpenza pene na likambo ya solo kino epengwisa ata Baponami mpenza soki nde ekokoka.” Sikawa ekozala ndenge na bino, ndenge nini toyebaki yango na mikolo wana? Ndenge nini

tokoyeba yango lelo? Lolenge moko, botikala na Liloba: “Yesu Klisto motindo moko lobi, lelo, pe libela.”

Sikawa bokeba na Nsango nyonso oyo. Pe ntango bozali koyoka bande, ntango mosusu nakozala lisusu te mokolo moko, ntango Nkolo akosilisa na ngai awa na mokili, bokozongela likambo oyo. Boyoka mongongo na ngai, oyo nazali koyebisa bino. Soki akamati ngai liboso ya Boyei na Ye, bobosana te, nalobeli bino na Nkombo na Nkolo, na nzela ya Liloba ya Nkolo. Iyo.

¹¹⁶ Botala: “Ekozala mpenza pene kino ekopengwisa ata Baponami soki nde bakokoka,” bakosala bilembo ndenge moko, bikamwiseli ndenge moko, na nzela ya Molimo yango moko. Ezali ya solo? [Losambo balobi: “Amen.”—N.D.E.] Bobele ndenge basakoli bazalaki, baoyo touti kolobela bango, basakoli. Sikawa, ekomami pe lisusu. . .

¹¹⁷ Totanga yango, mpo na oyo, soki bolingi, Timote ya Mibale 3. Totika oyo te. Pe nalingi te ko. . .

¹¹⁸ Nazali kotala sáa oyo kuna, pe na—nalingi kotika makambo mingi pembeni, pe nandimi te ete tosengeli kosala yango sikawa. Bomoni? Botala. Bobele. . . Soki natelempi awa, kotoka boye, bomoni, kasi nazali na esengo. Pe nayebi ete ezali solo. Timote ya Mibale 3:8.

¹¹⁹ Polo, moto oyo alobaki: “Soko Mwanje auti na Likolo pe alobeli bino liloba mosusu oyo ekeseni na oyo ngai nalobaki, alakelama mabe,” sikawa, Mwanje moko akitaki. Oyo wana ezali Batesaloniki ya Mibale. . . Ah, bolimbisa ngai.

¹²⁰ Botala na Timote ya Mibale 3:8. Botala malamumu, ezali Polo koloba awa. Tobanda pene na. . . Tobanda na nzela ya liboso, pe boyoka sikawa na bokebi mpenza. Bino baoyo bozali na Biblia na bino, botanga elongo na ngai. Bino baoyo bozali na Biblia te, boyoka na bokebi. Oyo. . .

Kasi ososola likambo oyo ete, na mokolo na suka. . .

Bokata ndelo na nse na yango: “mokolo na suka.” Ntango wana nde ekokokisama.

. . . ntango na mpasi ekoya. (Tozali kati na yango.)

Zambi bato bakozala bamikumisi na bango mpenza, baluki na mosolo, bato na lolendo, bato na ngambo, batuki, bato bazangi kokumisa baboti, bato bazangi matondi, bato bazangi bulee,

¹²¹ Botala bato tozali na bango lelo, bapolá. Ata kati na mibali na balabala, bilenge mibali, bazali kokitisa suki likolo na elongi, ná malénda lokola basi. Libebi! Bato ya Sodoma!

¹²² Botangaki na *Reader’s Digest* ya mobu oyo, ya sanza oyo? Elobaki: “Bato ya Amerika, ya ekeke oyo,” nakanisi ezalaki boye, “katikati na mibú ntuku mibale kino ntuku mibale na mitano,

bazali kokóma lokola mikolo.” Esili na bango wana! Bapoli! Bato ya sciences nde balobi yango, ete mobali azali kokóma mokolo, ná mwasi, ntango bazali na ebandeli ya mibu ntuku mibale. Nzoto na bango epoli koleka pe bamipesi na bomoi ya mbindo.

¹²³ Eh, Amerika, mbala boni Nzambe alingaki kozipa yo na mapapu na ye, kasi sikawa ngonga na yo ekoki! Ozali kokamba mokili na makambo ya mbindo.

...batuki, bato bazangi kokumisa baboti, bato bazangi matondi, bato bazangi bulee,

Bato bazangi bolingo, . . .

Bolingo ya solo ezali lisusu te, ata kati na bato, mobali mpo na mwasi, mwasi mpo na mobali. “Ata bolingo na bato ezali te.” Mbindo, koyebana nzoto!

...bato bazangi boboto, batongi, batomboki, bato na yauli, pe bayini na malamú,

Na elobeli mosusu, toloba: “Bino, etonga ya balekisi ndelo.” Moto moko atunaki mokolo mosusu, mpo na koya awa na losambo. Balobelaki ye: “Kokende kuna te. Nyonso kuna ezali bobele makelele pe yikiyiki.”

Bomoni, “bayini na baoyo.”

Bakosi, bato na nko, bato bavimbi na lolendo, baoyo bakolingaka bisengo na bango mpenza koleka bolingo epai na Nzambe,

Bokoloba: “Ndeko Branham, ezali nde ba-koministe.” Eteni elandi elobi nini?

Bato bazali na lolenge ya kosambela, kasi (nini?) nde bazali kowangana nguya na yango: (Liloba, Yesu Klisto motindo moko, lobi, lelo, pe libela, oyo amonisami, elaka ya mokolo) . . .

Bobele ndenge moko na Hanania, bobele ndenge moko na Sedekiya, bobele ndenge moko na Balame, bongo na bongo, basakoli mosusu ya lokuta.

Bato bazali na lolenge na kosambela, bapokolami . . .

Bomoni?

Bato bazali na lolenge, bapokolami, batei oyo batíndami . . .

Bato bazali na lolenge na kosambela, nde bazali kowangana ete Azali motindo moko lobi, lelo . . . Bazali kowangana Liloba na Ye!

Ndenge nini bawanganaki Yesu na mikolo wana? Bawanganaki Nani ntango bawanganaki Yesu? Liloba. Bazalaki basambeli. Bazalaki koteya na Biblia na bango, kasi bawanganaki Liloba ya mikolo oyo.

Lelo oyo ezali banani? Likambo moko, bapakolami, bazali koteya Nsango Malamu ya pantekote, kasi bazali kowangana elaka ya mikolo oyo, ya Liloba oyo etatolami: “Yesu Klisto motindo moko lobi, lelo, pe libela.” Bomoni yango? [Losambo balobi: “Amen.”—N.D.E.]

Mpo ete bato mosusu bazali kati na bango oyo bakotaka na bandako ya bato, pe bakosaka...basi bazangi mayele, oyo batondi na lisumu, bakambami na mposa ndenge na ndenge,

“Ba-nteke na biso ya kosona bilamba pe makambo na biso *boye-na-boye*.” Moto moko ayei wana, komeka kolimbola Liloba mabe, pe koloba boye: “Ezali malamau, bandeko basi, mpo na bino kozala na suki mikuse. Bolanda makambo ya zoba wana te. Bomoni? Bongo, soki bo—bolati boye; ezali yango te, ‘ezali oyo ebimaka na motema ya moto nde ekomisaka ye mbindo.’” Bomoni? Pe boyebi ete bopakolami na molimo mabe, ya bilulela, ya mbindo? Etali ngai te, bokoki koyemba na korále, na suki mikuse, kasi bozali na molimo mabe. Yango ekeseni na Liloba. Ezali solo. Yango nde Biblia elobi. Pe bokoloba: “Ee, nalataka bakupe. Esalaka ngai mabe te.”

“Ezala nani, soki mwasi alati elamba ya mobali, ezali mbindo na miso na Nzambe.” Nzambe oyo abongwanaka te nde alobi yango.

¹²⁴ Oh, ebele ya makambo boye, tokosilisa yango lolenge nini; ekosilisa ntango na biso nyonso. Kasi bozali na boyebi ekoki mpo na kososola solo pe lokuta. Ndenge nini nakoki kosunga bango na yango? Pe nakosala ndenge nini? Bokoloba: “Ee, mpo na nini ozali koganga?” Nazali motatoli kotelemela bino. Mokolo moko, na Mokolo ya Kosambisama, bokozua esika ya komibomba te.

¹²⁵ Ndenge nini Mikaya akokaki kopekisa yango? Ndenge nini Mose; agangaki, amekaki kopekisa yango, pe Yoshua pe bamosusu bakendeki mbangu kati na bato, ata Lewi abimisaki mopanga na ye mpo na koboma bango? Bakobaki bobele kokoba bongo.

Esakolamaki ete bakosala yango. Pe bakosala yango, mpo ezali YANGO ELOBI NKOLO bakosala yango. Bokanisi makambo nyonso wana ekoningisa bibongiseli na bango mpo bazonga na Liloba? Ezali YANGO ELOBI NKOLO, bakosala yango te! Bakolanda nde motelemeli na Klisto? Bongo. Ezali YANGO ELOBI NKOLO, bakolanda ye! “Boye mpo na nini ozali kolobela yango?” Nasengeli kozala motatoli, bino pe lokola, bandimi nyonso. Botala malamau.

...basi bazangi mayele, baoyo batondi na...mposa ndenge na ndenge,

¹²⁶ “Ee, basi mosusu nyonso basalaka yango.” Basakoli ya lokuta! Sikawa boyoka. Nazali kolobela basakoli ya lokuta. Sikawa, eloko nini bakosala na mikolo ya suka?

*. . . bakokosa basi bazangi mayele . . . oyo bakambami
na mposa ndenge na ndenge,*

“Ee, nayebi ete basi mosusu nyonso . . .” Malamu, bokende liboso.

¹²⁷ Nalobaki nini liboso likambo monene oyo esalema awa na Californie? “Bino bato bozali awa na Los Angeles, mobu nyonso ntango nazongaka awa, ezalaka na basi bakata suki pe mibali lokola basi ebele koleka ndenge bazalaki liboso, batei mingi koleka bazali kokota na bibongiseli. Bokolimbisama te! Soki misala na nguya misalamaki kati na bino, esalemaki na Sodoma pe Gomola, bakokaki kozala naino kino lelo oyo. Eh, Kapalanauma, yo oyo omipesi nkombo ya banje, Los Angeles!” Bomoni likambo ekosalema? Ekozinda kino na nse na mai-ya-mbu. Ntango nini? Nayebi te ntango nini ekosalema, kasi ekosalema. Bino bilenge, soki namoni yango na eleko na ngai te, bino bosenzela. Esili mpo na ye!

*Baoyo bandimi koyekola, . . . nde bakoki kokóma ata
na boyebi na makambo na solo te.*

Sikawa, likambo ya mpasi yango, oyo nde eteni ezali kopesa mpasi. Boyoka yango.

*Lokola Yane pe Yambele batemelaki Mose, bongo
baoyo bazali koboya makambo na solo; bato na makanisi
mapoli, pe bapengwi mpo na kondima oyo epesamelaki
babulami mbala moko mpo na libela, ya solo mpenza.*

“Mpo na Kondima.” “Pe akozongisa Kondima ya batata, to ya bana, epai na batata.”

¹²⁸ “Bapengwi mpo na Kondima.” Ha! Boyebi nini *bapengwi* elingi koloba? Soki bozali na Biblia Scofield, “h” moko ezali wana. Bobele likolo wana, elobi, “botomboki.” Botomboki, ezali nde yango.

¹²⁹ Sikawa, bozela miniti moke. Nalingi kotala likambo moko awa. Nakanisi nakomaki yango malamumu. Nayebi mpenza te, kasi nalingi koloba yango, pe natala yango malamumu liboso na—naloba yango. Sikawa, bozela miniti moke. [Eteni oyo ezangi maloba na bande—N.D.E.] “Bapengwi mpo na Solo, mpo na Kondima.” “Kondima,” Ezali bobele na Kondima moko. Ezali solo. “Mpo na Kondima, bapengwi!”

Sikawa nalingi kotanga Luka 18. Bozela miniti moke. Te bo . . . Bokoki kokoma yango; bosengeli kotanga yango te.

*Alobaki na bango lisele moko na ntina ete ekoki na
bango kobondela ntango nyonso pe . . . kolemba te.*

*Alobaki—alobaki ete, Mosambisi azalaki na mboka
moko, oyo abangaki Nzambe te pe akanisaka moto te.*

*Nde na mboka yango moko, mwasi oyo akufeli mobali
azalaki, pe ayaki epai na ye pe alobi ete, Longisa ngai
na ntina na moyini na ngai.*

Na liboso—na liboso aboi, nde na nsima alobi na motema na ye ete, Ata nabangi Nzambe te pe nakanisi moto te,

Nde mpo ete mwasi oyo atungisi ngai, nakolongisa ye ete alembisa ngai na koya. . . boye te.

Nkolo alobaki ete, Yoka yango elobi mosambisi mabe.

Nzambe akolongisa baponami na Ye. . . te, baoyo bazali kobianga Ye moi na butu epai na ye, pe baoyo azali koyoka bango na motema molai?

Nalobi na bino ete akolongisa bango nokinoki. Kasi wana ekoya Mwana na moto, akokuta kondima awa na nse?

¹³⁰ Bongo motuna yango wana. Botala epai nalingaki kokóma, na Emoniseli 10. Tokokoma na yango sima na ntango moke, pe eteni mosusu ya Makomi. Alobaki: “Na mikolo ya Nsango ya mwanje na nsambo, libombami na Nzambe ekosila.” Motuna yango oyo, ezali, soki bolandi molongo ya likanisi yango na ntango oyo, yango ekosilisama? “Nakokuta Kondima?” Malaki 4 ekokokisama na ntango oyo: “Kozongisa Kondima ya bana, na Kondima ya batata, ya ebandeli, Liloba”? Bomoni?

¹³¹ “Bapengwi, Yambele pe Yane lokola batemelaki.” Sikawa, lisusu, boyoka, Timote ya Mibale 3:8. “Lokola Yan- . . . batemelaki Mose, ndenge moko pe na mikolo na suka, bapengwi yango moko bakoya,” sikawa botala esika Elobi awa: “bato bazali na lolenge ya kosambela”, bapakolami. Sikawa, naino, to. . . Bozongela pe—pe kotanga yango ntango bokokóma na ndako, mpo nakoka kosilisa likambo oyo, na ntongo oyo, soki ekokoka. “Bapengwi mpo na. . .” Bapengwi te na—na lolenge ya kobika; bazali bato malamau, bato ya mayele.

¹³² Sikawa, botala, ntango Mose akitaki na Ezipito, na nsango ya YANGO ELOBI YAWÉ, pe atatolamaki; abengaki Yisalaele, oyo ezalaki libota, kasi lingomba te. Yisalaele ezalaki libota; bazalaki lingomba soko moke te. Zambé, liloba oyo *lingomba* elingi koloba “baoyo babengami libanda na.” Bazalaki libota na Nzambe. Na sima, ntango bapakólamaki na Liloba, pe babengamaki libanda na, bakómaki lingomba na Nzambe. Na sima, bazongaki sima, mpo bandimaki Liloba na Nzambe te, pe bayokaki mosakoli ya lokuta. Nandimi ete ezali kokota na bozindo.

Yisalaele, lokola libota na Nzambe, babimaki na nse na loboko ya Nzambe, bapakólamaki na Liloba. . . na Nguya ya Nzambe, bamonaki bilembo pe bikamwiseli ya Nzambe. Pe na sima, ntango Nzambe azalaki kotambola elongo na bango, mosakoli moko ya lokuta ayaki, mopakolami, pe ateyaki likambo moko ekesanaki na Liloba na Nzambe ya ebandeli, oyo bayokáká; pe bango nyonso bakufaki na biliki, longola bato misato. Sikawa, bosimba yango.

¹³³ “Pelamoko na mikolo na Nowa, epai wapi bato mwambe babikisamaki na mai, ekozala pe bongo na boyei ya Mwana na moto.” “Pelamoko na mikolo na Lota, ntango bato misato babimaki na Sodoma, ekozala pe bongo, na mikolo Mwana na moto akomonisama.” Nazali kotanga bobele Makomi, Liloba ya Nkolo, ete: “Likolo pe nse ekoleka . . .” Ekozala bato moke!

¹³⁴ Botala awa. Mose akendeki epai na Alona. Mose asengelaki kozala Nzambe. Nzambe alobaki na ye akozala Nzambe, alobaki: “Yo okozala Nzambe, pe ndeko na yo Alona akozala mosakoli na yo. Okotia maloba na monoko na ye soki oyebi koloba malamumu te.” Alobaki: “Nani azalisaki moto emimi? Nani azalisaki moto koloba?” Ezali Nkolo.

Pe akendeki kuna. Eloko nini asalaki? Asalaki likamwisi moko ya solo pe ya sembo oyo Nzambe atindaki ye kosala. Nzambe alobelaki ye: “Kende kobwaka lingenda na yo na nse.” Alokotaki yango, pe ekómaki nyoka. Alokotaki yango, pe ezongaki lingenda. Alobaki: “Kende kosala yango liboso na Falo, pe loba, ‘YANGO ELOBI YAWE.’”

¹³⁵ Pe ntango Falo amonaki yango, tolobaka: “Ee, oyo kisoloka moko ya mpamba.” Alobaki: “Ezali na ntina te. Ezali botangi makanisi to likambo mosusu, boyebi. Tozali na bato na ebongiseli na biso, oyo bakoki kosala likambo yango moko. ‘Yaka awa, Eveke *Songolo*. Yo, pe, yaka awa.’ Tozali na bato bakoki kosala likambo moko wana.” Ezalaki Satana nde azalaki koloba na nzela ya Falo.

Ezalaki Nzambe nde azalaki koloba na nzela ya Mose.

¹³⁶ Kasi botala bato yango kobima. Yane pe Yambele babimaki liboso na Mose, pe polele liboso na bato, pe basalaki bikamwiseli nyonso Mose akokaki kosala. “Bakopengwisa ata Baponami mpenza soko nde bakokoka.” Ezali solo? Basalaki likambo moko oyo Mose asalaki. Bososoli yango? Sikawa, bobosana te, ezali YANGO ELOBI MAKOMI, ete ekosalema lisusu na mikolo ya suka.

Bokeseni nini ezalaki kati na Mose pe Yambele?

Mose alobaki: “Tika makila ezala kati na mai.”

Pe basakoli ya lokuta oyo balobaki: “Solo, biso pe tokotia mai na makila.” Pe esalemaki.

¹³⁷ Bongo Mose alobaki: “Tika ba-sili baya.” Azalaki kozua yango wapi? Mbala moko uta na Nzambe. Bomoni?

Pe asalaki nini? Alobaki: “Ee, ya solo, tokoki pe koyeisa ba-sili.” Pe basalaki yango. Bikamwiseli nyonso Mose akokaki kosala, bango pe lokola!

Bobosana te, bosimba yango na makanisi, tolingi kokóma na yango, sima na ntango moke. Bakoki kosala nyonso baoyo mosusu bakoki kosala, kasi bakoki kotikala na Liloba te. Bakoki kotikala na Liloba te.

¹³⁸ Sikawa botala, basalaki yango. Kasi Mose, mosakoli ya solo oyo atindamaki na Nzambe, oyo apesamaki lotomo na Nzambe, awelanaki na bango soko moke te, alobaki: “Tala, bokoki kosala yango te! Bokokoka te!” Atikaki bango basala, atikaki bango bakoba. Bazali basakoli ya bibongiseli, kasi bakende liboso.

Mose akobaki nzela na ye, ayokaki Nzambe. Nyonso Nzambe alobaki: “Sikawa sala *boye*,” Mose azalaki kosala yango. Asalaki likambo ya sika. Ntango basalaki yango, moko na moko na bango balengaki to eloko moko, bango wana bayaki. Basalaki pe bongo, bobele ndenge Mose asalaki.

¹³⁹ Sikawa botala. Bato yango bamonanaki. . . Oh, baninga, bozanga likambo oyo te! Bakosi oyo, bamekoli, bamimonisaki sima na likambo ya solo kosalema liboso. Bomoni? Bayaki mpo na komekola. Bomoni, bakosala se bongo. Zabolo akoki kokela eloko moko te; ye azali nde mobebisi ya biloko ya ebandeli.

Pe lisumu ezali nini? Ezali boyengebeni oyo ebebisami. Ekobo ezali nini? Likambo ya sembo ebebisami. Lokuta ezali nini? Solo oyo etalisami mabe. Kobebisama!

Botala Hanania, kobebisama ya Liloba ya ebandeli. Botala Balame, kobebisama ya Liloba ya ebandeli. Botala Sedekiya, kobebisama ya Liloba ya ebandeli.

Pe Biblia elobaki ete bato yango bakoya, sima mobebisi. . . to mpo na kobebisa Liloba ya ebandeli oyo etatolami pe etalisami polele ete ezali Solo.

¹⁴⁰ “Sala mosala na mopalanganisi nsango malamumu,” na suka ya nzela, “sala mosala na yo na mobimba. Mpo ntango ekoya oyo bato bakolinga koyoka Mateya ya solo te, kasi bakolanda bamposa na bango moko, pe bakoluka balakisi ebele, mpo bateya bango bobele makambo balingi koyoka, pe, basala makambo balingi, pe, ‘Ezali malamumu, tozali na bilembo yango pe bikamwiseli yango moko.’ Bakoboya koyoka makambo na Solo, bakotia matoi koyoka masese, bindimeli.”

¹⁴¹ Oh, likebisi ya Molimo Mosantu, kobanga ya limemia ekotaka na molimo ya moto ntango ateleme mpo akanisa lolenge makambo ekómi solo pe polele liboso na biso! Bokundola libanga ya suka awa libanda pe botanga eteni ya lokasa etiamaki kuna na kati, eleki mibu ntuku misato na misato. Botala nini Alobaki kuna na—na Balabala ya Nsambo, na ntongo yango ntongo ntongo libanga ya suka etiamaki. Sikawa botala yango malamumu. Botala malamumu, na ebale awa, ntango Mwanje na Nkolo akitaki na lolenge ya Likonzi na Móto, mangomba nkama na nkama, to bato ya mangomba, bazalaki wana pembeni na libongo; likambo Ye alobaki, botala soki ekokisama te. Botala likambo esalamaki.

Ezali mpenza makasi. Nayebi ete ezali komonana makasi, bandeko, kuna na libanda. Kasi ezali. . . Biblia elobaki, Yesu Ye moko alobaki: “Ekopengwisa ata Baponami, soko nde ekokoka.” Nzela ya kokima yango ezali te. Bakozala na makoki ya komona

Yango soko moke te. Soko nde ekokoka, Baponami mpenza bakopengwisama na yango.

¹⁴² Botala, bato oyo bayaki sima na mopakolami ya solo ya Nzambe kotindama; mosakoli na Ye ya solo, Mose. Pe ntango Mose azalaki kosala likambo moko, bango bazalaki komekola yango.

¹⁴³ Sikawa, ndeko mobali, ndeko mwasi, ngai...Oyo ezali losambo na ngai moko. Nazali na makoki ya koteya makambo ngai nalingi, ntango yango ezali kati na Liloba na Nzambe. Pe nazali kokweyisa bino te, kasi totala yango malamumu kokokana na eleko pe na ntango tozali kobika sikawa.

Mbote na Ndeko Ruddell, na Junior Jackon, pe na baoyo bazali kuna libanda, mangomba ya bondeko na biso. Nabosanaki bango, eleki ntango moke. Nakanisi bazali pe kolanda biso na ntongo ya lelo, na nzela ya singa, mpo esika—esika ya kofanda ezali te kati na losambo.

¹⁴⁴ Bongo, bokanisa naino likambo yango, mpo na ntango moke. Basalaki bikamwiseli moko Mose asalaki. Mose abimisaki basili; bamekolaki yango pe babimisaki ba-sili. Bomoni?

Nzambe alobaki: “Zambi mokolo bokolia yango, mokolo yango bokokufa solo.”

¹⁴⁵ Satana abelemaki pe alobaki: “Solo mpenza, bino bokokufa te. Bokokóma nde na bwanya koleka. Bokoza ebongiseli malamumu koleka, eleki malamumu...” Boyebi. “Boyebi, makambo nyonso ekozala malamumu koleka mpo na bino, bokozala na Pole koleka.” Bomoni, bobele kobebisa. Esengelaki...

Pe bomikanisela, YANGO ELOBI NKOLO, kokokana na Timote ya Mibale 3:18, ete: “Na mikolo ya suka, Yamebele pe Yane bakozala na mokili.” Sikawa, nalingi boyeba ete bazali bango mibale, bomoni, bamekoli.

¹⁴⁶ Sikawa tokozonga na Sodoma, sima na ntango moke, bango misato, komona Banje yango misato oyo bakitaki, pe komona komekola, pe bongo na bongo, bomoni, kososola wapi solo ezali pe wapi libunga ezali. Bomoni? Bomoni?

¹⁴⁷ Botala, basalaki bikamwiseli moko wana. Kasi, botala, bamekolaki, sima na Liloba ya solo kopakolama, na nzela ya moto ya solo oyo Nzambe atindaki; balandaki, esika ya mibale.

Nazali komituna soki tokoki kokanisa miniti moke. Ezalaki ngai kosimba bato na loboko, eumeli mingi te, pene na mibu ntuku mibale, elembo moko ezalaki komonana. Moninga, bilembo koleka ebandaki kobima, awa pe kuna, pe moto nyonso...Moko azali na yango na loboko na ye ya mobali; mosusu azalaki na yango na loboko na ye ya mwasi; oyo mosusu azali koyoka yango na nsolo. Bomoni, lolenge nyonso ya...Pe nazali komituna...Nzambe akoboya nde kopesa ngai nzela ya koyebisa bino, na ntango oyo, makambo oyo ezalaki

mpenza solo, kasi mokolo moko bokomona yango. Ezalaki bobele mpo na komonisa bolema na bango polele. Ezalaki malamumu te, na ebandeli. Nakoyebisa bino, mokolo moko, soki Nkolo apesi nzela.

¹⁴⁸ Botala, basalaki bikamwiseli yango moko, kasi bango te. . . Botala, basalaki yango te bobele sima Liloba ya ebandeli emonisama, liboso. Yango ezali lolenge Satana asalaki na elanga na Edene. Yango nde lolenge asalaka ntango nyonso. Nani asakolaki liboso? Mose. Nani akotaki na mosala liboso, Mose to Balame? Mose. Nani akokati na mosala liboso, Yilimiya to Hanania? Bomoni likambo nalingi koloba? [Losambo balobi: "Amen."—N.D.E.]

¹⁴⁹ Botala, bamekolaki. Bamekoli ya mosuni, bazalaki sembo, kokanisa ete bazalaki "kosalela Nzambe mosala," lokola Dawidi asalaki, na mposo eleki, ezali komekola ya mosuni. Nazali kozela miniti moke. Nalingi bokanisa na bisika wana. Soki nalobi yango te, ya solo Molimo Mosantu akomonisa yango, mingi mpenza mpo na Baponami. Bomoni?

¹⁵⁰ Ebongiseli ya Falo elobaki: "Tozali na bato oyo bakoki kosala likambo moko wana," pe basalaki yango. Bomoni? Mpo na nini Falo asalaki boye? Mpo na nini Nzambe apesaki yango nzela? Mpo na nini Nzambe atindaki mosakoli ya solo, oyo apakólami kuna, komonisa elembo liboso na Falo, pe na sima kotika bomekoli ya mangomba koya wana mpo etalisama liboso na bato? Mpo na nini Atikaki momekoli moko kobima mpo na kosala yango, pe kosala likambo moko wana Molimo na Nzambe ya solo asalaki? Bomoni, Makomi esengeli kokokisama.

¹⁵¹ Botala, Asalaki yango mpo ete Ayeisa motema ya Falo pe bato na Ezipito makasi, mpo na kotalisa polele ete bobele Mose nde azalaki na Liloba te. Bakokaki kosala makambo nyonso bobele ndenge Mose akokaki kosala.

Pe mpo na nini Nzambe atiki likambo yango kosalema na mikolo na suka? Bongo, likambo wana ndenge molimo ya lokuta elobaki na Sedekiya: "Tokosala ndenge nini mpo Akaba akende kuna, mpo makambo oyo ekokisama?" Akosala ndenge nini mpo na komema bato oyo batalelaka mangomba na bango, kobima na yango mpo likambo oyo ekokisama, likambo Ye asakolaki? Bango, na Eleko oyo ya Lingomba na Laodikia: "Mpo olobaka ete yo 'mozui, pe nazali na bosenga na eloko te. Nafandi lokola mwasi-mokonzi.' Ozali na eloko moko te! Oyebi te ete yo moto na mawa, moto na bolozi, na miso makufi? Pe napesi yo toli ete oya kosomba na maboko na Ngai," Alobi: "mafuta na wolo." Mpo na nini Asalaki yango?

¹⁵² Mpo na nini Atikaki ete bomekoli oyo koya na mikolo ya suka oyo, wana makambo oyo ezali kokokisama na nzela ya Liloba ya solo ya Nzambe; pe Atiki bamekoli koya pe kosala likambo yango moko, pe kowangana Liloba ya solo ya Nzambe? Asalaki yango

mpo na Mose. Pe Falo asalaki yango mpo na kotelemela Mose; pe bango: Yane pe Yambele, basalaki yango mpo na kotelemela Mose. Pe Biblia elobi ete ekosalema lisusu na mikolo ya suka. Biso oyo. Sikawa, soki ezali kokokisama ya Makomi te, bongo ezali wapi?

¹⁵³ Mose awelanaki nde na bango mpo na koloba: “Tala! Tala! Bokoki kosala yango te. Ngai moko nde naponamaki mpo na kosala yango. Tala! Botika yango, kaka sikawa?” Atikaki bango bakoba.

Botika bango bakoba. Bomikanisela, Biblia elobi: “Pelamoko bolema na bango emonisamaki, bolema na baoyo ya ntango na suka pe ekomonisama,” ntango Mwasi na libala akonetolama pe akokamatama na likolo. Botala.

¹⁵⁴ Mose, Liloba ya solo oyo emonisamaki, alobaki ata likambo moko te, atikaki yango kokoba. Kasi Asalaki yango mpo Akoka koyeisa motema ya Falo makasi, mpo na kopengwisa Falo.

Asalaki likambo yango moko mpo Akoka kopengwisa Akaba. Pe moto yango moke, etelemaki ye wana ye moko, Mikaya moke, alobelaki bango: “YANGO ELOBI YAWE.” Mosusu atelemaki awa, mopakolami: “YANGO ELOBI YAWE.” Pe bakesanaki, moko na mosusu.

¹⁵⁵ Totelemi lelo na YANGO ELOBI NKOLO, koloba ete libatisi na mai na mikolo na suka esengeli kozala na Nkombo na Yesu Klisto. Pe moto mosusu ateleme pe asali bikamwiseli, pe, azali mo-bosato bosantu.

Botalisa ngai liloba oyo *bosato bosantu* kati na Biblia. Botalisa ngai wapi ezali na ba-Nzambe misato. Bolakisa ngai wapi makambo ya motindo wana ezali. Ezali kati ya Liloba na Nzambe te. Likambo lokola kobatisa bato na nkombo ya “Tata, Mwana, Molimo Mosantu,” na bibiangelo wana, ezali te. Makambo oyo nyonso: “Oh, ezali malamumu, bandeko basi. Ezali malamumu, kozala na suki mila . . . suki na yo mikuse. Ezali malamumu, bosengeli na bino te kosala *boye na boye*, to *boye*. Oh, wana ezali bolema, makambo ya mpamba ya kala.”

Kasi Biblia elobaki! Pe Alakaki: “Na mikolo ya suka, Akotinda Molimo ya Eliya, pe Akobenga bato, bana na Nzambe, bazonga na Kondima ya ebandeli, ya Liloba, ndenge ezalaki na ebandeli.” Liloba yango endimisamaki, Mwana na moto na mikolo ya suka, kaka ndenge ezalaki na Sodoma; lobi, lelo, pe libela. Alakaki ete akosala yango. Ezali elaka ya Nzambe. Ezali YANGO ELOBI NKOLO.

¹⁵⁶ Botala, basalaki likambo moko, bobele ndenge Mose asalaki, kino Nzambe alembaki yango.

Sikawa bomikanisela, ezali YANGO ELOBI NKOLO, ekosalema na eleko oyo. Sikawa, botala malamumu na mokili mobimba; bokamata eyamba nyonso, bokamata ekolo nyonso,

bokamata moto nyonso, bokamata lingomba nyonso! Napesi bino mokumba, na Nkombo na Klisto, ya kosala yango, bino batei. Napesi bino mokumba ya kotanga bazulunale to kotala malamumu bisika nyonso bolingi kokende, pe komona soki ezali na mokili sika sikawa te. Bomoni?

Pe lisusu, Matai 24:24 ezali mpenza solo. “Bapakolami, ya lokuta, bakotelema na mikolo ya suka, pe bakozala basakoli ya lokuta, pe bakopengwisa bato ebele.” Botala yango malamumu sikawa na bililingi, ndenge ezali komonana sikawa, bomoni: “Bakopengwisa bato ebele.” “Basakoli,” na boike; “ba-Klisto,” baoyo bapakólami, na boike; ebele ya ndenge na ndenge, ba-Metodiste, bomoni, pe ba-Batiste, pe ba-Pantekotiste, pe bongo na bongo. Bomoni?

Kasi ezali bobele na Klisto moko ya solo mpenza, Molimo, pe ezali Liloba oyo elati nzoto ndenge Alakaki kosala yango.

Sikawa, tokokende moke mosika, na Makomi mosusu.

¹⁵⁷ Kino, Nzambe alembaki likambo yango, na bongo esilaki. Bolema na bango emonisamaki.

¹⁵⁸ Botala. Bomikanisela, mposo emónànàka mpenza lokola mbuma na lisangu. Bomoni? Bongo, okokaki te koloba, kuna na eleko ya Luther, “ete lititi ezalaki lisangu,” ata ezalaki na Bomoi kati na yango. Lititi ezali malamumu, Bomoi kati ya lititi ezalaki malamumu, kasi, bomikanisela, Bomoi ekobaki kotambola; elongwaki na Elisa kino na Eliya. Bomoi ekobaki kokende liboso. Kasi, bomikanisela, ekómi na etape mosusu. Ekoki kotikalana na etape wana te. Tokoki kolia mosuni ya kopola ya eleko mosusu te. Tokoki kolia mosuni ya kopola ya ba-Pantekotiste te, ya ba-Metodiste te, to ya ba-Batiste te. Bomoni, ekómi ya kopola. Tozali na Bilei ya mobesu, Liloba ya ntango oyo, pe bongo na bongo.

¹⁵⁹ Bomikanisela, mposo ezali mpenza lokola mbuma na lisangu. Okoki te. . . Ekokanaki na yango te na kotoya na yango, ekokanaki na yango te na felele, kasi ekokanaki mpenza na mposo. Ekokanaki te na. . . Yesu Klisto motindo moko lobi, na ntango ya Luther; ekokanaki te na yango na ntango ya Wesley; kasi ekokani mpenza na ntango ya Pantekote, “kopengwisa Baponami mpenza soko nde ekokoka.” Bomoni? Bileko na bino yango wana.

¹⁶⁰ Kasi bomikanisela, lingomba yango ya ba-Pantekotiste, na mikolo ya suka, ezalaki Laodikiya; pe Klisto atiamaki libanda, Ye Ndika, Lisangu, Yango moko. Ntango Amekaki. . . Bomikanisela, ntango Amekaki komimonisa Ye Moko kati na lingomba, Abwakamaki libanda. Ezalaki kaka lingomba, oyo ezali komibenga; oyo epakolami.

Kasi *botala* Liloba, Klisto Ye moko, yango nde Liloba epakólami oyo ekoya mpo na eteni ya Nzoto na Ye : Mwasi na libala. Bapakolami, ya mai moko oyo emelaki lisangu, ndenge

tolobelaki yango, ezali pe komelisa matiti mabe, bapakolami. Bobele Baponami, to baoyo babongísámá liboso, nde bakozala na makoki ya kokesenisa bango mibale. Sikawa, Baefese 5:1 elobeli bino bongo, pe elobi ndenge ezalaki.

¹⁶¹ Bazali bapakolami. Bato nyonso bazali koloba: “Nkembo na Nzambe! Tozui bonsomi awa. Aleluya! Biso. . . Ah, aleluya! Tolobaka minoko na sika, pe topimbwaka. Tozali na bonsomi ya basi; kasi bino bozali kotia bango na nse na boumbu ya makambo ndenge na ndenge.” Bomoni? Bokende liboso. Eloko ya kosala mpo na bino ezali te. Bokoloba: “Ee, tolobaka minoko na sika. Togángaka. Tobinaka na Molimo. Toteyaka Liloba.” Ya solo mpenza. Likambo ya kotelemela yango ezali te. Bato oyo awa na Biblia basalaki pe bongo.

Yesu alobaki: “Ekopengwisa ata Baponami mpenza soko nde ekokoka, Baponami mpenza.”

¹⁶² Sikawa, botala mposo. Kobanda na Mbuma ya ebandeli, Mbuma oyo ekotaki na mabele, Ezalaki ebongiseli te. Ezalaki Mbuma moko, Yango moko. Kasi ntango ebimaki, ezalaki Mbuma moko te; ezalaki ebongiseli, bomoni, nkasa, lisangu.

Na sima Elekaki na etape mosusu, oyo ezalaki felele. Kasi ezalaki lokola na ebandeli te. Ezalaki ebongiseli.

Elekaki kino na mposo, ebele ya nkasa, Pantekote, pene na lolenge yango sikawa. Botala yango. Ezali kozua lolenge ntango nyonso, pene na kokokana na yango, ekokani mpenza na Mbuma ya lisangu soki omoni mposo yango kuna.

Kasi na suka Emonisami, ezali ebongiseli te. Ezali lisusu na bamemi te. Ebongiseli ezali bobele momemi. Bamemi lisusu te; nzete esengeli kokufa, mposo esengeli kokufa, biloko mosusu nyonso esengeli kokufa, kasi lisangu ekokoba kobika. Yango nde nzoto ya lisekwa, ekoya pe ekokamata bango. “Bango bazali na suka bakozala liboso, pe baoyo bazali liboso bakozala na suka.” Bomoni, akokamata bango kati na lisekwa. Bozali kolanda yango? [Losambo balobi: “Amen.”—N.D.E.] Malamu. Botala, mbuma ezali. . .

¹⁶³ Mposo emonanaka mpenza lokola mbuma. Pe moto oyo asalaka bilanga ya masangu, to eloko mosusu, akotala pe akoloba: “Nzambe asanzolama, nazali na elanga ya masangu,” kasi azali naino na mbuma ya lisangu ata moko te. Ezali komonana mpenza lokola masangu, kasi ezali mposo.

¹⁶⁴ Sikawa, baninga na ngai, bozonga sima elongo na ngai. Kolamuka ya liboso esalemaki wapi, sima na (liwa) mikolo mbuma ya lisangu kokweya na mabele, Nzoto, Mwasi na libala ya Klisto? Klisto abongisaki Mwasi na Ye ya libala, Lingomba na Ye, ezali bongo? Abongisa Yango soko moke te; Atiaki bobele bantoma, pe basakoli, pe bongo na bongo, kati na Lingomba, mpo babatela Yango peto. Kasi na Nicée, na Roma, sima na mibu nkama misato na motoba, babongisaki yango pe bakómisaki

yango ebongiseli. Ezali ya solo? Pe ekufaki. Nyonso oyo eboyaki koyokana na lingomba yango ezalaki kobomama. Pe etikalaki bongo na mabele, mibu nkama na nkama.

Kasi, sima na ntango moke, yango etelemaki na ntango ya Luther. Lokasa ya liboso ya lisangu ebimaki. Ya mibale, etoyaki kobanda wana. Bakobaki kokende, bazalaki na Zwingli pe bongo na bongo, pe bibongiseli mosusu pe bongo na bongo. Bongo, sima na ntango moke, Ba-Angilikani bayaki.

Pe na sima eloko nini esalemaki? Tala Wesley ayaki na kolamuka ya sika, felele, oyo ekokani mingi moke na Lisangu. Na sima eloko nini ekómelaki yango? Emibongisaki, ekaukaki pe ekufaki.

Bomoi ekobaki kino na mposo, pe mposo ebimaki, pene na kobonga be mpenza lokola Lisangu. Kasi, na suka, bolema na yango emonisamaki na mibu mwambe to zomi oyo ya suka, koleka mpenza na mibu misato oyo ya suka. Sikawa ezali kosala nini? Ezali kokabwana na Lisangu.

¹⁶⁵ Sikawa, mpo na nini ebongiseli moko te ebimi kati na mibu ntuku mibale ya suka na kolamuka monene oyo; bazali basakoli bapakólami, balakisi bapakólami, bongo na bongo, kasi mpo na nini ezali te? Sima na Mbuma eloko mosusu ezali te. Bomoni, Ezongi lisusu, kozanga ebongiseli. Hólálá, mokufi miso akoki komona yango. Ekoki komibongisa te; Etelemeli likambo yango na makasi. Ezali mbuma ya Lisangu, Yango moko. Mwana na moto akomonisama. Mbuma ya Lisangu ekozonga lisusu na Yango moko, Mwana na moto na mikolo ya suka.

“Pe bomekoli na Yango, ya lokuta, ekoya na mikolo ya suka, oyo ekopengwisa ata Baponami, soko ekokoka.” Botala bamposo na bango ya bibongiseli ndenge ezali kolongwa sikawa.

¹⁶⁶ Ezali kotika Lisangu koyebana, mpo na Baponami, oyo bazali eteni na Yango. Botala sikawa ndenge etalisami malamu awa. Bobele ba... Botala, bapakolami bakokoka; Baponami ya solo, oyo babongisámá liboso, Baefese 5:1, to 1:5, nde, baktindama, bakoponama. Ezali bobele bango nde bakopengwisama te.

Botala, basakoli bapakólami bakozala ya lokuta, pe kuna kati na bango, bapakolami ya solo bakozala. Bokokesenisa bango ndenge nini? Na Liloba. Ndenge tomonaki yango na bililingi. Bomoni yango? Boloba: “Amen.” [Losambo balobi: “Amen.”—N.D.E.] Bomoni?

¹⁶⁷ Botala, bapakolami, bobele Liloba nde ekokesenisa bango, bilembo te. Oh, te. Bakosala bilembo ndenge moko, kasi Liloba nde ekokesenisa bango. Ya solo. Bango nyonso basakolaki. Bango nyonso basalaki *boye* na *boye*, pe *boye*, ya solo, ndenge moko. Yesu alobaki bakosala likambo yango moko. Kasi Liloba nde ekesenisaki bango, botala, bilembo te.

¹⁶⁸ Bomonaki? Yesu alobaki awa, na Matai 24. Alobaki te, “Ba-Yesu ya lokuta bakobima na mikolo ya suka.” Oh, te, bakondima yango ata moke te. Te. Bokamata Pantekotiste oyo azali mpenza Pantekotiste, koloba, ye moko, ete azali “Yesu”? Bomoni? Bokamata Metodiste ya lokuta, to Batiste, to moto moko boye, to moko na bibongiseli, koloba: “Tozali Ba-Yesu”? Bayebi malamumu koleka wana. Bakosala yango te. Kasi Biblia elobaki bakozala “Ba-Klisto ya lokuta”, Ba-Yesu te, kasi, “Ba-Klisto ya lokuta.” Bakondima te koloba: “Ngai nazali Yesu.” Ah, te.

¹⁶⁹ Kasi bazali “Ba-Klisto ya lokuta,” pe bayebi yango te, mpo bazali na bokeseni na Liloba. Pe Nzambe akotatola ndenge moko. Sikawa, nakomema likambo yango mpo na kosukisa ntembe sikawa, zambi bino bomonaki makambo yango moko kosalema na bato oyo ndenge esalamaki kati na solo. Pe Yesu alobaki bongo.

¹⁷⁰ Sikawa, ndenge nalobelaki bino, baoyo bozali kolanda na ba-telefone, na—nazali kokweyisa bino te, kasi oyo ezali losambo na ngai pe—pe etonga na ngai oyo Molimo Mosantu atiaki ngai likolo na yango, bongo nasengeli kolobela bango Solo. Ngonga ezali koleka.

¹⁷¹ Sikawa, bakondima yango te, kasi, “Ba-Klisto ya lokuta,” bakapolami ya lokuta, bakozala pene na elembo nyonso pe likomi nyonso ya Liloba. “Bandimaka libatisi ya Molimo Mosantu?” Na ntembe te. “Bandimelaka nyonso *oyo?*” Iyo. “Bandimelaka minoko ya sika?” Iyo. “Bandimelaka bilembo pe bikamwiseli ebilaka, bilembo ekobila bango?” Iyo. Wana ezali ba-Metodiste te, ezali ba-Batiste te. Te, te. Ezali ba-Pantekotiste. Bomoni, oyo nde mikolo ya suka.

Sikawa, eleko ya lingomba ya liboso emonaki yango soko moke te. Eleko ya lingomba ya ba-Metodiste emonaki yango soko moke te; eleko ya lingomba ya ba-Batiste, emonaki yango soko moke te; eleko ya lingomba ya ba-Presbiterien, emonaki yango soko moke te. Kasi, ba-Pantekotiste, nde bazali pene na Eloko ya solo! Ezali kuna nde, Lisangu, mposo ekómaka lokola Lisangu. Bakomona yango soko moke te. Bomoni? Bakomona te. Kasi ezali mikolo ya suka, mokolo oyo. Iyo, misie.

¹⁷² Botala, bobele ndenge ezalaki na ebandeli, ekozala pe bongo na suka. Lokola Ewa alimbolaki mabe Liloba moko, Satana nde asalelaki Ewa yango, pe ye andimaki yango. Mwasi, mobali te; lingomba, Mobali te. Bomoni? Lingomba nde ezalaki na liloba ya lokuta. Bomoni? Adama te; Ewa. Klisto te; lingomba, mwasi na libala, oyo apakolami, oyo abetaka tolo, oyo amibengaka Mwasi na libala, bomoni, azali na liloba ya lokuta.

Bokoki komona yango te? Ee, ezingami esika moko lokola singa ya sapato, lokola makiki ya miso na bino. Ee, bisika nyonso okotanga na Biblia, Ekosangisa yango esika moko. Ewa, Adama

te; Ewa andimaki yango, Adama te. Mwasi na libala ya lelo, ya nkombo, andimaki yango; Klisto te. Mwasi na libala azali na lolenge nyonso, mwasi na libala ya nkombo; bilembo ndenge moko; bikamwiseli ndenge moko, makambo nyonso ndenge moko; kasi Oyo ya solo te. “Mpo na kopengwisa Baponami soko nde ekokoka.”

Sikawa na lombangu, soki tokoki kosilisa sima na miniti zomi na mitano, tokozala na ngonga malamumu. Bolanda na bokebi mpenza sikawa, mpo bo—bososola yango mabe te.

¹⁷³ Sikawa, te, bakondima te kobengama “Yesu ya lokuta.” Bakondima te kobengama, “Yesu.” Na ntembe te. Ezali mpenza polele. Moto nyonso akoyeba yango. Moto nyonso akoyeba ete bazali Yesu te. Ata bazali na mafuta na mokongo na bango, pe makila na maboko pe na miso na bango, bakoyeba ezali bobele. . . Moto nyonso oyo bomoto na ye ezali malamumu, akoyeba ete ezali Yesu te. Bomoni? Bakondima yango te. Kasi bazali komibenga “bapakolami.” Pe bazali kosala bilembo pe bikamwiseli, “pene mpo na kopengwisa Baponami.” “Kasi Ba-Klisto ya lokuta, bapakolami, bakobima, pe bakopengwisa Baponami soko nde ekokoka.”

¹⁷⁴ Sikawa, bolanda na bokebi. Bozanga maloba oyo te, mpo esengeli koyokama.

Azali bobele kokangisa ruban na mikro mpo na kopekisa ezala koningana te. Nabandaki kobima motoki; pe yango etangaki likolo na ruban yango, bomoni.

¹⁷⁵ Na bongo, ekozala pe lolenge moko Wana, Biblia, elobaki ekozala. Bomoni?

¹⁷⁶ Botala, Ba-Yesu ya lokuta te. “Ba-Klisto ya lokuta!” Bandimi bazali bapakolami, kasi bayebi bazali Yesu te. Bomoni, ezali polele mpenza. Soki moto akei koloba, lelo: “Botala bilembo na maboko na ngai. Botala na makiki na ngai. Ngai nde Yesu.” Ee, wana, toyebi ezali lokuta. Pe, bomikanisela, Yesu alobáká soki moke te ete bato wana nde bakoya. Alobaki “Ba-klisto ya lokuta” bakoya. “Ba-Klisto,” na boike, bibongiseli pe bongo na bongo, *bapakolami*; bapakólami na molimo ya bibongiseli, kasi na Liloba te. Bozali kolanda yango? Ba-Yesu ya lokuta te. “Ba-Klisto ya Lokuta,” bapakolami, ya lokuta. Bomoni? Oh, polele mpenza! Ndenge to. . . Na ntembe te, bokozanga yango te!

¹⁷⁷ Sikawa, bomikanisela, nalobelaka bino ntango nyonso ete ezali na lolenge ya bato. Ezali na mabota ya bato misato; Hama, Semi, pe Yafete, mabota misato. Lolenge misato, pe nalobaki, ezali bandimi, bandimi ya nkombo, pe bazangi kondima. Ezalaka bongo ntango nyonso, pe ekozala bongo ntango nyonso. Bomoni? Mose azalaki, mondimi; ezalaki na Yane pe Yambele; bazangi kondima. Bomoni? Ezalaki na Balame;

Mose . . . Ezali ntango nyonso na lolenge misato ya bato, lolenge misato; mondimi, mondimi ya nkombo, pe mozangi kondima.

¹⁷⁸ Sikawa bomikanisela, mozangi kondima, lingomba ya ebongiseli, bandimaka elembo ata moko te; bazali malili, na lolenge ya libanda, bazangi bomoto, lingomba kati na mokili, ebongiseli. Kasi mondimi ya nkombo azali mposo wana. Ezali moto oyo azali komeka kondima. Pe ezali lisusu na mondimi ya solo, oyo azali mpenza sembo. Sikawa, botala bango malamumu ezali bango komimonisa sikawa, mpo na ntango moke.

¹⁷⁹ Pe botala ndenge bazangi kondima bazalaka na loma, to bandimi oyo ya nkombo ná bazangi kondima. Holálá! Bazali na loma, botala, lokola Satana oyo atelemaki wana Liboso na Liloba ya solo, pe alobaki: “Ekomami!” Ezali solo?

Mpo na nini Satana asalaki yango? Ezali mpo azangaki koyeba Liloba mpo na . . . Ayebaki Liloba ezalaki mpo na ntango wana, kasi abetaki ntembe ete Moto moke ya komikitisa oyo azalaki Liloba yango. “Soki ozali Mwana na Nzambe. Nayebi Mwana na Nzambe akoya, mpo Elobamaki ete Akosala yango. Pe ekomami, ‘Akolaka banje na Ye na ntina na Yo.’ Omoni? Talisa ngai yango! Sala ekamwiseli! Tika ngai namona Yo kosala yango.” Bomoni? Bomoni?

Bomoni, mozangi kondima, mondimi ya nkombo, momekoli. Botala Yuda oyo azalaki kati na bango, na ntango moko wana, mondimi ya nkombo! Bomoni? Botala, Liloba ya solo ezalaki pe wana.

¹⁸⁰ Ndenge bazali na loma! “Sikawa, bolanda bozoba wana te. Ezali na Yango na eloko te. Bokende kuna te. Ezali bobele makelele ya mpamba. Ezali na Yango na eloko moko te. Nyonso wana ezali bobele masapo. Ezali na makanisi na bino.” Bomoni, bomoni likambo nalingi koloba? Botelema ngwi Liboso na Liloba pe boloba yango.

¹⁸¹ Satana amikotisasi wana. Ndenge Biblia elobi awa na Yuda: “Ata Mokonzi na banje, ezalaki ye kotiana ntembe na Satana, alobaki, ‘Nkolo apamela yo.’” Kotelemela Liloba Yango moko!

Pe tala motelemeli-na-Klisto, mopakolami, atelemi bobele awa mpo na kotelemela Liloba ya solo ya mokolo, Yesu Klisto, pe alobi: “Ekomami.”

¹⁸² Botala, na mikolo ya suka. “Ekozala mpenza pene ete epengwisa ata Baponami, soko nde ekokoka.” Holálá! Ntina oyo Baponami bakopengwisama te, boyebi mpo na nini? Ezali mpo bazali Liloba. Bomoni? Lolenge moko Bomoi oyo ezali kati na misisa, nalobaki yango kala mingi te, Ekoki komiwangana te. Bomoni, Ezali Liloba pe na eleko ya Liloba. Ezali solo.

¹⁸³ Lolenge moko na Yilimia, ayebaki. Ata Hanania alobaki nini, ayebaki wapi atelemaki. Pe ezali mpenza lokola Mose asalaki, pe—pe bamosusu na bango. Ezali, ayebaki, ata mosakoli

ya lokuta alobaki nini, Liloba na Nzambe ezalaki wana. Ekomamaki.

Yango nde ntina oyo Mikaya akokaki koloba: “Malamu, bozela pe bokomona.”

Akaba alobaki: “Nandimaka basakoli na ngai. Ebongiseli na ngai ezali malamumu. Ntango nakozonga na kimia. . . Bokotisa moto yango kuna na boloko. Nakotala likambo na ye! Bopesa ye bobele lipa ya mpasi. Bobwaka ye libanda, bosangana na ye ata moke te. Ntango nakozonga na kimia, tokotala likambo ya moto yango.”

¹⁸⁴ Mikaya alobaki: “Soki ozongi mpenza, Yawe alobaki na ngai te.” Ayebaki azalaki na YANGO ELOBI YAWE, pe emononeli na ye ezalaki kotambola mpenza na YANGO ELOBI YAWE; mpo na eleko mosusu te, kasi mpo na eleko wana. Amen! Aleluya! Eleko!

¹⁸⁵ Loma, kotelema pe kowelana na Mokonzi ya banje! Elobamaki, ete: “Bilema batambolaka na sapato ya nsete epai banje bazali kobanga kotambola.” Ezali solo.

¹⁸⁶ Ntina oyo Baponami, ndenge Yesu alobaki, bakopengwisama te ezali ete bazali Liloba yango. Bakoki kozala eloko mosusu te. Bakoki koyoka eloko mosusu te. Bayebi eloko mosusu te. Ezali solo.

Bomikanisela, Mose atungisamaki te na bomekoli na bango nyonso wana. Boye te? Mose alobaki: “Sikawa, Falo, zela miniti moke. Oyebi? Yawe alobaki na ngai ete nasala boye, kasi, nkembo na Nzambe, namoni ete bato na yo bakoki kosala likambo yango moko. Bongo, nakoyebisa yo eloko nakosala, nakosangana elongo na bino”? Ha! Yango eyokani lokola mosakoli ya Nzambe te. Te, mpenza! Atelemaki mpenza ngwi na ndenge ekoki. Ayebaki, na solo, ete Nzambe akotala likambo yango ata ndenge nini, mpo Alakaki yango. “Nakozala elongo na bino. Nakotika bino te.”

¹⁸⁷ Ayebaki, yango asanganaki na bango te. Oh, te. Atikalaki elongo na bango. Alingaki bibongiseli na bango ata moko te. Atikalaki bobele na Nzambe. Atungisamaki te na makambo nyonso bakokaki kosala. Ntango bazalaki kosala likambo moko. . . Ye abimisaki ba-sili; bango babimisaki ba-sili. Ye abimisaki makila; bango babimisaki makila. Biloko nyonso ye abimisaki; bazalaki komekola ye na lolenge nyonso, kino na suka. Atikalaki bobele kimia. Ayebaki makambo malamumu mpenza. Nzambe azalaki kati na mosala.

Bososoli sikawa? [Losambo balobi: “Amen.”—N.D.E.] Bokamata mibale likolo na mibale, pe ekosala minei? [“Amen.”] Tolingi te makambo yango esala bino moto mpasi. Bongo, bongo bo—bososoli, bomoni.

¹⁸⁸ Mpo na nini? Bakopengwisama na yango te. Mondimi ya solo, ezali Momboto oyo ebongisámá liboso oyo esengeli kotelema ngwi na mokolo oyo.

¹⁸⁹ Bongo, Yesu alobaki, lisusu, boye: “Mingi bakoya na mokolo yango, na Nkomo na Ngai, pe bakoloba, ‘Nkolo, nabenganaki milimo mabe na Nkombo na Yo te?’” Yesu alobaki: “Na ntango ya suka, wana ntango ekosila pe lisekwa monene ekoya, bongo bato mingi bakoya kofanda kati na Bokonzi.” Bokonzi na Nzambe ezali kati na bino.

Mingi, matiti mabe ekoya pe ekofanda esika moko na Lisangu, ekoloba: “Sikawa, zela naino moke Nkolo! Nalobaki minoko na sika. Nagángaki. Nabinaki na Molimo. Nabenganaki milimo mabe. Nalobaki minoko na sika. Nasalaki makambo oyo nyonso.”

Ye akoloba nini? Botala. “Bino basali masumu na nko, nayebi bino soko moke te.”

¹⁹⁰ *Lisumu na nko* ezali nini? Botuna moto nyonso. Ezali “eloko oyebi ete osengeli kosala, pe oboi kosala yango.” Bayebi Liloba yango. Bayokaka Yango. Bozali koyoka bande oyo. Bozali koyoka Nsango oyo. Bozali komona Nkolo Nzambe koloba yango; bozali komona Ye kokokisa yango, kotalisa ete ezali solo. Pe boyebi ete Yango ezali mpenza polele lokola moi ezali kongenga libanda, kasi bino baoyo bozali kokangana na ebongiseli na bino, bozali kokangana na makambo yango ya lokuta; bino basali masumu na nko!

“Oh, iyo, nasalaki bakampanye minene. Nasalaki *boye*. Nasalaki *boye*.”

Alobaki: “Bolongwa na Ngai, bino basali masumu na nko, nayebi ata bino te.”

¹⁹¹ “Ee, Molimo Mosantu akitaki likolo na ngai.” Natii ntembe na yango soko moke te. “Nalobaki minoko na sika. Nayembaki na Molimo. Nasalaki . . .” Natii ntembe na yango soko moke te. Ntembe mpo na yango ezali te. Oh, ndeko mobali, ndeko mwasi, makambo ya motindo nini boye!

Oyo ezali ntango ya kolengisa. Tokómi wapi? Liloba oyo ezali kozua Bomoi sikawa. Botala.

¹⁹² Iyo, Alobaki bakosala yango. Botala: “Bino basali masumu na nko.” Nakomaki Likomi moko awa. Nayebi te soki ezali wapi. Nazui ntango mingi koleka. Nakoluka yango, bozela ntango moke, mpo natala soki ezalaki nini. Nazali na—nazali na Matai 7:21. Na—Nayebi te soki ezali wapi. Ngai, mbala mosusu, nakomaka eloko moko pembeni na yango te, ee, na—natayaka boye, na—nabosani likambo nazalaki kolobela kati na Makomi. Matai 7:21.

Moto na moto oyo akolobaka na ngai, Nkolo! Nkolo! akoingela kati na bokonzi na likolo te kasi ye oyo akosalaka mokano na Tata na ngai oyo azali na likolo.

Mingi bakolobaka epai na ngai na mokolo yango, Nkolo! Nkolo! biso tosakolaki te. . .

Basakoli, bapakolami! Ya solo? “Tozalaki mosakoli te? Topakólamaki te, mopakolami? Nasakolaki na Nkombo na Yo te? Pe na Nkombo na Yo nabenganaki milimo mabe te?” Ndenge nini okoki kosala yango, pe koboya kobatisama na Nkombo na Yesu? Bomoni? Holálá! Bomoni ndenge ekoki kopengwisa? Kino na esika yango mpenza, na sima, bazongi sima. Bazali kokóma kino na Liloba, pe na sima bazongi sima. Sikawa, botala malamumu likambo oyo. Tomonisa yango polele, na ntango moke.

Mingi bakoloba epai na ngai. . .Nkolo! Nkolo, biso tosakolaki te, tozalaki basakoli? . . .

Iyo, nalobelaki yango na Matai 24:24.

. . .pe na Nkombo na Yo . . .tobenganaki milimo mabe te? pe na Nkombo na Yo tosalaki ebele ya bika- . . .ebele ya misala?

Nakotatola liboso na bango ete, Nayebi bino soko moke te! Bolongwa na ngai, bino basali masumu na nko.

“Ntango Yango etiamaki liboso na bino pe bomonaki Yango, pe bomonaki Yango kosala, bomonaki ete Ezalaki Liloba; kasi mpo na bolingo ya ebongiseli na bino, bokanganaki na yango. Nayebi bino soko moke te. Etali ngai te, ata bobéngáná milimo mabe boni, ata bosálá *boye na boye* mbala boni; nayebaki bino ata moke te.”

Balame alobaki: “Nasakolaki likambo ya solo, na Nkombo na Yo. Ekokisamaki.”

¹⁹³ “Yango ezali mpenza ya solo, kasi, ntango ekómaki likambo ya Liloba, oboyaki Yango.”

Oh, ndeko mobali, omoni epai kopengwisama ezali? Ezali mpenza te “mosakoli”; kasi ezali Liloba, Liloba ya solo, Liloba oyo etatolami pe emonisami. “Bino basali masumu na nko!”

¹⁹⁴ Komeka, Satana na bileko nyonso alukaki komekola Liloba ya solo. Toyebi yango, boye te?

¹⁹⁵ Botala, kokóma kino na ndelo pe kotika. Boyoka awa, Alobaki, kati na Baebele mokapo ya 6, ee, totangaki yango eleki ntango moke. Nalobelaki bino ete tokozongela yango, biso pe tokosala yango na miniti mibale to misato oyo ekolanda. Alobaki:

. . . nde nzube pe nsende . . . oyo ekoki na kobwakama; suka na yango kozika na móto. (Ndelo!)

. . . bino baoyo bosili koyoka elengi . . . ya likabo na likolo . . .

“Koyoka elengi,” na elobeli mosusu, bomonaki Yango! Bokoki te [Ndeko Branham aningisi mbebu na ye nyonso mibale—N.D.E.] koyoka elengi na Yango na minoko na bino. Kasi bomonaki Yango, pe boyebaki ete Ezalaki Solo. Boyebaki ete Ezalaki Solo. “Koyoka elengi ya likabo na Likolo.”

. . . pe *kosangana* na Molimo *Mosantu*, ntango Ekitaki likolo na bino,

. . . *koyoka elengi ya Liloba na Nzambe* . . .

“Koyoka elengi,” bomonaki ete Ezalaki solo. “Pe Molimo *Mosantu* ekitaki likolo na bino,” matiti mabe kati na elanga.

. . . pe na sima *bapengwa* . . .

“Na kowangana Klisto mpenza oyo abulisaki bino, pe abengaki bino, pe atiaki epakweli yango likolo na bino.”

. . . *mbeka mpo* na lisumu *ezali lisusu te*, mpo na yango.

Elimbisamaka te! “Ekoki kosalema te mpo na bango ete bakóma na boyebi na Solo.”

“*Zambi mpo na bango basili* . . . *kosangana* na Molimo *Mosantu*,

Ekitaki likolo na matiti mabe, bomoni: “Nabandaki elongo na Yesu, pe, ‘Nkolo, nakokende kino na suka,’” kasi ntango obelemi na Liloba, ozongi sima. “Basangani na Molimo *Mosantu*, pe bayoki ata elengi, to bamoni Liloba Yango moko komonisama.” Pe na sima bapesi Yango mokongo: “Ekoki kosalema mpo na bango soko moke te ete bamona Yango to babelema na Yango.”

Ezali YANGO ELOBI MAKOMI. Sikawa, bino . . . “Likolo pe nse ekoleka, kasi Yango te.” Bomoni yango? “Ekosalema soko moke te.” Biblia elobi bongo, pe Molimo azali kotatola mpo na yango.

¹⁹⁶ Botala, tika napesa bino ndakisa moke. Botala bato babimaki na ntango na esakweli ya Mose, babimaki na ebongiseli yango, pe babimaki na makambo nyonso, na ntango na esakweli, bamonaki misala minene pe bikamwiseli, pe makambo ya motindo wana, pe bakómaki kino na ndelo, mpo na kokota.

Sikawa, Lee, likambo na yo ya, “nkombo na Buku.” Omoni? Likambo ekómi polele mpo na yo. Pe bino baoyo bozali awa te, pe libanda na—esika bozali kolanda na nzela ya singa, ezali Docteur Lee Vayle oyo afandi awa. Azali kobongisa grammaire na buku oyo ya Bileko Nsambo ya Lingomba. Pe mindondo ebimaki, to motuna, na ntina na “nkombo oyo elongolamaki na Buku na Bomoi ya Mwana na Mpate.” Bomoni, etungisaka batei mingi. Kasi bozela kino bokozua buku yango, bokososola yango bobele soki bozali na Pole kati na bino. Bomoni?

¹⁹⁷ Botala, sikawa, bokobongola elongi na bino pe bokolinga ata kotala Yango te soki boboi komona Yango. Ndenge mama na ngai amesánáká koloba: “Bokoki kozua makila kati na mbomá te, mpo makila ezali kati na yango te.”

¹⁹⁸ Botala, Pole esengeli koya; ezali kati na molili te. Pole eyaka epai na molili, kasi molili emonaka Yango te. Botala sikawa bapakolami na mokolo oyo.

Ndenge Mose abimisaki bana yango ya Yisalaele; pe bayokaki pe bakotisamaki na mobulu na ekólo monene wana kuna. Sikawa, Yisalaele ezalaki ebongiseli te. Bazalaki na mboka te, na ekólo te. Bazalaki kokende na ekólo moko.

Biso tozali na lingomba te. Tozali te...Tozali—tozali kokende na Lingomba moko, Lingomba ya Bato babotami liboso, Lingomba oyo ezali kati na Nkembo; kasi lingomba oyo ezali na mokili te, na nzela ya moto. Lingomba oyo ezali na Nkembo, baoyo babengama libanda, baoyo babongisámá liboso mpo na Bomoi ya Seko, bomoni, bazali kokende na Ekólo na bango.

Pe ntango bakómaki esika ya kokatisa, batiaki ntembe na Liloba, pe bazongaki. Sima, Yoshua pe Kalebe ná bamosusu, bakatisaki na ngambo pe bazongaki na ebólo ya mbuma na miwiti, mpo na kotalisa bango ete mboka yango ezalaki kuna, elaka ya Liloba na Nzambe: “Ezali mboka malamú, ya mabèle pe ya mafuta na nzoi.” Pe bazongaki na yango, na ngambo oyo, mpo na kotalisa bango. Pe bamekaki yango, pe balobaki: “Ah, ah, kasi, tokokoka kosala yango te.” Eloko nini esalemaki? Basilaki nye kati na lisobe. Batikalaki wana pe bamisalelaki ebongiseli, pe bakufaki, bango nyonso.

Kasi, bobele baoyo bakatisaki na ngambo pe bazongaki na eloko, Yoshua na Kalebe; Mose anetolamaki. Etaliseli ya Lingomba oyo ezali kozela; pe ya lisekwa ya Kondimana na Kala, Kondimana na Sika; pe Nzoto oyo enetolami. Bomoni yango misato wana? Bosengeli kotika yango misato na molongo, bomoni, bongo, mondimi pe mozangi kondima. Bomoni?

¹⁹⁹ Botala, ndenge elobamaki “soko moke te.” Bomikanisela, Nzambe alimbisaki lisumu wana soko moke te. Sikawa bakokota ndenge nini? Soki ezali nzube na ebandeli, ezali nzube na suka. Bobele baoyo babongisámáká liboso nde bakomona Yango.

²⁰⁰ Bolanda na bokebi mpenza sikawa. Pelamoko na mikolo ya Santu Martin, bobele liboso ya Eleko ya Molili; azalaki moto moko ya bulee. Boni basila kotanga makomi ya Santu Martin? Mingi kati na bino. Tokendaki koluka makomi ya Santu Martin; sánzó yango alobaki: “Kasi ye atangamaki mosantu te.” Ya solo mpenza; na bango te, kasi atangamaki mosantu na Nzambe. Molimo Mosantu ayebisaki biso totia ye kuna na eleko wana ya misato ya lingomba. Bomoni?

201 Botala ndenge azalaki moto moko ya bulee; abengamaki, abongisámáki liboso. Baboti na ye, bapagano. Tata na ye, soda. Asengelaki kolanda nzela na ye, kokóma pe soda. Pe ntango asalaki yango, azalaki ntango nyonso kondima ete Nzambe azalaka esika moko; ye moto ya zamba, pe akokaki komona Nzambe. Mokolo moko, azalaki koleka pene na engumba moko, pe mobange moko motelengani alalaki wana, azalaki kokufa, kosenga ete moto. . . Azalaki koyoka malili na butu wana. “Oh,” elobaki ye, “bopesa ngai eloko moko mpo námizipa; nakokufa na butu ya lelo.”

202 Moto moko te asalaki yango. Pe Martin atelemaki pembeni pe atalaki ye malamu ntango moke. Moto moko te asalaki yango. Ye azalaki bobele na monkoto moko. Akokufa na malili ye moko, azalaki na mosala, soki a—apesi ye monkoto yango. Bongo akanisaki: “Biso mibale tozali na libaku ya kobika soki nakaboli yango na ye.” Na bongo, akamataki monkoto na ye moko wana, pe apasolaki yango na biteni mibale na mopanga na ye, pe azingaki mobange motelengani na yango. Azingaki ye na monkoto na ye moko.

Bato nyonso balobaki: “Botala sinzili moko ya ndenge. Botala soda moko ya ndenge, amizingi na eteni ya monkoto!”

203 Na butu elandaki, ntango asilisaki mosala pe alalaki na mbeto na ye, eloko moko elamusaki ye. Atalaki, moto moko atelemaki wana na ndako, ezalaki Yesu Klisto atelemaki wana, azingami na eteni ya monkoto ya kala oyo azingaki ye. Ayebaki ntango wana: “Nyonso ekosala bino yango epai na baoyo ya Ngai ya mike, bosaleli Ngai yango, na mopakolami na Ngai,” oyo alali wana.

Azalaki mosali monene ya Nzambe. Lingomba batiolaki ye, banyokolaki ye, babwakaki ye libanda, pe nyonso wana, kasi azalaki mosakoli ya Nzambe. Makambo alobaki ekokisamaki. Bato mingi bandimelaki pe ye, na eleko yango.

204 Nalingi kotalisa bino lolenge zabolo azali mopengwisi. Mokolo moko afandaki na kati na biró na ye. Mbala moko, mwanje moko na nguya ayelaki ye, ná motolé na motó na ye, ná sapáto ya wolo, ná málénda likolo na bilamba na ye ya wolo, pe alobaki: “Martin, oyebi ngai?” Alobaki: “Ngai nde Nkolo pe Mobikisi na yo. Ngai nde nabikisaki yo. Kumbamela ngai, Martin.” Kasi mosakoli yango, ayebaki ete likambo moko ya ndenge ezalaki wana, akobaki kotala ye. Alobaki: “Martin, nazali Mobikisi na yo, Yesu Klisto. Kumbamela ngai! Oyebi ngai te, Martin?”

205 Martin akobaki kotala ye, wana Makomi ezalaki kolekaleka na motó na ye. Alobaki: “Satana, kende mosika na ngai.” Alobaki: “Ozali na motolé na motó na yo. Pe Liloba na Nzambe elobi ete ‘basantu na Ye nde bakolatisa Ye motolé’ na suka ya ekeke.”

Yango ezalaki mpambó mpo na ba-Pantekotiste, boye te? Botalelaka Liloba, ndeko mobali. Wana nde elonga ezali.

²⁰⁶ Mokolo moko, lisusu, na ndako ya basángó, bazalaki na mobange mosantu moko kuna, etonga ya basángó ya bilenge. Moko na bango azalaki moto ya kosilika nokinoki. Botala likambo oyo, ezali li sese moko malamú—malamu mpo na lelo. Ye alingaki kozala moto monene, likolo ya baoyo mosusu. Alingaki komilakisa, na bokonzi, moto monene koleka, moto malamú koleka, moto ya lokumu, bomoni, pe moto monene mpenza. Asengelaki kozala na molongo ya likolo. Ntango nyonso, alingaki ete bandeko mosusu te. . . Boyebi, asengelaki kozala na bokeseni. Bomoni? Ye, ata na likambo nini, azalaki na lolendo mingi. Azalaki komimona bobele ye moko nde akoki. Moto moko te akokaki kosimba ye. Sikawa botala likambo nini esalemaki. Asengelaki kozala moto monene. Asengelaki komikokanisa na—na bato minene. Bozali kolanda ngai? Bomoni? Bongo, alobaki, asakolaki. Alobaki: “Nkolo akómisi ngai pe mosakoli. Nazali mosakoli.”

Sikawa, mosakoli moko oyo ayebanaki azalaki na mokili pe ezalaki Santu Martin; ye abotamaki mosakoli.

²⁰⁷ Kasi mwana oyo alobaki, elenge mobali oyo alobaki, ye elenge sánzó ya mibu pene na ntuku mibale na mitano. Alobaki: “Nkolo akómisi ngai mosakoli, pe nakotalisa bino yango.” Alobaki: “Na butu ya lelo Nkolo akopesa ngai robe monene, ya kitoko, akolatisa ngai yango, robe ya pembe, pe nakotelema kati na bino. Na sima, bino nyonso bokoya epai na ngai, bomoni, pe bokozua mitindo uta na ngai.”

²⁰⁸ Bongo bokokanisa yango lelo, bomoni: “Nakozala mokonzi ya ebongiseli. Nakotala makambo na bino, bino basánzó mosusu.”

Pe na ntembe te: “Na butu wana, polé moko ekotaki na kati ya ndako,” ndenge makomi ya Santu Martin elobi. Botanga yango. Pe ezali likambo ya solo. Ezali makambo oyo eléká. Pe polé wana eyaki, pe bango nyonso bazalaki kotala, pe tala mbala moko. . . Alatisamaki na robe ya pembe, atelemaki kati na bango. Alobaki: “Bomoni likambo nayebisaki bino?” Kasi yango ekeseni na Liloba.

²⁰⁹ Pe ntango akendeki kokutana na mpaka ya eteyelo yango, ye atambolaki zongazonga ntango moke, pe alobaki: “Mwana, likambo yango ezali koyokana malamú te.” Alobaki: “Nzela ezali bobele moko.” Yango oyo! “Nzela ya koyeba mpo na biso ezali bobele moko. Emonanaki lokola likambo ya molimo.” Elenge mobali, ba-Pantekotiste bakokaki komela yango mobimba, misisa, mondolu, singa ya ndobo, ndobo, pe nyonso mosusu! Alobaki: “Ekamwiseli ekoki komonana malamú, kasi ezali kolongobana na Liloba te. Sikawa, tozali na moto moko,

mosakoli oyo apakólami, nkombo na ye Martin. Kende kokutana na ye.”

Moto yango alobaki: “Te, te! Martin azali na eloko moko na likambo oyo te.”

²¹⁰ Pe alobaki: “Okokende, ata bongo.” Pe bakangaki ye na loboko, mpo na komema ye liboso ya Martin, pe robe yango elimwaki.

²¹¹ Bomoni: “Kopengwisa ata Baponami, soko nde ekokoka.” Bomoni, bayebi bango. Yesu alobaki: “Bampate na Ngai bayebi Liloba na Ngai.”

“Oh,” bokoloba, “bayokaka “Mongongo” na Ngai.”

Yango ezali Liloba na Ye. “Moto akobika bobele na mapa te kasi na Maloba nyonso.” Bomoni? Baoyo babongisámá liboso bayebi yango. “Liloba ya mopaya, to mongongo ya mopaya, bakolanda yango te.”

Ezalaki pe bongo na bato oyo tolobelaki; baboyaki kolanda. Bayebaki ete Martin azalaki wana, mosakoli ya eleko yango, atamolamaki na Nzambe na nzela ya Liloba, ayebaki Liloba. Pe moto yango akokaki kotelema liboso na Yango te.

²¹² Alobaki lisusu: “Esika ezali Ebembe,” to Liloba, “wana, na ntango ebongi, nde bampongo bakosangana.” Bongo, yango ezali na Mat- . . . Bolingi kokoma yango, ezali na Matai 24:28. Mwa moke liboso, Matai 24:24; biteni minei na nse na yango, bomoni, soki bolingi kotanga yango. “Esika ezali Ebembe,” ezali Mana, ezali Liloba, “wana nde bampongo bakosangana.”

²¹³ Sikawa esengeli nasala noki. Natombolaki miso kuna pe namonaki ngonga nini . . . Ezali—ezali miniti nsambo to mwambe sima na midi. Nakosala nokinoki, to tokoki kosilisa yango na mpokwa, ndenge bokolinga esalema. Na ntongo oyo to na mpokwa? Huh? Bato boni bakozonga epai na bango lelo na sima ya losambo, botombola maboko, bomoni. Holálá, ekoleka malamú tokoba!

Nasengi bolimbisi mpo na koumisa bato bazali kolanda biso na nzela ya telefone, boye, kasi nakosala noki. Ezali na motuya mingi koleka misolo na bino. Nandimi ezali bongo, mpo na ngai, bomoni. Misolo na bino ekosila. Oyo te; Ezali Liloba. Bomoni?

²¹⁴ “Esika ezali Ebembe, wana nde bampongo bakosangana.” Esika Ebembe, esika mo—mo—moboma ezali, wana nde bampongo bakosangana. Esika ezali Mosuni ya mobesu, Liloba ya ntango, wana nde bampongo bakoyangana.

Kasi soki epoli, na ntango wana nde bingondó bakosangana likolo na yango. Iyo. Bomoni likambo nalingi koloba? Ntango babomi eloko moko, bampongo bakoya wana; kasi na sima na yango koumela wana pe kopola, wana nde bingondó bakoya. Mpongo akozala na ntina na yango te. Bomoni?

Yesu alobaki: “Esika ezali Ebembe,” esika Mana ekweyaki, na butu oyo Mana ya sika ezali kokweya, “wana nde bampongo bakoyangana mpo na Yango.” Yango nde Mana ya mokolo. Bomoni? Botala.

²¹⁵ Kasi sima na yango kopola, pe nkusú kokota na kati, na ntango wana nde bingondó bakoya. Bakoki koyoka nsolo na yango te kino ekopola. Ezali kokamwa te ndenge Yesu atelemaki wana pe alobaki: “Yelusaleme, yo mobomi ya basakoli nyonso na mabanga!” Botala likitana bomei oyo, bomoni: “Yelusaleme, Yelusaleme, mbala boni nalingaki. . .” Ye azalaki Nani? “Mbala boni Nalingaki kosangisa bino lokola soso asangisaka bana na ye na nse ya mapapu na ye, bino nde bobomaki na mabanga basakoli nyonso oyo natindelaki bino,” lingomba monene wana, Yelusaleme.

²¹⁶ Yelusaleme ya mokili awa te, “kasi biso tozali bato na Yelusaleme oyo ya Likolo,” epai Liloba euti, uta kobongisámá liboso, bomoni. Yelusaleme ya kala te oyo ekobeba; kasi Yelusaleme ya sika oyo ekobebate. Ezali Yelusaleme ya kala te, oyo etongamaki na bato; kasi ezali Yelusaleme ya Sika oyo etongami na Nzambe, bomoni, Liloba uta likolo, ezali sikawa komonisama. “Na ndako ya Tata na Ngai, bifandelo bizali mingi. Nakokende kobongisela bino yango,” Mozalisi azali kosala banzela ya wolo, pe bongo na bongo. Yango nde Oyo ekobeba te.

²¹⁷ “Yelusaleme, Yelusaleme, mbala boni nalingaki,” longwa ebandeli ya ntango; Moto ya misato te, moto mosusu, kasi: “Nalingaki koyanganisa yo lokola soso ayanganisaka bana na ye, kasi olingaki te. Kasi sikawa ngonga na yo ekoki.” Bomoni?

“Esika ezali Ebembe, nde bampongo basanganaka.” Kasi sima na ebembe kopola, ntango wana nde bingondo basanganaka. Bomoni?

²¹⁸ Botala. Mose, apesaki bana Nzambe soko moke te. . . Mose azalaki mpongo, pe apesaki bana na Nzambe biloko Nowa atikaka soko moke te. Bomoni? Azalaki na Liloba na Nzambe ya mobesu. “Yawe Nzambe akutanaki na ngai kati na biliki, pe akokisaki Liloba na Ye, pe atindaki ngai awa mpo kobimisa bino libanda na.” Na sima nde bamekoli bayaki zingazinga, mpo na komekola yango. Bomoni? Kasi ye azalaki na Liloba ya ntango.

Zambi, Nzambe alobelaki Abalayama, ye oyo azalaki na elaka: “Libota na yo bakofanda na mokili mosusu, mibu nkama minei, Nakokende kotala bango pe kobimisa bango na loboko ya nguya.”

²¹⁹ Mose alobaki: “Sikawa, Yawe Nzambe akosolola na ngai mpo na kotalisa ngai, pe Alobaki na ngai nini nakosala, pe nakolobela bino.” Alobaki: “NAZALI’ atindi ngai.”

“NAZALI!” Ezali te “Nazalaki, to nakozala.” “NAZALI,” eleko ya sikawa, Liloba sikawa. Ezali te Liloba oyo ezalaki, to

Liloba oyo ekoya; Liloba oyo ezali sikawa. Bomoni? Bososoli yango? “NAZALI!” “NAZALI” ezali Liloba. “Na ebandeli Liloba ezalaki, pe Liloba ezalaki mboka na Nzambe.” Ezali solo? “NAZALI.” “Nzambe atindi ngai lokola mosakoli na Ye, mpo na kotatola ete likambo oyo ezali solo. Ngai nazali eyano ya Liloba oyo, alobaki na ngai ete nakita awa pe nasala yango.”

²²⁰ Pe ntango asalaki yango, Falo alobaki: “Ee, tozali na bilenge mibali ebele kati na etonga na biso oyo bakoki pe kosala yango,” bamekoli.

Yesu alobaki: “Bongo, likambo yango ekosalema lisusu na mikolo ya suka,” bomoni, bakoloba likambo yango moko. Botala nani ayaki liboso. Botala nani atikalaki na Liloba. Ezali yango. Bayebaka yango nde bongo, boye bomoni.

²²¹ Tomoni, Mose apesaki bango biloko ya ntango ya Nowa soko moke te: “Tokotonga masuwa sikawa, mpo yango ezali Liloba, boyebi. Mokolo moko Nowa atongaki masuwa.” Te, bingondó nde bazalaki kolia yango. Te, te. Te.

²²² Oyo nde Liloba elakamaki. Botala, mpo na nsango ye azuaki uta na Nzambe, azalaki na Liloba ya Nzambe ya solo oyo ebongisámáká liboso mpo na ntango wana.

Yesu pe apesaki bango soko moke te biloko Mose atikaki. Mose azalaki na Liloba mpo na ngonga wana, kasi Mose azalaki mosakoli. Awa ezali Nzambe Ye moko, bomoni, Apesaki bango biloko Mose—Mose atikaki soko moke te.

Kasi botala naino bingondó wana na ebongiseli yango, bazalaki kodunda yango. “Toyebi! Tozali na Mose! Tosengeli na bizo na Yo te.”

²²³ Alobaki: “Soko boyebaka Mose, bokokaki koyeba Ngai zambi Mose alobaki mpo na Ngai.” Holálá! Bomoni?

“Esika ezali Ebembe, wana nde bampongo bakosangana.” Bampongo! Moboma ya mobesu ya Liloba, Liloba oyo etindamanki, etondi na mafuta, pe emonisamaki mpo na kopesama lokola Bilei mpo na bana.

Kasi, ebembe ya kalakala oyo elali wana mibu nkama na nkama, ekozala kaka wana.

Ndenge moko sikawa! Luther azalaki na nsango ya kobongola mitema; kasi, bino etonga ya banzéngó ya ba-Lutherien! Ba-Batiste bazalaki na nsango moko; kasi bino banzéngó ya ba-Batiste! Bomoni? Bato na Pantekote bazalaki na nsango moko; nakokóma na ntina sikawa: banzéngó ya ba-Pantekotiste!

“Kasi esika ezali Ebembe, wana nde bampongo bakosangana.”

²²⁴ Bomikanisela, bokokaki koleisa Mo-luterien, ya mikolo eleki wana (sikawa ekoki kosalema), bipola ya Katoliko te. Te, misie. Azalaki na mosuni ya mobesu. Ezalaki eleko ya lingomba wana.

Bokokaki koleisa ba-Metodiste, nsango ya ba-Luterien te. Oh, te, basengelaki na bipola wana te. Esili kopola. Bomoni, Bomoi etikaki yango pe ekotisaki eloko mosusu. Yango nde mobimbi ya kala oyo ekufaki, kalakala. Bomoi ezali kokoba.

Bokoki pe soko moke te koleisa Mwasi na libala ya Yesu Klisto Bo-pantekotizme. Te, soko moke te! Bibongiseli oyo etondi nkusu; ekoki kosalema te! Te, te!

Mpo ete elaka ezali: “Liboso mokolo monene pe ya nsomo eya, Nakotindela bino mosakoli Eliya. Akozongisa lisusu mitema na bana epai na Kondima ya batata.” “Bilaka oyo nyonso epesamaki na Biblia, Nakosala yango, pe wana nde bampongo bakosangana.” “Nyonso oyo Tata apesaki Ngai, ekoya epai na Ngai.” Bomoni?

²²⁵ Yesu amekaki yango soko moke te. Kasi ntango Yesu ayaki, Akutaki ebele ya bingondó: “Tozali na Mose pe mibeko.” Bomoni? Ee, yango ezalaki bilei malamumu kalakala, ntango ebomamaki pe epesamelaki bango. Bomoni, ezalaki malamumu na ntango wana.

Kasi oyo nde likambo esakolamaki na Mose, ye moko, oyo abomaki mbeka, alobaki: “Yawe Nzambe na yo akotemisela yo Mosakoli longwa na kati na yo, longwa na bandeko na yo. Soko pe moto nani akokangana na Mosakoli yango te pe na oyo Ye alobi, akolongolama kati na libota.” Pe esalemaki.

²²⁶ Botala, ndenge na ndenge ya bisakweli pene na nkama motoba ya Kondimana ya Kala ekokisamaki ntango wana, mpo na Yesu Klisto. “Batoboli maboko na Ngai pe makaka na Ngai.” Pene na, nabosani motango boni ekokisamaki na ngonga nsambo to mwambe ya suka ya bomoi na Ye, basakoli yango nyonso balobaki, na ndenge ebongi be.

²²⁷ Soki lelo nasakoli ete likambo moko ekosalema sima na mobu moko longwa sikawa, ntango mosusu nazali—nazali na konzo ntuku mibale likolo na monkama mpo likambo yango ekokisama, soki ezali solo to lokuta. Pe soki nasakoli ete likambo yango ekosalema, pe nalobi ntango nini te, nakozala na konzo moko likolo na monkama. Soki nasakoli ntango nini ekosalema, ekokoma moke koleka. Soki nasakoli esika nini ekosalema, ekokoma moke lisusu koleka. Soki nasakoli . . . moto nani likambo yango ekokokisamela ye, na ntango wana nakozala na konzo pene na mokama likolo na ba-nkoto mpo likambo yango ekokisama, soki ezali solo te.

Pe Liloba nyonso, aleluya, oyo ekomamaki mpo na Masiya yango, ekokisamaki ndenge elobamaki. Kino mokolo moko, ezalaki Ye kotanga Makomi, Atelemaki na katikati ya maloba, pe Alobaki: “Molimo na Nzambe ezali likolo na Ngai mpo na koteya Nsango Malamumu, pe kokangola ba . . .” Atelemaki mpenza wana na katikati ya maloba yango, mpo ete eteni mosusu wana ezali

mpo na Boyei na Ye ya mibale. Amen! “Likolo pe nse ekoleka; nde Maloba na Ngai makoleka soko moke te.” Bomoni?

²²⁸ Azalaki Liloba ya ntango wana, oyo ezalaki koleisa bango ntango wana. Mose ayebisaki bango Solo; kasi, bomoni, bakómisaka yango ntango nyonso ebongiseli, mpo ete bingondó ba...

Ezalaka na ndambo na Yango etikalaka, soki bampongo basilisi kolia pe bazongi mboka. Na ntango wana bazali kozela komona eloko mosusu. “Liloba,” balobaka, “awa nde esengeli koya. Lobi eleki toliaki mboloko; tokolia mpate lobi.” Bomoni likambo nalingi koloba? “Ebembe ya kala ya mboloko ezali kuna, bazali kosepela, kasi biso, lelo tokolia mpate. Ezali wapi?” Bomoni likambo nalingi koloba? Bilei ya Banje! Bato bazalaki kolia mana mokolo moko, soki bamekaki kobomba yango mpo na mokolo ya sima, ezalaki kopola. Bozali komona bitaliseli nyonso oyo te, ndenge ebongi be? Ezali ndenge moko sikawa!

²²⁹ Botala, bingondó ya ntango na Yesu bazalaki pe kobengana milimo mabe; bapokolami likolo na ebembe ya kala. Ezali ya solo? Bazalaki kobengana milimo mabe. Yesu alobaki yango.

Pe bomikanisela, bazalaki na basakoli na mikolo wana. Kaifa, ye nganganzambe mokonzi, asakolaki. Bato boni bayebi yango? Kaifa asakolaki. Botala esika ya matiti mabe kati na elanga; ezali komwangisama bobele na epakweli yango moko. Mpo na nani Biblia elobi ete asakolaki? “Mpo azalaki nganganzambe mokonzi na mobu yango.” Molei ya bipoli, matiti mabe ná nsende, efandi kati na Masangu; kasi Molimo ezalaki likolo na ye, Molimo Mosantu ya Nzambe ya solo. Molimo Mosantu ya Nzambe ezalaki likolo na ye, mpo na koteya, kosakola, pe koloba yango liboso ekokisama; pe aboyaki pe abakaki na ekulusu Liloba mpenza ya ntango oyo etatolamaki.

Oh, mawa mingi, ndeko mobali! Ntango molai boni tozali na yango mpo na koloba makambo oyo, bomoni, ntango boni lisusu ya kolekisa na Makomi? Nakosala noki. Natikali na nkasa pene na zomi awa, ya Makomi, mpo na kotalisa makambo oyo nyonso polele. “Moi, likolo na bayengebeni pe bato mabe, ndenge moko.”

²³⁰ Yesu alobaki, mpo na kotalisa likambo oyo polele: “Soko Ngai nazali kobengana milimo mabe na mosapi na Nzambe, bana na bino bakobengana yango na nini?” Bongo, bazalaki kobengana milimo mabe. Bazalaki kosakola. Ezali ya solo? Kasi bayebaki te ete Ye azalaki Liloba ya ntango, (mpo na nini?) mpo Azalaki moto ya lisanga na bango te.

Sikawa bokamata Matai 24:24: “Ba-Klisto ya lokuta,” bapokolami, “bakotelema, pe ekozala na basakoli ya lokuta, oyo bakosakola yango,” bomoni, “pe bakopengwisa Baponami mpenza soko nde ekokoka.” Bososoli yango sikawa?

²³¹ Botala, bana. “Na nani bana...Nde soko Ngai nazali kobengana milimo mabe na Liloba na Nzambe,” oyo, Azalaki Liloba na Nzambe, “bana na bino ya bibongiseli bakobengana yango na nini?” Sikawa, pe bobele Nzambe nde akoki kobengana molimo mabe, toyebi yango, bobele Nzambe. Mpo ete, moto ya makasi asengeli kozala na makasi koleka ye oyo azali na ndako na ye. Bazalaki na nguya ya kosala yango.

Boyebi, kuna na Emoniseli, elobami ete ako...ete motelemeli na Klisto oyo atelemaki na mikolo ya suka: “Asalaki bilembo pe bikamwiseli, ete apengwisa ata bafandi na mokili, pe apengwisa moko na moko na bango, Baklisto pe bato nyonso, baoyo nkombo na bango ekomamaki te kati na Buku na Bomoi ya Mwana na Mpate,” eyano mpo na Matai 24:24, “baoyo nkombo na bango ekomamaki te kati na Buku na Bomoi ya Mwana na Mpate longwa kozalisama na mokili.”

Bomoi yango oyo ezalaki kati na mosisa ya—ya nzete ya malala wana ya solosolo, oyo emataki kati na bandimo wana nyonso pe nyonso mosusu, elekaki pe ebotaki mbuma na nsonge ya nzete, likolo ya bitape pe bibamba nyonso ya bibongiseli. Bososoli yango? Nakosala noki. Moto ya makasi. . .

²³² Bomikanisela sikawa Dawidi, azalaki alimá, sembo, azalaki komeka kosalela Nzambe mosala, kasi abongisamaki mpo na kosala yango te.

“Bango,” bapokolami; kasi Yesu alobaki: “Bazali kolakisa Mateya oyo ezali ndimbola (ya Makomi) ya bato,” bomoni, ezali Liloba na Nzambe te, ezali te Liloba na Ye oyo etatolami; bazali koteya Klisto ya masolo, bomoni, eloko moko ezaláká.

Pe Biblia elobi: “Azali.” “NAZALI,” ezali te “Nazalaki to Nakozala”. “NAZALI, sikawa.” Azali Liloba yango oyo ezali kobika awa.

Azalaki, na ebandeli, Azalaki na kati na . . . Azalaki kati na bi—bitanga; Azalaki kati na felele; Azalaki kati na mposo; kasi sikawa Azali kati na Mbuma.

²³³ Sikawa, bozonga na sima komeka kobikela yango lisusu? Bongo ekozala ndenge nini soki Bomoi yango ekiti lisusu, okanisi Bomoi yango (oyo etikali) ekoloba, ete ezonga na mposo wana ya kala oyo esili kokauka, ezonga pe ebika lisusu kati na yango? Esalemaka soko moke te. “Zambi nzela ezali te mpo na baoyo bangengelamaki moi,” pe bakobaki kotambola elongo na Liloba te, ntango yango ezali kokokisama, “basili kokufa, esili mpo na bango; pe nzube pe nsende oyo ebelemi mpo na kobuakama, suka na yango kozika na móto.” Ezali ya solo?

Sikawa, nakosala mpenza nokinoki.

²³⁴ Sikawa, botala Makomi. Bazali koteya Nzambe ya masolo, bomoni, bobele lokola bazali komeka kobika kolanda ntango oyo eleka, ndakisa: “Ee, Wesley alobaki *boye na boye*. To, *Songolo*

alobaki *boye na boye*.” Bozali koboya Liloba ya elaka ya mokolo, Mana ya mokolo oyo etalisami polele. Bazali komeka kotia bavinyo na bango ya kala ya ba-Lutherien, ba-Batiste, ba-Pantekotiste kati na mbeki na biso ya sika. Ekobonga te. Pe Vinyo na biso ya sika, kati na mbeki na bango ya kala, ekobonga te. Soki bameki kotia Vinyo ya sika oyo kati na ebongiseli, bolema na bango ekomonisama polele. Bakoki kosala yango te. Ekopasola yango nyonso.

²³⁵ “Sikawa, ndeko mobali, namoni Liloba na Nzambe, ebongi be na Liloba!”

“Sikawa, tala awa, dokotolo, soki . . . To—tokoki kozala na Yango te.” Ned, nakanisi ete obikeli likambo yango kala mingi te awa. “Biso, tokoki mpenza kozala na Yango awa te. Na—nakosepela mingi ete bokoba bobele na nzela na bino.” Boyebi. Bomoni, ekobonga te. Ekopasuka.

“Batiaka eteni ya elamba ya sika na elamba ya kala te, mpo ete okopasola yango nyonso.” Bomoni? Yesu alobaki yango te? Bokoki kotia Vinyo ya sika na ba—mbeki ya kala te. Ekopasola yango nyonso. Vinyo ya sika ezali na Bomoi kati na yango. Malamu.

²³⁶ Botala eloko moko awa, na lombangu sikawa, ezali biso kosilisa . . . liteya na biso. Botala Emoniseli 16:13 kino 14, soki bolingi kokoma yango. Ntango mosusu nakozanga ntango ya kokota na yango. Nalingi boyeba yango malamau pe bomona yango. Sikawa botala, oyo ezali koyulama ya kelelo kati na Mbeki ya Motoba pe oyo ya Nsambo.

²³⁷ Sikawa toko—tokosilisa na ntango moke, soki bokoki kokanga motema lisusu mpo na ntango moke. Tozali kosilisa sikawa.

²³⁸ Botala Emoniseli 16:13 kino 14, kati na Mbeki ya Motoba pe oyo ya Nsambo: “Milimo na mbindo misato lokola magbololo” (bomoni yango?) “ebimaki na monoko ya moto moko.” Sikawa botala, nokinoki. Bobelemi? Boloba: “Amen.” [Losambo balobi: “Amen.”—N.D.E.] Bosato ya milimo!

²³⁹ Sikawa yo ndeko mobali ya ebongiseli, fanda kimia ntango moke. Kotelema te mpo na kobima libanda, bino bozali kolanda kuna na sima, na ba—radio, na nzela ya telefone. Bokanga bamanietofone na bino te. Bofanda kimia ntango moke, pe boyoka. Bobotami na Nzambe, bokosala yango.

²⁴⁰ Bosato ya magbololo! Ligbololo azali nyama oyo atalaka ntango nyonso na sima. Atalaka esika azali kokende soko moke te; atalaka esika auti. Bomoni? Bomoni, boye te? Mateya ya bosato bosantu ebotamaki wapi? Bomikanisela, “milimo ya mbindo misato,” milimo ya bato. Bososoli yango? [Losambo balobi: “Amen.”—N.D.E.]

²⁴¹ Botala, batalaki na sima na Likita ya Nicée epai mateya ya bosato bosantu ebotamaki, ezali kati na Biblia te. Likambo ya boye ezali te. Batalaki na sima na Likita ya Nicée kuna na Nicée, na Roma, epai bosato bosantu ebotamaki.

Botala esika bautaki. Botala. Pe bosato ya magbololo eutaki na bosato bosantu ya kala, mama na bango, ebotaki bosato bosantu ya sika, mama na bango. Yango eutaki wapi? Bosato, “dalagona,” bomoni, “nyama na yauli,” pe “mosakoli ya lokuta.” Bosato, ya sika. Mpo ete, ntango nini magbololo oyo ebimaki? Esalamaki ntango nini? Botala, bazalaki wana ntango nyonso, kasi emonisamaki te kino na katikati ya Mbeki ya Motoba pe ya Nsambo, bobele liboso Bilembo efungolama mpo na komonisa yango.

“Zambi na Nsango ya mwanje na nsambo, mabombami ya Nzambe ekoyebana,” makambo nyonso wana ya ba-trinitaire, ba-libatizi ya lokuta, pe nyonso wana esengelaki komonisama. Nzambe asunga biso mpo tomona oyo Solo ezali! Pe bokanisa te ezali moto moko oyo azali komeka koloba likambo moko mpo na . . .

²⁴² Nayoki molimo wana kotelemela Yango, bomoni. Nazali koloba na ngai moko te, ndeko mobali. Nazali koloba uta na Mwanje na Nkolo oyo azali kati na molako. Ezali mpenza ya solo.

²⁴³ Botala, bosato! “Dalagona,” bato boni bayebi soki dalagona ezalaki nani? Ezalaki Roma. “Pe dalagona atelemaki liboso na mwasi mpo na kolia mwana na ye ntango akobotama.” Ezali solo? Kati na Biblia, “nyama” elingi koloba nini? Nguya. Malamu mpenza. “Mosakoli ya lokuta, mosakoli moko ya lokuta,” mopakolami moko, ya lokuta. Bomoni?

²⁴⁴ Abandaki wapi? Oyo ezali “mosakoli ya lokuta,” na bomoko. “Mosakoli ya lokuta,” pápà ya liboso; pe uta na ye ebimaki “mwa—mwasi na pite pe mama na basi na,” yango nyonso.

Bosato ya lokuta ebimaki; na ebandeli te, emonisamaki polele te na ebandeli, ekobaki kosala mosala na yango. Kasi ntango Bilembo Nsambo eyaki, pe efungolaki mabombami oyo pe emonisaki yango; na ntango wana nde “magbololo, milimo ya mbindo misato lokola magbololo, ebimaki mpo na komimonisa,” mateya ya bosato mpo na kotelemela Solo. Bomoni? Hah!

Bomoni esika euti? Bomoni esika ezali kozonga? Na Lisanga ya Mangomba. Bango nyonso bazali bandeko, ata bongo; milimo moko, likambo moko.

Pe botala malamumu. Kopengwisama mpenza, bazali kosala bikamwiseli! Pe ezali milimo mabe oyo ezali kokende epai na banzambe nyonso ya mokili, bazali kosala bikamwiseli, mpo na kopengwisa bango na ntango ya suka, pe bakolonga kosala yango. Nzambe alobaki nini na ntina ya molimo mabe wana?

Alobaki: “Nakokita kuna pe nakokota na monoko ya basakoli yango pe nakosala ete bango basakola lokuta, mpo na komema Akaba kokende kuna mpo abomama.”

²⁴⁵ Nzambe alobaki: “Kende. Okolonga. Okosala ete bandima yango. Bazali na bango kati na Liloba yango te, banda ebandeli.” Bomoni? “Kende, mpo akondima yango mpenza. Yo nde okokoka kosala yango, ntango okokota kati na basakoli ya lokuta oyo, mpo azali kotalela bobele bango. Pe ayebi ata eloko moko te na Liloba, akomeka pe koyekola Yango te. Akoki kosala yango te, mpo azali nsende, banda ebandeli.” Bomoni? Bomoni? “Okolonga.”

²⁴⁶ Botala awa mangbololo oyo ya lokuta, bazali kotala sima: “Ee, boyebi likambo balobaki kuna na Nicée?”

Etali ngai te, likambo balobelaki, kuna na Nicée. Ngai nazali koloba likambo elobamaki awa na Ngwende na Nzambe; oyo ekozala, oyo ezalaki te; oyo ekozala, mpo Ye azali “NAZALI.” Bomoni?

“Ya lokuta.” Botala yango. Hah! Botala esika bauti.

²⁴⁷ Sikawa, boyoka na bokebi. Tomoni polele, sima na Bilembo Nsambo kofungwama, ezalaki mpo na komonisa libombami yango. Bosato yango ezali nini? Bomoni? Ebengami bosato wapi? Bomoni? Wapi kati na Biblia esika elobeli oyo bosato elobami? Wapi esika ekoki kozala na ba-Nzambe misato, mpo tosambela ba-Nzambe misato, soko kozala bapagano te?

Ndenge nini bakoki kokabwana, ntango Ye alobaki: “Ngai na Tata na Ngai tozali Moko”? “Soko bokondima te ete Ngai Nazali Ye, bokokufa na masumu na bino, bomoni, kozanga kondima na bino.” Lisumu ezali kozanga kondima. “Bokokufa na kozanga kondima na bino.”

Oh, bino bolobi Ngai nazali nani, bolobi Nauti wapi,
Oh, boyebi Tata na Ngai, to boyebi Nkombo na Ye?
NAZALI Felele ya Salomo, Monzoto
Engengaka na Ntongo.

Bokoki koyebisa ngai Nani Ye azali?

NAZALI Ye oyo asololaki na Mose na nzete epelaka Móto,
NAZALI Nzambe na Abalayama, Monzoto
Engengaka na Ntongo.
NAZALI Felele ya Salomo, oh: bolobi Nauti wapi;
Oh, boyebi Tata na Ngai, to boyebi Nkombo na Ye? (Amen!)

NAZALI Alifa, Omega, Ebandeli pe Suka;
 NAZALI bozalisi mobimba, pe Nkombo na Ye
 Yesu

248 Ezali ya solo. Bosato ezali te! Te, misie. Ezali likambo ya lokuta.

Bilembo Nsambo, oyo efungolaki mabombami oyo “esengelaki kosila,” etalisi yango polele. Elembo oyo efungwani, emonisi, etalisi polele, elakisi polele ba-Solo ebombamaki, oyo Bilembo ebombaki mibu oyo nyonso, na nzela na mangomba pe bibongiseli oyo.

“Mwasi monene na pite,” ya Emoniseli zomi na nsa-... Ezalaki nani? Kasi ezali pe “MAMA NA BASI YA NDUMBA”. Bomoni?

249 “Sikawa, obengaki bango ‘bingondó.’” bokoloba: “Ndeko Branham.” Ezali ya solo.

Kasi, bomikanisela, engondó ezali ndeke. Epakólami pe mpo na kopimbwa. “Milimo yango mibale ekozala mpenza pene ete ekopengwisa Baponami. . .” Engondó ezali monene mpenza lokola mpo—lokola mpongo. Ekoki kopimbwa lokola mpongo; pe epakólami mpo na kopimbwa, to mpo na koteya, to mpo na kosakola, botala, ndenge moko na mpongo. Kasi ekoki kolanda mpongo na likolo te. Te, te. Soki emeki kolanda mpongo, bolema na ye ekomonisama. Iyo, misie. Ekoki kolanda mpongo te.

Oh, ekoki koloba: “Nandimi Yesu Klisto lokola Mwana na Nzambe. Nandimi Nzambe Tata, Mozui na nguya nyonso, Mozalisi ya likolo pe na nse; Yesu Klisto Mwana na Ye, pe bongo na bongo.” Oh, ya solo, bakoki kosala yango. Kasi mpo na koloba Azali motindo moko lobi, lelo, pe libela? Bomoni?

250 Mpongo ezali ndeke moko esalema ndenge mosusu. Ezali na eloko moko te lokola ye, awa na mokili. Bomoni? Ye—ye. . . Soki nzengó emeki kolanda ye, to ndeke mosusu, ekopanzana. Bolema na yango ekomonisama, ya solo mpenza. Ekopasuka, ntango ekomeka kotia Vinyo ya sika kati na mbeki ya kala. Bomoni, ekopasuka. Ekopanzana. Esalémá bongo te, te ye. . . Nzoto na yango esalema te na lolenge ekoki koumela kuna likolo. Ntango ekómi na misanda minene kuna likolo, soki esalémá te, ebulisama te, ebongisama liboso te, ebotámá mpongo te, ekopanzana biteni biteni. Bomoni? Masala na yango nyonso ekokweya na nse. Ya solo. Ekoki kolanda mpongo te, kuna likolo. Soko emeki yango, bolema na yango ekomonisama. Ya solo. Ekokoka te.

251 Mpo na nini? Ekoki komona lokola mpongo te. Litomba nini komeka kopimbwa likolo mpenza, pe kozanga komona esika ezali yo ntango ekomi yo kuna likolo? Pe soki emeki, emeki ata komekola mpongo oyo, kuna likolo, ekokufa miso pe ekoyeba te eloko nini ezali koningisa ye boye. Ya solo. Ekobeleva pe kogánga,

pe kobundabunda; kasi lobela ye bobele Liloba, ndeko, wana nde bolema na ye ekomonana.

Solola na ye likolo na libatisi na Nkombo na Yesu Klisto, to, Ye azali motindo moko lobi, lelo, pe libela, nyonso—nyonso ya ndenge wana, pe yebisa ye. “Ee, oh, zela miniti moke!” Bomoni? Eh, iyo, wana, mapapu na ye ekobanda kolongwa. Bomoni, azali wana, abandi kopimbwa, kosakola, pe kobengana milimo mabe, pe koloba minoko na sika, pe kogánga, pe kobundabunda, kokima ngambo na ngambo. Kasi ameka kolanda kuna na Likolo te; mpo, ya solo mpenza, akomonisama polele.

Kasi, ye abulisamaki. Apakólamaki. Akoki kopimbwa. Akoki komeka komata kuna likolo, kasi nde. . . mosika mpenza te. Bomoni, akoki kolia bipola, kasi akoki kolia Mosuni ya mobesu te oyo euti na Ngwende.

Akufi miso. Azali kotungisama mobimba, kasi ayebi mpo na nini azali kotungisama bongo. Bomoni, Molimo moko oyo ekitaki likolo na ye, lokola mbula, mpo na kokómisa ye lisangu; ye azali lisangu te, longwa ebandeli. Akopasuka. “Oh, nakoki kondima te. . . Oh, te, misie! Nayebi Dokotolo Jones alobaki. . .” Malamu, kende liboso. Bomoni? Kende liboso, soki olingi.

²⁵² Te, botala, abotámá na ye te, to asalémá na ye te, to abongisámá na ye liboso te, mpo azala lolenge wana ya ndeke. Akoki. . . Azali. . . ekoki kozala ndimo ngai kokola na nzete ya malala, kasi yango euti na misisa soki moke te. Ezali eloko moko babakisaki. Pe ntango bamati likolo mingi na bibongiseli na bango pe bakoki komona te Liloba na Nzambe oyo ebongisámá liboso kotatolama, na ntango wana nde bolema na bango ezali komonisama. “Oh, makambo yango, Pole likolo na motó, pe nyonso, oh, Ezali na ntina te.” Bomoni? Emonisami.

²⁵³ Asalémá te mpo ámónáká mosika mingi. Akoki komona bobele kokokana na oyo maneti ya ebongiseli na ye ekotalisa ye. Kasi, na sima na yango, azali bobele mokufi miso lokola ngembó. Na ntango wana nde bolema na ye ezaki komonisama. Bomoni? Kuna nde esika mpongo ya solo akitaka mpo na kolia. Iyo, misie. Kuna nde esika bampongo ya solo, oyo baponami bamonaka oyo ye azali. Ntango akoki koyamba Liloba yango te, bayebi mbala moko ete azali engondó ya lingomba ebongisami.

²⁵⁴ Mpo na nini, mpo na nini akoki kopimbwa te? Zambi, botala eloko nini amileisaka na yango. Amileisaka na mosuni ya kopola ya mangomba ebongisami. Yango eko—ekokómisa ye moto ya molimo te, ekopesa ye bokolongonu ya molimo te, elingi koloba, kotombola ye likolo ya bokeseni nyonso ya bibongiseli. Bomoni? Bomoni, azali komileisa na biloko ya kopola; nzoto na ye esalémi na yango. Akoki komata kuna likolo te, esika Mosuni wana ya mobesu ememaka mpongo yango. Akoki na ye kosala yango te. Bomoni?

²⁵⁵ Yango ezali kokokisa Matai 24:24. Azali kopimbwa, komibwaka, kobeta mapapu na ye, kasi akoki mpenza komata likolo mingi te. Bomoni? Ezali ya solo. Bomoni, akoki kokende te, akoki komata likolo mingi koleka te mpo na kozua Mana wana ya mobesu. Akoki kolia mana ya kala oyo ezali awa na mabele, mintomba ekúfá kala oyo baniataki eleki mpóso mobimba, pe sanza mobimba, to mibu ntuku minei mobimba, esili kopola. Akoki kolia yango, pe kosepela na yango, pe kogánga pe kobeta ntangwa, pe kosala makambo nyonso wana, komibwaka pe kopimbwa lokola mpongo mosusu. Apakólami, lokola ndeke mosusu.

Pe nzengó ezali loléngé moko ya mpongo. Toyebi yango. Ezali mpenza bongo, kasi ekoki kolanda mpongo ya solosolo te. Bomoni? Ekoki kosala yango te. Te, misie. Nzoto na yango etongámá bongo te; ye aliaka bipola ya ndenge na ndenge, bomoni, pe ekozala te. . . ekozala te—ekozala Mosuni ya mobesu te, Mana ya mobesu. Ekozala eloko oyo Luther alobaki, oyo Wesley alobaki, to oyo Dokotolo *Songolo* alobaki. Ekozala te na oyo Yesu alobaki mpo na ngonga oyo.

²⁵⁶ Tokende sikawa, tosilisa. Bapakolami: “Ba-Klisto,” na mikolo ya suka, kasi “balakisi ya lokuta pe mosakoli ya lokuta.” Botala ndenge ezali kokamwisa! Sikawa nalingi bokokanisa likambo oyo; tozali na ntango ya kotanga yango nyonso te: Matai 24:24 ná Timote ya Mibale 3:8.

Matai 24:24 elobaki, na mikolo ya suka, bomoni: “Ba-Klisto ya lokuta,” bapakolami, ya lokuta, “basakoli ya lokuta, pe bakosala bilembo pe bikamwiseli,” ekozala lokola Oyo ya solo—Oyo ya solo, “pe bako—pe bakopengwisa ata Baponami mpenza.” Sikawa botala, Yesu nde alobaki yango.

²⁵⁷ Tala Polo, bobele sima na Ye, pe alobaki: “Sikawa, na mikolo na suka, basambeli bakoya, bomoni, bato bazali na lolenge ya kosambela. Pe bakokosa basi bazangi mayele, oyo bakambami na mposa mabe ndenge na ndenge ya mokili.”

Pe bazali komituna, koloba: “Mpo na nini ozali kogángela basi yango?” Oh, mawa. . . Bazali komona ata Yango te.

“Bakokosa basi bazangi mayele, oyo batondi na mposa mabe ndenge na ndenge,” mosika na makambo lokola. . . ya. . . Bomoni, “Pe lokola Yane pe Yambele. . .”

Matai 24:24, “Ba-Klisto ya lokuta,” bapakolami, ya lokuta, bakosala bilembo pe bikamwiseli mpo na kopengwisa Baponami.

“Lokola Yane pe Yambele batelemelaki Mose, bongo pe bato yango na makanisi mapoli; makanisi mapoli na ntina na Kondima.” Ezali te kondima “moke”. “Kondima mpenza!”

“Kondima moko, Nkolo moko, libatisi mo-. . .” Bokoki kozala na “Kondima moko” te kozanga kondimela “Nkolo

moko.” Bokoki kozala na libatisi mibale te, pe ezali te moko mpo na Tata, pe Mwana, pe Molimo Mosantu. “Libatisi moko,” Yesu Klisto. Ezali solo. Bomoni, libatisi ya lokuta!

²⁵⁸ Botala, bongo ntango bokozonga na ndako bokokanisa yango. Botala Matai 24:24, Yesu nde azali koloba; Polo, na Timote ya Mibale 3:8; na ebele misusu. Pe sikawa bokokanisa yango.

²⁵⁹ Pe na sima bokoma Likomi mosusu: Luka 17:30, Malaki 4.

“Lokola Yane pe Yambele batelemelaki Mose,” Liloba na ntango oyo epakólami, “bato oyo pe bakosala bongo,” moto moko te, “bato,” bapakólami “bakotelemela Solo.”

²⁶⁰ “Na mokolo mpenza oyo ekomonana Mwana na moto.” Emoniseli 10:1 kino 7, botanga yango ntango bokozonga na ndako, “Nsango ya Mwanje na nsambo, oyo efungoli Bilembo.” Ezali nini? Ezali te ete mwanje azali Mwana na moto; kasi motindami azali komonisa Mwana na moto. Bokoki kokesenisa yango sikawa? Wana nde esika ezali komonana makasi mingi mpo na bino, bomoni. Ezali Mwana na moto Ye moko te; kasi mwanje na nsambo, motindami ya nsambo, azali komonisa Mwana na moto na miso na bato, mpo Ye nde akabwani na mposo. Akoki kokómisa Yango ebongiseli te. Ezali Mbuma, Yango moko, lisusu.

“Pe na mokolo yango, Yane pe Yambele bakotemela,” bapakólami (bandimi ya nkombo pe bazángi kondima, lingomba ya lolenge ya libanda pe ba-Pantekotiste) bakotelemela Mbuma ya solo, “kasi botika bango; bolema na bango ekomonisama, lokola oyo ya bango.” Bomoni? Bososoli sikawa? [Losambo balobi: “Amen.”—N.D.E.]

²⁶¹ Emoniseli 10, elobaki: “Na mikolo ya koyula ya mwanje na nsambo.” Sikawa bomikanisela, ya nsambo, Eleko ya Lingomba ya Laodikia. “Koyula ya mwanje yango,” ntango eleko ya lingomba yango ekokóma ebongiseli pe ekokóma eleko ya lingomba, ntango yango ekokota na ebongiseli na yango ya Pantekote; ntango motindami na yango. . .

Motindami moko na moko azalaki nini? Martin Luther azalaki nini? Mpamela mpo na Bakatoliko. Wesley azalaki nini? Mpamela mpo na ba-Lutherien. Pantekote ezalaki nini? Mpamela mpo na baoyo mosusu. Sikawa Bomoi ekei wapi? Mosika na ebongiseli. Mposo lisusu te; ezali Mbuma. Ezali nini? Mpamela mpo na ba-Pantekotiste, bomoni, mpo na kokokisa Likomi ya ntango oyo. Bomoni?

²⁶² Botala, bobele mokolo oyo motindami yango. . . Ezali te ntango abandi, kasi ntango abandi kosakola Nsango na ye. Bomoni? Pull ya Liboso, lobiko na nzoto; Pull ya Mibale, kosakola; Pull ya Misato, kofungwama ya Liloba, mabombami emonisami. Ata moke te, ezali na molongo moko te koleka basakoli mpo na komonisama ya Liloba. Kasi lolenge bobele

moko mosakoli akoki kotatolama ezali na nzela ya Liloba. Pe, bomikanisela: Pull ya Misato ezalaki kofungolama ya Bilembo yango Nsambo, mpo na komonisa Solo oyo ebombamaki pe ekangamaki na bilembo kati na Liloba. Bomoni yango? [Losambo balobi: "Amen."—N.D.E.]

Ezali na ntango yango, na mokolo yango nde likambo oyo esengeli kosalema, ete bamekoli, Yane pe Yambele, bakomonana lisusu. Bobele ndenge basalaki ntango Mose ayaki na Liloba ya ebandeli, kosakola Yango; bayaki mpo na komekola Yango. Ezali bongo mpenza. Sikawa bomoni ntina ya Matai 24:24? Bomoni, bapokolami!

²⁶³ Sikawa ezali na makambo misato tokoloba liboso to sukisa. Yango oyo. Nalingi boyoka yango na bokebi nyonso liboso ya kosilisa. Makambo misato, bobosana te, makambo misato ekokisamaki. Makambo misato etiami liboso na bino sika sikawa.

²⁶⁴ Ya liboso. Mokili ezali na lolenge ya Sodoma. Yesu alobaki ete ekosalema. Botala libebi; basi na biso bazali kosala makambo lokola mibali; mibali na biso bazali kosala makambo lokola basi, ba-éfémíné; bato bapola, bato na mbindo, bato mabe, balatisami na milimo mabe, pe bayebi yango te. Biblia elobaki ete ekosalema, pe tokómi wana.

²⁶⁵ Ya mibale. Ezali na ntango yango, kokokana na Likomi awa, nde Yane pe Yambele bakomonana. Ya mibale.

²⁶⁶ Ya misato. Ezali na ntango yango moko nde Mwana na moto asengeli komonisama.

²⁶⁷ Botala mondimi na bino, mondimi na bino ya nkombo, pe mozángi kondima na bino. Ezali na Liloba moko ya solo komimonisa polele, kotatolama; ezali na mondimi ya katikati oyo azali komekola Yango, pe ezali na mozangi kondima oyo azali koboya likambo yango na mobimba.

Kasi Pole ekozala na ntango ya mpokwa,
Nzela ya Nkembo bokomona yango solo. (Ya solo?)

Mabota ezali kopanzana, Yisalaele azali kolamuka,
Bilembo oyo Biblia na biso esakolaki;
Pe mikolo ya Mabota ekómi ya kotanga
(Sodoma), etondi na nsomo;
Bozonga, E bapalangani, epai na bino.

Mokolo na lisiko ebelemi,
Mitema na bato ezali kosenzwa na kobanga oyo;

Botondisama na Molimo na Nzambe, minda
na bino elengelama pe engengisama, (mpo
bokoka komona Liloba ya ntango,)

Botombola miso, lisiko na bino ebelemi!

Basakoli ya lokuta bazali kokosa, (elobamaki
ete bakozala awa; bapakolami), Solo na
Nzambe bazali kowangana yango,
Ete Klisto Yesu nde Nzambe na biso.

Elingi koloba, bandimaka Yango te. Biblia elobaki likambo
yango ekozala awa. Yango oyo!

Kasi tokolanda matámbe ya bantoma. (Pole
yango moko! “Pe kozongisa Kondima ya
batata epai na bana.”)

Mokolo na lisiko ebelemi, ebelemi mpenza,
Mitema na bato ezali kosenzwa na kobanga,
(mabelé ezali kozinda);

Oh, botondisama na Molimo na Nzambe,
minda na bino elengelama pe engengisama.

Botombola miso, lisiko na bino ebelemi.

Bondimi yango? [Losambo balobi: “Amen.”—N.D.E.] Na
bongo, togumba motó.

²⁶⁸ Kuna, kati na ekólo epai Liteya oyo ekokende, longwa na
Libongo ya Esti kino na Westi, longwa na Californie kino na
New York, kokita na Sudi, komata kino na Nordi, kuna na ba-
mision, pe bisika nyonso Yango ekokende, pe na losambo oyo.
Tozali babola. Tozali na biloko ya kitoko ya minene minene wana
te, pe ba-émisió ya televisió. Tozali komeka kosala nyonso tokoki
kosala. “Kasi baoyo nyonso esili Tata kopesa na Ngai, bakoya.”

²⁶⁹ Sikawa, nalingi boyeba likambo oyo na solo, pe bino baoyo
bozali kolanda bande oyo. Bokoki ntango mosusu kokanisa lelo
ete nazalaki komeka koloba likambo yango na ngai moko, lokola
ezalaki ngai koteya Liteya oyo. Nazali na likambo ata moko
kati na Yango te, nazali bobele mongongo, eloko mosusu te.
Pe, mongongo na ngai, ata naboi likambo yango ndenge nini
ngai moko; mposa na ngai ezalaka kozala moto ya bokila. Kasi
ezali mokano ya Tata na ngai nde nandimi kosala, pe nakani
kosala yango.

Ye oyo amonanaki kuna na ebale ezalaki ngai te; natelemaki
bobebe wana ntango Ye amonanaki. Ye oyo asalaka makambo oyo
pe asakolaka makambo oyo esalemaka na ndenge ebongi be ezali
ngai te; nazalaka bobele pene ntango Ye asalaka yango. Nazalaki
bobebe mongongo oyo Ye asalelaki, mpo na koloba Yango.
Ezalaki te makambo ngai nayebaki; ezali ete ngai namitikaki,
mpo Ye aloba na nzela na ngai. Ezali ngai te, ezalaki mwanje
na nsambo te, oh, te; ezalaki komonisama ya Mwana na moto.
Ezalaki mwanje te, nsango na ye; ezalaki libombami oyo Nzambe
afungolaki. Ezali moto te; ezali Nzambe. Mwanje azalaki Mwana

na moto te; azalaki motindami kouta na Mwana na moto. Mwana na moto ezali Klisto; ezali na Ye nde bozali kolia. Bozali kolia uta na moto te; moto, maloba na ye ekokweya. Kasi bozali kolia Nzoto-Liloba ya Mwana na moto oyo ekweisamaka te.

²⁷⁰ Soki boleisami na mobimba ya Liloba moko na moko te, mpo yango epesa bino makasi ya kopumbwa likolo ya bibongiseli nyonso oyo pe makambo ya mokili, bolingi kosala yango sikawa, wana tozali kobondela?

²⁷¹ Tata Molingami, oyo ezali likambo moko makasi. Ezali pete te mpo na mokufi kosala yango. Yo oyebi makambo nyonso. Pe nabondeli Yo, Nzambe molingami, ete makambo oyo esosolama mabe te. Kasi tika bato bakoka kotambola na Pole ya Liloba na Yo.

²⁷² Pe, Nzambe Tata, nayebi te nani azali Moponami; Yo nde oyebi. Nayebi ntango ya Boyei na Yo te. Kasi nayebi bobele ete Yo olobaki ntango likambo oyo ekosalema, bapakolami ya lokuta oyo; na ntango babandaki mpenza te.

Mose atikaki bango kosala, mpo akokaki kosala eloko mosusu te. Akokaki koloba bobele oyo Yo olobaki. Olobaki na ye abengisa banzini; na sima bango pe babengisaki yango. Olobaki na ye abongola mai ekóma makila; na sima bango pe basalaki yango. Mose atosaki bobele kotosa, Liloba na Liloba, ndenge Olobaki, kasi na sima, Yo nde omonisaki bolema polele.

²⁷³ Sikawa, Tata, Yo ozali Nzambe, ata bongo. Liloba yango moko elobaki ete yango ekosalema na mikolo ya suka. Bato mingi ya sembo, ndenge tolobaki yango lomingo eleki, baoyo batiaki maboko na bango na Sanduku oyo ezalaki likolo ya likalo ya sika, kasi na mapeka ya Balewi te, bakweyaki pe bakufaki, “bakufaki na masumu pe na bikweli,” lisosoli na bango moko etelemelaki bango.

²⁷⁴ Batei mingi, bafandi na ba-biró na bango, kotanga Liloba yango, pe kolekisa lokasa na lombangu; kobanga kokota na likambo, na koyeba ete bakoki kobungisa esika na bango kati na bato, kati na lingomba na bango pe ebongiseli na bango. Nzambe, sunga biso tosala yango soko moke te!

²⁷⁵ Petola mitema na biso, Nkolo, na mbindo nyonso ya mokili. Nkolo, nabelemi mpo na kopetolama. Nabelemi, elongo na lingomba oyo pe baoyo nyonso bazali kolanda pe na moto nyonso akoyoka bande oyo. Natelemi, Nkolo, mpo nasenga kopetolama. Nkolo, mema ngai na ndako ya moyemi mbeki pe buka ngai, bongola ngai nakóma mosali Yo olingi.

Mpo ete, Nkolo Yesu: “Nazali moto na bibebu na mbindo,” ndenge Yisaya agángaki, “nazali kofanda elongo na bato na bibebu na mbindo; pe mawa na ngai, mpo ete namoni emoniseli ya Nzambe kotalisama polele,” ndenge Yisaya amonaki Banje kati na Tempelo. Namoni ntango ya suka, Nkolo, pe mawa na ngai pe libota na ngai; mawa na ngai pe bato na ngai. O Yawe

Nzambe, yokela biso mawa. Nazali kosenga mpo na ngai moko pe na bato. Kotika te tokufa elongo na baoyo bazangi kondima, kasi tika ete tobika elongo na bandimi.

²⁷⁶ Ebongiseli nyonso, Nkolo, mobali to mwasi nyonso... Nakoki kosenga Yo kopambola ebongiseli te, ntango ngai nayebi ete Otelemelaka yango. Kasi nyonso nakoki koloba, Nkolo, soki Ozali na moko na bampate na Yo kati na bango, tika bayoka bande oyo. Tika bayoka Yango, Nkolo, pe basosola Yango na lisosoli Okopesa bango, pe tika babima kuna pe bayamba Yo. Tika bango bapengwisama te na kokufa miso pe mimesano ya eleko oyo. Tika bango bameka kolia te eloko moko oyo... to ebembe ya eleko mosusu. Tika ete bazua Liloba.

Na lolenge yango nde Bafalisai babakaki Yo na ekulusu, Nkolo. Bazalaki kozua ebembe ya ntango na Mose, pe balukaki komisepelisa na yango; sima na Yo kotalisa elilingi, kati na biliki, ya mana ya mobesu mpokwa moko na moko, ezalaki kotalisa eleko moko na moko. Kuna nde esika bakweyaki. Ekotiselaki bango mbondo. Ebomaki bango, komileisa na bilei esili kopola.

Pe, na nzela ya molimo, ezali kosala likambo moko lelo; ezali koboma bango, na nzela ya molimo, na nzela ya ebongiseli.

Sunga biso, Nzambe molingami. Nyonso ezali sikawa na maboko na Yo. Na Nkombo na Yesu Klisto.

²⁷⁷ Wana togumbi mitó, tokoyemba yango ntango bozali kozua mokano na bino. Bokokende kino na suka?

Nazali koyoka Mobiki... (pe Azali Liloba)...-si na ngai, kobenga, nazali koyoka...

“Oh, natelenganaki ntango molai, kasi, sikawa, ya solo, nayoki Ye, ‘Boya epai na Ngai, bino nyonso bozali kotatabana na nzela.’ Nayoki, ‘Kamata ekulusu na yo, bila Ngai mokolo na mokolo.’ Ata natamboli na libulu ya milili ya kufa, nakobanga mabe te; kuna kati na matiti ya mobesu, pe pene na mai na kimia.”

Pe epai Azali kokamba ngai na...

“Nkolo, namoni bolema ya ba-trinitaire. Namoni ete mokili mobimba elonaki kati na yango; matiti mabe ezali kobota bisika nyonso. Kasi esika Okokamba ngai sikawa, Nkolo, nakozala lokola baoyo ya Misala 19. ‘Ntango bayokaki Yango, babatisamaki lisusu na Nkombo na Yesu Klisto.’”

...kolanda, (“Nasali ndambo ya nzela, Nkolo, ekoki mpenza mpo na koyamba Yo.”)

Sikawa nakolanda Ye kino na suka.

[Ndeko Branham abandi koyemba na nse ya mongongo *Esika Akokamba Ngai*—N.D.E.]

278 Nzambe Molingami, nandimi solo ete yango euti na motema na ngai. Nandimi solo ete euti na mitema na baoyo nyonso bazali koyemba na ntango oyo, ntango mosusu, bato mingi bakoyoka bande oyo, baoyo bazali awa te to baoyo bazali koyoka yango sikawa te. Tika ete tobelema, Nkolo, ata ekosenga nini. Olobaki: “Lokola mobali oyo azali kokende kokutana na mampinga mosusu, soda moko, mokonzi moko; liboso, akofanda pe akotala, soki azali na makoki ya kosala yango, soki akoki kotika makambo ya mokili? Okoki kotika yango, pe kosangana na mampinga ya Liloba na Nzambe oyo ekomami; okoki kotambola elongo na basoda na Ye, kopimbwa elongo na bampongo na Ye?” Kokisa yango, Nkolo, na Nkombo na Yesu.

279 Bondimi? Boyambi Ye? Malamu. Tokomona bino awa, lisusu, na mpokwa oyo, soki Nkolo alingi. Bondimi yango ete ezali Solo? [Losambo balobi: “Amen.”—N.D.E.] Ezali polele mpenza? [“Amen.”]

Bongo mema Nkombo na Yesu,
Mwana na mawa pe bolozi;
Ekopesa yo esengo pe kobondisama
Mema Yango bisika. . .

Sikawa, pesa mbote na moto oyo azali pembeni na yo, sikawa.

Nkombo kitoko, O ya boboto!
Elikia ya mokili pe esengo ya Lola;
Nkombo kitoko, O ya boboto!
Elikia ya mokili pe esengo ya lola.

Tokogumbamela Nkombo na Yesu,
Tokofukama na makolo na Ye,
Na Lola, motole ya Mokonzi na bakonzi
tokolatisa. . . (na bongo, Azali Nzambe)
Ntango mobembo na biso ekosila.

Nkombo kitoko, Nkombo kitoko, O ya boboto!
O ya boboto!
Elikia ya mokili pe esengo ya Lola;
Nkombo kitoko, O ya boboto!
Elikia ya mokili pe esengo ya Lola.

280 Nakanisi ete batei nyonso batalisamaki na ntongo oyo, pe napesaki bango nyonso mbote.

Ntango moto abondeli mposo mobimba, komituna mituna, komona Makomi oyo, komona yango polele na miso na yo. “Mawa na ngai,” elobaki Polo, “soki natei Nsango Malamu te.” Na suka ya mobembo na ye, alobaki: “Nabombaki eloko te, nayebisi bino Toli mobimba ya Nzambe, ndenge Epesamelaki ngai.”

281 Ntango mosusu nabosanaka koloba makambo, kotalisa bato, kopambola bana.

Billy alobaki, mokolo mosusu, mobali moko ayaki, alobaki: “Nazalaki koya awa ekoki mbula mibale, mpo mwana na ngai apambolama.”

Billy alobaki: “Kokanisa mabe mpo na yango te. Nazali na mwana na ngai, ya mbula moko, pe naino apambolami pe te. Bongo nakozela kino akokóma mwa mokolo mpo akende kuna ye moko, nakanisi.”

²⁸² Bongo tomoni ndeko mobali, ndeko mwasi, ezali te—ezali te, bomoni, ngai. . . Likambo moko, tosengeli kobulisa bana na biso.

Tosengeli kobatisa moto nyonso. Ebatiselo ezali; mai yango oyo. Soki naino obatisami te, nini epekisi yo? Mai yango oyo. Yaka sikawa. Kozela kino na mpokwa te; yaka sikawa. Ezali na bato awa mpo na kobatisa moto nyonso abongoli motema pe ayamboli masumu. Ata obatisama mbala zomi na mibale, bakobatisa yo na Nkombo na Yesu Klisto mpo na bolimbisi ya masumu. Bomoni? Tozali na yango.

²⁸³ Kasi, bomoni, Nsango ezali na motema na ngai. Nasengeli kosakola Yango. Yango nde ezali na ntina mpo na ngai, ata mwasi na ngai, bana na ngai, mokengeli na ngai, moto na ngai nani, balobi nini. Ezali Nkolo na ngai. Nasengeli kosakola Yango. Ntina na ngai ezali bobele yango.

²⁸⁴ Pe sikawa, mbala mingi, nabosanaka kotalisa batei. Nakanisi ntango mosusu. . . ndeko na biso, Ndeko Neville, ndeko moko ya motuya. Bandeko mosusu awa, tozali na esengo kozala na bino.

²⁸⁵ Ezali te ete tozangi koyokana na yo, ndeko, mpo na kozala na bokeseni. Mingi kati na bino awa bokoki kozala batei na ba-trinitaire. Tolingi kokangela bino kanda te. Tolingi bino. Soki te, soki nandimaki yango te, nakokaki kobima na losambo oyo te liboso na ngai kofukama pe koloba: “Nzambe, sembola ngai.”

Nalingi te molimo ya lolendo pe ya moyimi esangana na ngai. Nalingi molimo na ngai ezala peto pe pembe, na bolingo ya bandeko, bulee na Molimo Mosantu. Bongo, soki moto moko asaleli ngai mabe, ezali malamumu. Pe ata nakoki kozala na makoki ya kozongisela bango mabe, naboyi likambo na bomoi na ngai. Te, na—nalingi kozala na bolingo. Nalingi kobeleva mpo na kosembola na bolingo, na bolingo, yango nde ekoyanola na makamba nyonso, na ngambo mosusu.

²⁸⁶ Naboyi kozala na bokeseni. Ozala Metodiste, Baptiste, Katoliko, Presbiterien, to moto nani, nalobi makambo oyo te mpo na kokesene na bino to kozala na lolendo liboso na bino. Soki bongo, nazali mokosi pe nasengeli kofukama awa na etumbelo, kobondela kino Nzambe ayanola.

Kasi soki nalobi yango, ezali mpo na bolingo, pe namoni esika bozali kokende. Kasi, nalobi na ndenge na ngai moko te,

mpo na koloba yango uta na ngai moko. Napesi bino YANGO ELOBI NKOLO. Yango ezali Solo. Pe nalingi bino mpo na makambo yango. Nzambe apambola bino

²⁸⁷ Sikawa, ezali biso koyemba eteni mosusu ya nzembo oyo, toyemba, liboso tokende. Tosengi na bino ete bozala lisusu awa na mpokwa, soki bokokoka. Soki bokokoka te, Nzambe azala na bino kino tokokutana. Tozali kobondela ete Nzambe apa—apambola bino pe apesa bino oyo eleki malamumu na mboka na Ye, bomoni.

Mema Nkombo na Yesu . . .



BAPAKOLAMI YA NTANGO NA SUKA LIN65-0725M
(The Anointed Ones At The End Time)

Liteya oyo ya Ndeko William Marrion Branham, eteyamaki liboso na Ngelesa na mwa lomingo na ntongo, mokolo mwa 25, sanza ya sambo, na mobu 1965, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org